

**NATIONAL ASSEMBLY OF
SEYCHELLES**

Tuesday 6th September, 2022

The Assembly met at 0903am

National Anthem

Moment of Reflection

Mr Speaker in the Chair

MR SPEAKER

Bonzour nou bann Manm Onorab. Bonzour nou *staff* ki dan Lasanble ki pe asiste nou. E manm piblik ki pe swiv nou an deor Lasanble, dan Sesel e dan lezot pei. Byenveni pou komansman nou travay pou sa trwazyenm trimes 2022. Nou espekte kapab fini nou kalandriye Lasanble an bonneta.

Koman kominikasyon an rekonesan serten levennman trazik ki'n arive dan nou pei resaman. Mon konnen bann Manm ti anvi eksprim zot santiman senpati e solidarite.

Alor mon ava pran en pti moman pou donn en pti moman pou donn laparol reprezantan le 2 kote pou kapab fer en pti ladres. Mon ava apel Onorab Sandy Arissol *Chief Whip* lo kote Biznes Gouvernman.

HON SANDY ARISSOL

Mr Speaker bonzour. Bonzour tou bann Manm Lasanble Nasyonal. Manm Sekretarya. E tou dimoun ki pe ekout nou. Mr Speaker mon ti ava kontan premyerman dir ou mersi pou akord nou sa pti minit. Nou ti ava kontan lo nou kote koman bann Manm *LDS*, prezant nou sipor e nou konfor avek bann fanmir ki bann levennman ki'n arive pandan letan ki nou'n dan *recess*.

I annan e kantite levennman ki'n arive. In annan en kantite lanmor ki'n arive dan nou pei. E depi pti, pti ziska gran. Depi sa ki pli zenn ziska sa ki pli vye. Alor nou ti ava kontan aport nou soutyen e nou konfor anver lafanmir.

Dezyenmman mon ti ava kontan osi remersye tou dimoun an zeneral. Parske in ganny dir atraver nouvel poudir tou dimoun in koste letan ti annan en maler Roche Caiman.

Alor mon ti ava profite pou nou kontinyen remersi tou lepep Seselwa, letan in annan en maler tou dimoun i koste. Tou dimoun i vin gete ki mannyer nou kapab donn en pti koudmen. Pou aport sipor pou sa enn ki bezwen sa sipor.

E lot remersiman i al tou pou lezot Lazans ki dil avek

bann sityasyon letan zanmen i annan en maler, oubyen en aksidan dan nou pei.

Alor pou sa 2 pti minit ki ou'n akord mwan Mr Speaker, mon ti ava kontan ankor enn fwa aport mon sipor, mon konfor pou lafanmir.

E kouraz pou tou bann dimoun ki'n perdi en manm son fanmir pandan sa pti peryod letan. Ki letan nou koman bann Manm Lasanble nou ti pe fer lezot travay dan peryod *recess*. Mersi bokou Mr Speaker.

MR SPEAKER

Mersi Onorab Arissol. Mon ava donn laparol Onorab Sylvanne Lemiel lo kote Lopozisyon.

HON SYLVANNE LEMIEL

Mersi Mr Speaker. Bonzour Mr Speaker. Bonzour tou mon bann koleg Manm Onorab. Tou bann dimoun ki a lekout lo radyo e televizyon.

Mersi Mr Speaker pou akord mwan lo kote *United Seychelles*. Pou nou pas nou mon konfor e senpati a tou bann fanmir ki'n perdi en pros dan bann sirtou bann ki'n pas dan bann lensidan tre trazik, ki nou'n kapab vwar.

Ozordi mon krwar i en zour ki pe koz fortman lo kote swisid. E nou'n tou resaman

atann ki in annan detrwa ka kot dimoun in swisid. E zot tre, tre zenn. E i vremen tous leker letan ou vwar sa bann lensidan parey i arive. E mon krwar i tous tou dimoun dan nou pei. I pa zis fanmir sa bann dimoun.

So, de lapar *United Seychelles* mon ti ava kontan dir avek sa bann fanmir ki pe pas dan sa bann sityasyon parey, kouraz, ki Bondye i donn zot sa konfor e sa lafors pou zot kontinyen.

E osi petet en gidans osi pou bann dimoun ki pe mazin, oubyen i annan serten sityasyon ki nou pas ladan parfwa, ki fer ou pran serten desizyon kekfwa pou ou pran ou lavi. Annou mazin 2 fwa.

Mon krwar i annan bokou dimoun ki nou kapab aproz pou nou koz avek. Pou nou ganny serten gidans, ganny serten konfor. Alors mon krwar nou tou nou merit petet ouver lebra. Ouver nou laport kot nou kapab ed sa bann dimoun sirtou ki pe ganny difikilte pou fer fas avek serten sityasyon.

E pli presizeman mon pou re tous osi lo sa aksidan ki'n arive pandan *weekend*. I bann dimoun ki mon konn zot tre, tre byen. E mon senpatiz avek Mis Eugenia avek tou son lafanmir. Ki Bondye i donn zot sa kouraz

e sa lafors pou zot kapab kontinyen.

So mersi bokou Mr Speaker.

MR SPEAKER

Mersi Onorab Lemiel. Mon profit lokazyon pou re afirm senpati e solidarite Lasanble an antye, pou sa bann lenstans ki'n ganny mansyonnen. Mersi.

Onorab Loze mon war ou, ou'n lev lanmen. Me selman mon oule fer ou remarke ki pou ou entervenir, pou ou ganny en ladres dan sa peryod ki nou la. Kot lezot size pa ankor ganny leve. Ou bezwen notifie mwan avan. Alor mon pa kapab rekonnet ou la. Mersi.

Nou ava pas lo prezantasyon papye. E mon ava apel Madanm Clerk pou fer sa.

MADAM CLERK

Mersi Mr Speaker. Bonzour Mr Speaker. Bonzour tou bann Manm. Bonzour tou bann staff Sekretarya. E tou dimoun ki a lekout.

Bann papye ki pe ganny prezante i: -

S.I. 84 of 2022
Environment Protection Act (Appeals Rules of Procedure) Regulations, 2022

S.I. 85 of 2022
International Trade Zone

(Amendment of Schedule) Regulations, 2022

S.I. 86 of 2022 *Eastern and Southern African Trade and Development Bank Term Loan Facility Order, 2022*

S.I. 87 of 2022
Legal Practitioners (Examination for Admission of Attorneys-at-Law) Regulations, 2022

S.I. 88 of 2022 *Immigration (Amendment) Regulations, 2022*

S.I. 89 of 2022
Children's Care Homes (Minimum Standards of Care) Regulations, 2022

S.I.90 of 2022 *Anti-Corruption (Salary and Allowances of Commissioner, Chairperson and Members of Advisory Council) Regulations, 2022*

S.I.91 of 2022 *Public Finance Management (Covid-19 Relief Fund Bank Account) Regulations, 2022*

S.I.92 of 2022 *Merchant Shipping (Marine Accident Reporting and Safety Investigation) 2022.*

Mersi Mr Speaker.

MR SPEAKER

Mersi Madanm Clerk. Avan nou al lo size kestyon nou ava pas lo public reading. First Reading, Madanm Clerk.

MADAM CLERK

Mersi Mr Speaker. *Early Childhood Development Bill, 2022.*

This Act may be cited as the Early Childhood Development Act, 2022 and shall come into operation on such date as the Minister may, by Notice published in the Gazette, appoints.

Communications Bill, 2022.

This Act may be cited as the Communications Act, 2022 and shall come into operation on such date as the Minister may, by Notice published in the Gazette, appoints.

Mayor of Victoria Bill, 2022.

This Act may be cited as the Mayor of Victoria Act, 2022.

Mersi Mr Speaker.

MR SPEAKER

Mersi Madanm Clerk. Onorab *Leader* Lopoziyon. Onorab Sebastien Pillay pou adres Lasanble da sa peryod la, ou bezwen adres mwan e donn mwan notifikasyon avan. Alor mon pa pou kapab donn pou laparol la silvouple. Mersi.

Nou pou prosede avek *Private Notice Question*. E mon ava demann madanm raporter pou apel Minis pou Zafer

Etranzer ek Tourizm - Mr Sylvestre Radegonde.

Bonzour e byenveni Minis Sylvestre Radegonde, Minis pou Zafer Etranzer. E zofisye ki pe akonpany Minis bonzour, Anbasader Vivienne Fock-Tave, PS pou Zafer Etranzer, e Mr Gervais Moumou *Chief of Protocol*.

Minis ek delegasyon i la pou pran *Private Notice Question Leader* Lopoziyon. Mon ava apel *Leader* Lopoziyon pou son PNQ.

HON SEBASTIEN PILLAY

Mersi. Bonzour tou koleg Onorab. E bonzour Minis avek ou delegasyon. Byenveni dan Lasanble Nasyonal.

Zis avan mon konmanse mon le zis fer en sir mon pas mon senser senpati avek mon ansyen koleg Mis Eugenia Albert, ki'n perdi son 2 zanfan. Nou ti war li lo televizyon yer swar. I dan nou lapriyer. E nou tre atriste avek sa sityasyon. Mon ti konn son fiy byen. I ti en dimoun ki ti ede okip mon papa osi ler i ti malad lopital.

I en moman tre difisil pou en fanmir. E mon swete ki nou tou nou kapab vin ansanm pou nou montre nou konpasyon. Mon pe osi anvoy en masaz spesyal pou Dave ki ti ede sekour sa 2 dimoun laba

Ros Sodyer. Ou bann aksyon, ou bon lentansyon i en keksoz ki pa ganny, ki nou remarke.

E ki koman en zanmi mon swete ki ou kontinyen annan sa bon leker pou ed dimoun ler ou ganny sans.

Mon kestyon i lir koumsa:-

Prenon kont ki ti annan plizyer prononsman lo bann lesanz ki sipoze annan ant Sesel avek Kenya, pandan vizit Prezidan Kenyatta isi Sesel, eski Lasanble i kapab ganny detay lo ki *status* sa bann propozisyon lesanz e konbyen sa vizit Prezidan Kenyatta in kout Gouvernman Sesel? Mersi.

MR SPEAKER

Mersi Onorab Pillay. Mon ava apel Minis pou donn son larepons silvouple.

MINISTER SYLVESTRE RADEGONDE

Mr Speaker mersi. Bonzour Mr Speaker. Onorab *Leader* Lopoziyon, Onorab Zafer Biznes Gouvernman, mersi pou ou kestyon Onorab.

Mon sipoze ki ou pe demann sa kestyon la ki montre ou lentere pou war ki keksoz i bouze depi sa vizit. E mon le zis fer remarke ki sa vizit ki'n pase i annan zis 7 semenn. Ler nou

kont ou zour travay i fer 35 zour.

So ou pa pou espekte la ki mon pou kapab dir ou ki progre, ki kantite progre nou'n fer, apard met bann lankadreman pou fer sir ki tou sa ki nou'n diskite i ganny enplimante e anplimante dan en fason striktire. Dan en sistenm ki marse. E relativman vit.

E zis mon ava fer en remark Mr Speaker, pou nou bann ki'n travay dan Gouvernman dan en bon pe letan, bann ki'n bezwen *manage* bann tim, nou konnen bann *challenge* ki i annan dan nou bann landrwa travay, kot keksoz pa bouze. Ki pa bouz osi vit ki i devret.

E la mon le fer referans par egzanp bann desizyon dan bann diskisyon ki Prezidan Faure ti fer, li menm li ler i ti al Kenya lo vizit ofisyel an 2017. Mon annan en lalis bann diferan linisyativ ki ti ganny diskite. Me i pa pou sirprann zot si mon dir zot napa gran keksoz *if at all* ki'n bouze dan okenn sa bann zafer.

Dan lagrikiltir, dan lapes, defans sekirite, konba kont drog, lavyasyon sivil, sosyete sivil, lasistans teknik, annan en *Joint Bilateral Commission* ensidswit.

Menm zafer. Ti annan 3 *MOU* ki ti sinyen pandan sa vizit Prezidan Faure an 2017. Enn, ti *MOU* ant *Chamber of Commerce* Sesel e *Chamber of Commerce* Kenya.

Sa i 2 sektor prive. Gouvernman pa enterfer li pou war ki zot pe fer, ki zot devret fer. Me ler mon get nivo komers ant nou 2 pei, i pa paret mwan ki'n annan gran mouvman lo la.

Ti annan en *MOU between Citizen Engagement Platform Seychelles* avek *Kenyan Civil Society*. Mon pa konnen si i annan okenn mouvman lo la. Ouvertman ler mon regarde mon pa vwar. Ti annan en *Joint Marketing Agreement* ant *Kenya Airways*, i sipoze avek *Seychelles Tourism Board*.

Mwan mon'n vin Minis Touris i annan 2an pase. Ler mon'n vini in napa dan mon *brief*, ki i annan okenn naryen ki pe arive, ki ti'n arive ant *Kenya Airways* avek *Seychelles Tourism*.

Le pwen ki mon pe fer sorti Mr Speaker, se ki si nou pa pouse - si napa en sistenm pou fer sir ki keksoz i bouze, keksoz i ganny disparet i ganny volatize. Dimoun i oublie. Ki nou, nou pe fer? I annan sa 10 Lagreman ki nou'n sinyen, ki

mwan mon menm mon'n sinyen pandan sa vizit Kenya.

Ki nou'n fer? Nou'n demann Kenya pou donn nou pou sak sa bann *item*, sa bann Lagreman, donn nou en pwen fokal dan sa bann Lazans, sa bann Minister.

E nou osi lo nou kote nou annan en pwen fokal ki baze dan sa Minister responsab. En mannyer ki nou kapab annan en kominikasyon direk. E *Foreign Affairs* li i la pou fer sir ki keksoz i bouze. Vwala kot nou ete. Nou dan sa travay la. E mon annan tou konfidan ki metod ki nou'n met an plas la i pou marse.

Ki nou kapab en dat tre prosen mon kapab retournen. E donn Onorab en *update* kote nou ete. Me ki mon le asir li se ki program ki nou'n met an plas striktir ki nou'n met an plas i donn mon konfyans ki nou pou *achieve* keksoz.

I annan en dezyenm parti kestyon. Lo kou vizit Deta Prezidan Kenya. E petet komanse mon ava fer en remark pou mon dir ki petet mon larepons mon pou dezapwent serten.

Me apre mon le osi partaz en sekre avek Lasanble e avek lepep Seselwa deor. Sa dezapwentman ki serten

dimoun i kapab gannyen, se i lye avek kou sa vizit.

Kou sa vizit i pa'n arive R10 milyon. I bokou, bokou mwens ki sa. E mon ava vin lo la. Sekre ki mon le partaze se ki annan en vizit Deta Sesel i pa en lenvansyon sa ladministrasyon ki la. I pa en lenvansyon Prezidan Ramkalawan. I pa en lenvansyon Sylvestre Radegonde.

Tradisyonnelman, dan Relasyon Enternasyonal, dan Diplomasi, i toultan annan lesanz vizit a plizyer nivo. Sesel i resevwar vizit a tou nivo. Bann zofisyè, i annan ki dan lapres, i annan ki pa dan lapres.

Lesanz Anbasader. Lesanz Minis. Me i osi swiv ki i annan lesanz vizit Sef Deta. Enn i envit kanmarad, apre lot i dir be ou osi vin en kou kot mwan. Sa tou pei i fer. E nou ki ase, ki annan en laz ki ava kapab rappel, depi ler nou'n endepandan in toultan leka avek tou sa bann Prezidan siksesivman ki'n okip *State House*.

So vizit Prezidan Kenyatta, 2an apre ladministrasyon in an plas, i napa naryen drol e eksepsyonnel. Mon ava donn zis en legzanp bann vizit, an ka ki nou'n oubliye, ki ti annan

vizit Sesel par Sef Deta avan sa ladministrasyon ti vini.

Mon ava zis pran sa 2 ladministrasyon dernyen avan ler ladministrasyon Prezidan Ramkalawan.

An 2007 anba ladministrasyon Prezidan Michel - Prezidan Sinwan, Prezidan Hu Jintao ti vini lo en vizit Deta.

An 2008 ti annan en vizit par Mr Wu Bangguo ki Chairman *NPC Standing Committee* Parti Kominis Sinwan.

An 2010 ti annan vizit Sekreter Zeneral *Commonwealth*, Mr Sharma.

An 2011, ti annan vizit Mr Jakarta Kiwete Prezidan *Tanzanie*.

Osi an 2011 an Out ti annan vizit Mohamed Nasheed, Prezidan *Maldives*.

An 2012 ti annan vizit Mr Devinsingh Patil ki ti Prezidan Lenn sa letan.

An 2013 ti annan vizit Mr Rajapaksa ki ti Prezidan *Sri Lanka*.

An 2014 ti annan vizit Prezidan *Cabo Verde*. Osi an 2014 Prezidan *Sri Lanka* ti retourn ankor an Zen.

An 2015 ti annan vizit Prezidan Palau. E osi an 2015 ti annan vizit Premye Minis Modi, Premye Minis Lenn.

An 2016 ti annan vizit Sekreter Zeneral Nasyon Ini. Sa ti anba ladministrasyon Prezidan Michel.

Anba ladministrasyon Prezidan Faure. An 2018 ti annan 1, 2, 3, 4 vizit.

Ti annan vizit *López Acea*, i Vis- Prezidan *Cuba*. Ti annan osi vizit Mr Masisi Prezidan *Botswana*.

Ti annan vizit m Sekreter Zeneral *Commonwealth Mrs Patricia Scotland*.

Ti annan vizit Mr Sirisena, Prezidan Sri Lanka. Ti annan vizit an 2019. Vizit Premye Minis St Vincent

E an, pardon. 2019 ti annan vizit Mr Solih, Prezidan *Maldives*.

Bon anba Ladministrasyon Prezidan Faure, konbyen en legzanp. Ti annan 1, 2, 3, 4, 5, 6 vizit ofisyel vizit Deta.

Napa naryen mal. Mwan pou mon sa i pa sok mwan. I pa sa kantite. Le pwen ki mon pe fer sorti se ki i en norm normal enternasyonal. Vizit Kenya osi i tonm ladan. Zis pou mon fer rapel osi, vizit Kenya ti en vizit retour. Ki ler Prezidan Faure ti al vizit Kenya an 2017, koman in ganny fer dan sa bann diplomasi, sa pei ki resevwar, or sa pei ki ganny resevwar, i dir

ou be ou osi vin en kou kot mwan.

In pran 5an pou Prezidan Kenyatta finalman aksepte sa lenvitasyon, ki ler Prezidan Ramkalawan ti vini ti renouvle pou li.

Prensipalman ti annan rezon *COVID* e lezot lanpesman. Me nou kontan ki sa vizit retour, ki ti en vizit retour in ganny fer. Konbyen in koute? Pou premye fwa pou en vizit sa nivo, tou bann depans in ganny santralize par kot *Foreign Affairs*.

E nou'n kapab annan en *overview* lo kwa ki pe depanse. Dan lepase sak *agency* ki *involve* dan vizit zot pey sakenn zot *Bill*. Lapolis i pey pou li. Larme i pey pou li. Lot i peye ensidswit. Safwasi pou premye fwa nou'n kapab santralize. E nou konnen egzaktaman kwa ki'n koute. Kwa ki'n peye.

E sonm ki nou'n negosye, ki nou peye final. Napa okenn *invoice* ki reste pou peye, i R2milyon 56 mil 808 e 28 sou.

Mon repete. R2milyon 56 mil 808, 28 sou. I annan detay kwa ki'n koute pou transportasyon. Kwa ki'n koute pou loospitalite ki nou donnen, *entertainment* ensidswit. Ki mon kapab partaz avek Lasanble. Mon remerisi ou Mr Speaker.

MR SPEAKER

Mersi Minis. Bon nou a pran serten kestyon bann lezot Manm, avan nou pas lo siplemanter Onorab *Leader* Lopoziyon.

Pou letan ki nou annan mon ava demann Onorab Paul Ernesta pou met son kestyon.

HON PAUL ERNESTA

Mersi Mr Speaker. Mr Speaker, Minis ek ou delegasyon, mon bann koleg Onorab e tou dimoun a lekout, bonzour. Mr Speaker, letan mon'n ekout Minis, in donn nou en kontrandi tou bann vizit ki'n pase dan lepase anba ladministrasyon avan. Ki korek sa.

Me sa kestyon ozordi ki'n ganny soumet, se ki sityasyon ekonomik - sityasyon ki nou pep pe fer fas avek i pa moman ideal pou kapab annan en tel kalite vizit. Se sa nou konsern.

Kot nou pe vwar ozordi pri lavi pe kontinyen ...

MR SPEAKER

Onorab eskiz mwan. Onorab ou pou al dan en largiman avek Minis lo zistifikasyon sa vizit. Mon fer ou kler si ou annan. Ekout mwan Onorab.

Mon fer ou kler si ou pou fer ou *opening statement* pou

ou kestyon ki pou entrodwir ou kestyon, ou fer li kourt e ou prosed pou ou kestyon silvouple.

HON PAUL ERNESTA

Mersi Mr Speaker. Mr Speaker, avek tou sa bann konsern ki nou pep pe fer fas avek. Avek tou sa bann soufrans ki nou pep i ladan ozordi,

Eski Minis i vwar li neserer or i vwar Seselwa koman son priyorite son Gouvernman ozordi dan sa pei? Mersi Mr Speaker.

MR SPEAKER

Mersi Onorab. Minis ou ti ava kontan adres sa kestyon?

MINISTER SYLVESTRE RADEGONDE

Mr Speaker mersi. Mon remersye Onorab pou son kestyon. Mr Speaker, mon pa oule paret ki Gouvernman, mwan nou pa konsyan difikilte ki nou dimoun pe pas ladan ozordi.

Nou tou nou pe viv dan sa pei. Konesans ki problem nou dimoun pe pase i pa en drwa ki avek en parti ouswa serten endividyel plis ki en lot. Nou tou nou konnen, lavi i difisil pou en kantite dimoun. Byensir.

An menm tan i annan serten keksoz dan lavi ki

bezwen bouze. Napa naryen okenn sa larzan ki nou'n koupe dan en kek program ki Gouvernman i annan, ki si ou le in *deprive* en serten kous lasosyete, pou ganny larzan pou pey pou sa vizit.

Bidze pou sa vizit i en Bidze apar. Lavi i kontinyen. Parske si ou dir mon aköz problem ki nou annan ozordi, nou bezwen pa annan vizit. Annou osi ferm Lasanble Nasyonal. Nou tou annan al dan lakour. Parske sa i pou sov en kantite larzan lo elektrisite, lo lapey, lo *air-condition* ensidswit.

So lavi i kontinyen. Nou pa kapab met lakle lo laport e zis ale. Mersi Mr Speaker.

MR SPEAKER

Mersi Minis. Onorab Loze ou kestyon.

HON JOHAN LOZE

Mersi Mr Speaker. Mr Speaker, mon annan 2 kestyon tre kourt. Minis in sit nou en bal 2 milyon ki zot in donneren pou bann *invoiced*.

E mon premye kestyon se eski tou keksoz in ganny *invoiced*? Ouswa i annan bann keksoz labitid par egzantp *IDC* in abzorb son *cost* li menm. Pa ti sarze nou pa konnen konbyen avyon in arive.

Eski i annan bann *hidden invisible non-invoice cost* parey zot labitid ki pa'n antre dan sa bal 2 milyon ki zot in donneren?

Mon dezyenm kestyon Mr Speaker. An rekonesan ki mon Prezidan in deklar pei en kales kase. An rekonesan sa. E mwan mon prezimen ki Prezidan i konnen ki i pe koz lo la ler i deklar pei en kales kase.

Dan en kales kase zot, zot pe donn en bal R2milyon. E Minis la i dir nou koumsa tenny lalimyer *move on*. Minis sa 2 milyon la ki zot in gaspiye, Seselwa pe deza ganny dir *move on*.

Peser Roche Caiman in ganny dir *move on*. La lo *Playground* in ganny dir *move on*. Eski Mini an tout bon konsyans ou kapab dir lepep Seselwa - (Wi les mon Onorab Henrie)! - ki sa larzan, sa 2 milyon ki zot in donn bal ladan, in byen depanse pou benefisyè Seselwa? Mersi Mr Speaker.

MR SPEAKER

Mersi. Minis ou repons silvouple.

MINISTER SYLVESTRE RADEGONDE

Mersi Mr Speaker. Mon remerci Onorab pou son kestyon. Onorab mwan mon kapab fer komanter lo *invoice* ki nou'n

gannyan an rezilta bann negosyasyon pri ki nou'n fer.

Mon pa kapab devinen ki si kekpar i annan kek dimoun ki pa'n *Bill* nou, ki pa'n *invoice*. Tou det ki asosye, det ki asosye avek sa vizit, tou nou'n ganny *invoice*. Tou nou'n peye. I ariv 2milyon. Pa 20milyon parey mon ti tande ti annan.

Regard mwan, ou dezyenm pwen Onorab ki ou fer. Wi dimoun i annan problem. Byensir i annan problem. Nou konnen i annan problem. E parey pwen ki mon'n fer, sa larzan i pa pe sorti dan okenn program ki pou *deprive* dimoun sekirite sosyal, lasante, ledikasyon ensidswit.

I en Bidze apar parey tou lezot striktir Bidze i annan. Mersi Mr Speaker.

MR SPEAKER

Mersi Minis. Onorab Henrie.

HON GERVAIS HENRIE

Mersi Mr Speaker. Bonzour tou dimoun. Mr Speaker, premyerman mon ti ava kontan si Minis i konfirman ki letan i annan bann vizit parey, i annan bann retonbe ki pei an zeneral i benefisye an traver bann *networking* ki nou fer?

Par egzanp letan Dirizan Lopoziyon i zwenn Prezidan Kenyatta dan sa menm vizit ki

zot pe konplent, eski i annan bann retonbe ki pei enkli Lopoziyon i benefisye?

E dezyenmman, Minis in dir ek nou poudir i annan plizyer sa bann lesanz, *MOUs* mon ava apel li. Ki Sesel avek lezot pei in sinyen dan lepase ki pa'n abouti dan gran keksoz.

Zis par egzanp sa ki mon'n kapab trouve ant 2015 a 2018 par egzanp mon'n vwar Sesel in siny bann Lagreman avek Lasin, Malta, *Maldives*, *Botswana* e Lenn.

Eski alor sa ladministrasyon i kapab pran li koman en priyorite pou fer en swivi zisteman lo sa bann Lagreman? E pou asire ki nou pa perdi. Akoz lentansyon orizinalman se te ki i annan en lesanz ant Sesel e sa bann pei ki le 2 Nasyon i kapab benefisye. Mersi.

MR SPEAKER

Mersi Onorab. Minis ou repons silvouple.

MINISTER SYLVESTRE RADEGONDE

Mr Speaker mersi. Mersi Onorab pou ou kestyon. Wi mon ava dir, re afirmen, konfirman ki sa bann vizit byensir i fer dan en kad. E lobzektif se ki *ultimately* Sesel i gannyan ladan. I pa en vizit zis

vini dimoun vin papiyonnen apre ale.

Dan ka Kenya spesifik, nou'n siny sa 10 Lakor ki nou pe swiv. I dan domenn korperasyon defans. Pou gete ki mannyer sipor zot kapab donn nou avek nou Lafors Defans. Korperasyon dan Sekter Lekonomi Ble, ki tre enportan pou nou.

Laranzman, *understanding*, Lakor dan *Mutual Legal Assistance*. Dan posibilite kot si i annan nesesite esanz prizonnyen ant nou 2 pei.

Korperasyon dan spor. Tre enportan pou nou zenn.

Korperasyon dan lagrikiltir. *Livestock* e korperativ.

Korperasyon dan lape, sekirite, *Law Enforcement*.

Korperasyon dan *combatting crime*.

Korperasyon dan devlopman touris.

Korperasyon dan zafer maritim.

Korperasyon dan *gender equality*. Balans bann zonm, madanm.

Vwala. Tousala i bann domenn ki enportan pou Sesel. E si nou seryezman parey nou pe fer, nou enplimant tou sa ki'n mete dan sa bann Lakor vreman serye, Sesel i kapab benefisye en kantite parey dan

bann lezot Lakor ki ler nou pouse i arive. Mersi Mr Speaker.

MR SPEAKER

Mersi Minis. Mon pran kestyon 2 Manm ankor ki'n lev lanmen. Onorab Gabriel e apre Onorab Labrosse.

HON CONRAD GABRIEL

Mersi Mr Speaker. Dabor mon dir bonzour tou dimoun a lekout. Spesyalman zabitan Point Larue. Mon *welcome* Minis ek son *panel*. Minis nou'n ekout ou atantivman. Ou'n fer en parkour depi 2007 vizit ki'n ganny fer, ziske la.

Petet mon ti ava kontan konnen si Sesel in benefisye en bon pe avek serten sa bann vizit? Ou pa'n nonm nou. Zis ou'n dir nou Gouvernman avan in fer sa, sa, sa. Nou dakor.

Apre, dezyenmman, Mr Faure ou dir pa'n materyaliz naryen dan Lakor ki'n sinyen 2017.

Me solman par kont mon sorti en vizit Sidafrik pou lenformasyon, mon lo Komite *Blue Economy*, Lagrikiltir lot, lot ensidswit.

Sesel zot pe koz lo nou Afriken. Mon panse ti ava bon nou onnet dir poudir Sesel in akonplir en ta keksoz. En bon pe. Silvouple annou et fran ek

sa pep, sa Nasyon. Annou pa zis tras en portre *as if* Gouvernman avan in fer en ta keksoz ki pa'n benefisyé pei.

So dan konteks ki, mon pe vini Mr Speaker.

MR SPEAKER

En moman Onorab. Mon le adres Onorab Pillay. Silvouple aret fer remark pou lot kote latab. Mon ava demann ou silvouple ou konprenezon.

Onorab Gabriel ou kestyon?

HON CONRAD GABRIEL

Minis ou'n dir nou ou'n siny 10 Lagreman dernyen er la. Nou ti ava kontan zis ou asir avek pep Seselwa, petet eski nou pou war son retonbe? Ki nou pou benefisyé sa pep la deor? Mersi.

MR SPEAKER

Mersi Onorab Gabriel. Minis ou repons silvouple.

MINISTER SYLVESTRE RADEGONDE

Mersi Mr Speaker. Mersi Onorab pou ou kestyon. E Petet Mr Speaker ou ava permet mon zis pou mwan re klarifye.

Lefe ki mon donn lalis sa bann vizit e mon'n fer kler ki pa pou mwan kritik vizit. Mon pwen se vizit ant bann pei a nivo Sef Deta parey lezot nivo i

enportan. E le pwen ki mon ti pe fer i se ki napa naryen nouvo. Sa bann vizit in arive. Nou problemm avek bann Lakor dan lepase.

Parey dan nou bann travay bann nou ki dan Gouvernman, mwan mon war sa toulezour. Se ki lanter sa dousman, sa trenn lipye pou fer keksoz bouze.

Mon pa oule a okenn moman met blanm lo Prezidan Faure, ouswa lo Prezidan entel. Mwan mon'n en Anbasader anba Prezidan Faure. Mon pa kapab ozordi vini dir, sa ki mon pe soz, mon pe konstate. Mon pe fer en pwen ki nou tou nou konnen.

Si ou pa pouse, si ou pa met dife anba talon toulezour, si ou pa dominer keksoz pa bouze.

E se sa tou sa bann diskisyon ki'n arive. En kantite diskisyon Prezidan Faure in fer avek Prezidan Kenya, ler i ti al Kenya. Me napa naryen. Ozordi mon konstate ki napa naryen ki'n bouze. E sa mon dir avek sa bann *MOUs* nou'n met en nouvo metod travay, en nouvo lankadreman. Akoz nou'n aprann sa bann lesan pou fer sir ki sa i pa arive.

30 zour i tro pti gin pou mwan dir be vwala, Korperasyon dan defans vwala i

arrive. *Livestock* vwala. 35 zour travay i pti gin.

Mwan mon dir nou'n met lankadreman pou nou fer sir ki delivre. Wi Onorab pou annan retonbe. Mon asire pou annan retonbe. Sirtou si nou kontinyen lo sa larout ki nou pe fer la. Mersi.

MR SPEAKER

Mersi Minis. Onorab Labrosse ou kestyon.

HON RICHARD LABROSSE

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou dimoun ki a lekout. Minis mon kestyon i 2 pri kestyon kekfwa mon ti pe rod en pe lenformasyon.

Premye i ler mon pe ekout vizit ki'n ganny fer la resaman par ansyen Prezidan Kenya, ek sa enn ki ti fer 2017 or 2018. Si ou ti kapab donn nou en konparezon pri avek la ozordi?

Aprè mon dezyenm kestyon ki mon pe mazin, kekfwa ankor enn fwa pou lenformasyon piblik.

Par egzanp ou'n dir i bann, pandan vizit 2015 or 2018 ki ti fer Kenya, bann Lagreman ki'n ganny sinyen laba napa naryen ki'n bouze.

So koman en pei konmsi ki manner Gouvernman, I

mean Foreign Affairs zot menm zot sivre sa bann keksoz? E ki arrive apre si parey *tax payers money* in ganny peye pou al en vizit deor apre naryen pa ganny fer? Konmsi ki arrive avek sa prezan? Mersi.

MR SPEAKER

Mersi. Minis ou repons.

MINISTER SYLVESTRE RADEGONDE

Eskiz mwan Mr Speaker, mon pa'n ganny premye kestyon Onorab.

HON RICHARD LABROSSE

Ok Minis wi nou ti pe dir *costly* ant konparezon ant vizit 2015, 2017 ki ti fer Kenya ant sa enn ki ti fer isi, son pri konmsi, konparezon?

Sa 2 pri. Konbyen ti kout pei?

MR SPEAKER

Mersi. Konparezon an term - ? Mon pou napa sa sif konbyen in koute pou nou delegasyon in al Kenya. Mon pa pou kapab dir ou. Sa ki mon konnen- Non, nou pou napa sa *figure* a sa pwen. Me nou kapab fouye. Me la i pou en zafer al get avek tou bann *Agency*.

MR SPEAKER

Mersi Minis. Ou annan en repons son dezyenm pwen?

MINISTER SYLVESTRE RADEGONDE

Dezyenm pwen, ki pou arive? Regarde, nou striktir ki an plas nou le i marse. E *PS* i konnen tre byen lenstriksyon ki li in gannyen pou nou delivre lo a bann *MOUs* ki'n ganny sinyen.

I pa kapab zis en papye nou sinyen, gran diskour, tir portre televizyon ensidswit. Apre ale. I bezwen annan en keksoz. Akoz sa i bann vizit wi. R2 milyon, i 2 milyon ki'n kout pei. E fodre ki i annan retour lo sa lenvestisman.

Sak sou ki nou depanse nou bezwen fer sir ki i annan en *return* lo la. E *return* ou pou trouve pa fer sir ki *the word, the spirit* sa bann Lagreman i ganny met an aplikasyon.

Donk parey mon dir, i annan sa *framework* ki nou'n mete. E *PS* in komans en seri *meeting*. Sa depi avan kestyon ti vini. In komans en seri *meeting* avek ou bann *sector review*, avek bann diferan Minister, pou asiz avek zot pou fer sir ki nou gannyen en rezilta.

E o fet sak sa bann Minister, lazans ki responsab. Zot in ganny ziska lafen Septanm pou zot dir nou zot plandaksyon. Kan mannyer zot

pou enplimant sa bann *MOUs* ki tonm anba zot. Mersi.

MR SPEAKER

Mersi Minis. Nou ava pran prezan kestyon siplemanter *Leader* Lopozisyon.

HON SEBASTIEN PILLAY

Mersi pou bann larepons ki ou'n donner Minis. Mon ti ava kontan ganny serten presizyon lo serten larepons ki ou'n donner.

Premyerman Minis mon pa kapab koz pou Lopozisyon avan ki pa'n demann kestyon Gouvernman avan lo bann depans ki ti fer.

Mwan mon kapab koz pou mwan. Mon la ozordi, mon pou kestyonn Gouvernman lo sa bann depans ki i fer. Sa i mon louvraz e mon pran sa. Mon dezapwente avek sa komanter ki nou pou tenny Lasanble Nasyonal. Petet Gouvernman pa kontan sa bann kestyon.

Me i bezwen ganny demande kantmenm. Prezan mon vin lo sa ki mon ti ava kontan klarifye avek ou. Ler ou'n donn nou sa depans ki'n ganny fer pou sa vizit. E ou'n dir nou in ariv bokou pli mwens ki 20 milyon.

Mon pa'n zanmen dir 20milyon. Ou'n dir nou in ariv

R2milyon. E nou'n demann ou pou klarifye si i annan lezot kou ki asosye ek a vizit ki pa'n ganny *invoiced*.

E ou'n dir nou ou'n pey zis bann ki'n *invoiced*. Ou pa pe *deny* ki napa lezot kou ki pa'n ganny *invoiced*.

Ou pe dir nou ou'n pey bann ki'n ganny *invoiced*. Savedir ou pe konfirman ki i annan bann kou ki pa'n ganny *invoiced* an traver sa vizit.

Prezan kestyon ki vini avek sa sityasyon se, eski Gouvernman dizour ozordi ki'n pres latransparans, ki'n pres bonn governans, i dan biznes fer bann tranzaksyon oubyen pran bann lapros pou kot i annan bann kou ki pa ganny *invoiced* pou Gouvernman?

E eski ou krwar Minis sa i en bon pratik pou Gouvernman fer dan lesans ki nou devret fer sir ki nou *accountable* avek larzan piblik dan lafason ki ganny depanse?

Par egzamp nou'n tann resaman Prezidan in servi en *Private Jet* pou al en landrwa. Mon pe al dan laliny ki nou bezwen annan en latransparans dan nou pei ki dimoun i konnen kwa ki pe pase.

Dezyenmman *Minister*, ler ou'n nom mon tou bann vizit avan ki'n pase - mon ti ava

kontan avek tou respe ki mon annan - mon annan en gran respe pou ou Minis.

Ou en dimoun ki mon'n konn ou e mon'n respe ou pandan plizyer lannen. E mon'n travay avek ou parante. E mon bezwen dir poudir respe i reste respe, pou ou kontribisyon ki ou'n fer. E sa pa pou zanmen ale.

Me selman mon dezapwente ler mon demann ou kestyon lo ou Gouvernman ozordi, ki ou pe fer, e ou reponn mon kestyon lo Gouvernman avan. Pep Seselwa pa'n vote pou Gouvernman avan. In vot pou en Gouvernman *LDS* ozordi ki pa pe performen.

E se sa rezon aköz nou bezwen demann sa bann kestyon, pou nou klarifye ki pe arive avek sa bann vizit. Ou'n dir nou 35 zour i tro pti git letan. Alors dan konbyen letan ki ou panse avek ou gran leksperyans ki ou annan, ki ou pou kapab vin devan Lasanble e donn nou en kontrandi lo sa bann lesanz ki sipoze annan?

Aköz nou tou nou konnen poudir nou fer en ta depans lo Mr Kenyatta. In sorti koman Prezidan. Kandida ki i ti pe siporte pa'n ganny reelekte, pa'n ganny elekte Kenya. I annan en lot Prezidan. So nou ti ava kontan konnen kan eski ou

pou kapab vin devan Lasanble e dir nou kote sa bann keksoz i ete?

E mon dernyen kestyon Mr Speaker. Gouvernman i dir nou i pe ekout pep Seselwa. E nou, nou konsern i vizavi fer sa depans dan sa letan ekonomik ki nou ladan. Ou dir nou pe ekout Seselwa. Be ou pa pe ekout Seselwa kot *Box to Box*? Ou pa pe ekout Seselwa laba? Ou pa kout Seselwa an ski konsern trezyenm mwan saler?

So, Minis sa kestyon pa vize ver ou personnelman. Me i vize ver Gouvernman.

MR SPEAKER

Ou le retourn lo ou kestyon orizinal Onorab. Vizit Prezidan Kenyatta. Mersi.

Ale silvouple *order*. Yes, Onorab terminen *please*.

HON SEBASTIEN PILLAY

Mersi mon ava terminen. Mon kestyon i tre senp Minis, Si ou dir mon ou Gouvernman pe ekout Seselwa, Gouvernman pe tann sa ki Seselwa pe dir. Eski senserman ou krwar ki pandan sa moman ekonomik ki nou ladan, kot nou pe koz lo sakrifis ki Seselwa i bezwen fer.

Kot nou pe koz lo goute ki nou bezwen rod *sponsor* pou donn zanfandan lekol. Eski ou

krwar poudir ti nesese fer sa lekstravagans ek sa vizit?

E dezyenmman, pli enportan ki mon ti ava kontan klarifye avek ou, la nou'n tande poudir pou al annan *cocktail State House* pou en lot vizit Deta.

Eski ou krwar ki pandan sa letan Gouvernman li menm, latet Gouvernman pa devret pe montre serten restren e solidarite avek lepep Seselwa pou bann kondisyon ki nou pe pas ladan ziska ler nou lekonomi i ava rebran?

Mersi Mr Speaker.

MR SPEAKER

Mersi. Minis ou annan 3 kestyon la. Si ou'n note silvouple.

MINISTER SYLVESTRE RADEGONDE

Mr Speaker, mon remersye ou, mon remersye Onorab pou son kestyon. Mon ava pran sa enn dernyen. Mon ava komans par sa enn dernyen. Onorab i koz lo lekstravagans.

Mwan personnelman mon pa war lekstravagans *at all*. Menm dan sa vizit Deta Kenya napa lekstravagans. Si Onorab i konnen ki kantite sere, koupe pou rode pou fer sir ki ou bezwen resevwar en Sef Deta.

Akord li en *minimum* kourtwazi e fer li lo parey Angle i dir en '*shoe string*'. Koup isi, koup laba - koupe, koupe.

Mon kapab reasir Onorab ki napa lekstravagans dan okenn aktivite ki fer. An tou ka tan ki sa bann vizit, tan ki sa bann depans i tonm anba mon Minister, mon garanti ou pou napa lekstravagans.

Tou i ganny kontrole. Tou i ganny negosye. E kot nou pa kapab fer, nou pa fer.

Me i annan serten *basic* ki ou bezwen. En Sef Deta i vini i pou bezwen annan en Gard Doner. Avan ti fer *Airport* apre ti fer dan zarden *State House*. Nou'n retourn *Airport*. I bezwen annan en Gard Doner. Ou bezwen zwe Lim Nasyonal, pou zwe Lim Nasyonal ou bezwen en benn. Amwen ou fer *playback*.

Ou bezwen karpèt rouz. Donk i annan bann keksoz elemanter ki ou pou bezwen ladan. E apre lezot nou koupe. Par egzanp nou ti ava voudre - mwan personelman koman en Digwa, mon ti oule ki Prezidan Kenyatta i al La Digue.

Me ler nou regarde ki pri, ki mannyer pou koute. Nou dir be bon La Digue nou ava tir li dan program, nou ava kit li Praslin. So nou fer sa bann legzersis. Nesesite sa vizit Prezidan Kenyatta, ou kestyon

si ti nesese? Wi, i ti nesese. Wi ti nesese. A re fer nou ti pou re fer li.

Lo *invoice*. Onorab ou kestyon mon krwar i swiv en pti pe sa ki Onorab Loze in demande avan. Mwan mon kapab selman fer lo komanter, fer komanter lo *Bill invoice* ki nou gannyen pou servis ki nou'n ganny donner.

Mon pa kapab mazine si i annan ti pou donner, pa ti pou donner. Mon pe koz lo sa ki'n koute pou Gouvernman lo sa ki mon konnen.

Sa ki mon konnen ozordi lo tou sa *Bill* ki mon kapab partaz avek ou *breakdown* bann diferan *cost*. *Caterers*, loto lwe, lotel, ensidwit, *Air Seychelles*, mon kapab partaz avek ou sa ki mwan mon konnen.

E osi lontan ki mwan mon okouran, e Sef Protokol ki la ki'n kordin sa zafer, i a konfirman ki napa okenn naryen kasyet deryer ki nou ti pou gannyen nou pa'n gannyen.

Lo *update timeline*. Dan sa bann Lakor i en Lakor Bilateral ant 2 pei. *It takes two to tango*. Nou, nou konnen ki nou annan pou fer. Nou'n met nou striktir an plas kot nou. Nou pe pous nou bann diferan

MDAs pou fer sir ki Lakor i bouze.

Nou'n demann Kenya pou donn nou en *focal point*. Sa bann striktir in ganny met an plas. Ki pli vit ouswa ki vit, ki dousman. Lot kote nou partner Kenya i bouze. Sa nou pou napa en kontrol lo la.

Nou ki nou kapab fer, parey avek tou lezot partner. Mon dir ou i annan serten dosye ki la depi ladministrasyon avan, ki ou eseye. Pa lafot neserman Sesel souvan. I lafot nou partner a leksteryer ki pa bouze parey zot devret bouze, osi vit zot bouze.

Ki ou kapab fer, se anvoy *reminder*. Lev telefonn, *escalate*. Mwan a mon nivo *escalation* se mon *counterpart* Minis Zafer Etranzer. Lo sa ki konsern Kenya. Sa Minis zafer Etranzer ki ti dan delegasyon ki mon konn li tre byen, in nepli Minis prezan.

I en zafer prezan osito ki posib ki sa nouvo Gouvernman i ganny apwente. Mon fer en pti sote *Nairobi* pou mwan rankont mon *counterpart*.

Pou nou fer sir kot nou annan en laport ki ouver. Pou nou pous sa bann Lakor. So, ki pli vit ki mon kapab retournen pou mon donn en *update*? *How long is the string*? Mon espere ki mon ava kapab osito ki posib.

Se tou ki mon kapab dir ou Onorab. Osito ki posib vini donn en *update*. Si mon pa vini atraver en let kot Lasanble, dir vwala kot nou ete lo bann diferan proze. Mersi.

MR SPEAKER

Mersi Minis. Bon nou'n ariv a lafen sa keston *Private Notice Question*.

Mon remerisye Minis pou son prezans e son bann repons. E son delegasyon pou zot sipor.

Mon ava envit zot fer zot depar. Mersi Minis e bonn zournen.

(MINISTER RADEGONDE AND HIS DELEGATION WAS EXCUSED FROM THE HOUSE)

MR SPEAKER

Mon pou gard ankor en pti pe latansyon lo *COVID*. Nou ava pran en pti poz *sanitizing*.

(technical break)

MR SPEAKER

Bon bonzour e byenveni Mins pou Lanplwa e Zafer Sosyal, Mrs Patricia Francourt. E delegasyon Ms Brenda Morin, *CEO Agency Social Protection*. E Mrs Juliana Augustin, *Head of Compliance Agency Social Protection*.

Mersi Minis ek ou delegasyon pou zot prezans pou kestyon. Nou pas lo kestyon ki lo nou *Order Paper*.

A wi mon annan 2 kestyon. Kestyon 121 ek 122 i tou lede i lo *carer*. E mon ti annan en parol avek Minis avan sa, pou nou pran tou lede kestyon ansanm.

Akoz evidaman lenformasyon ki ganny demande i konplemanter pou tou lede kestyon, e pou bokou pli ekonomik pran sa 2 kestyon ansanm. Alor mon pou demann Onorab Uranie poz son kestyon e Onorab Ernesta apre. Onorab Uranie.

HON ROCKY URANIE

Mersi Mr Speaker. Bonzour Minis avek ou delegasyon. Bonzour tou koleg Onorab. E en bonzour spesyal tou Digwa ki a lekout.

Swivan konplent sorti kot bann *carer* ki dir zot ganny difikilte pour ganny en dimoun pour ranplas zot ler zot konze in *due*, e an rezilta sa sityasyon zot perdi zot konze e zot pa ganny peye.

Ki provizyon nesaser ki ou Minister pe fer pou asire ki bann *carer* pa perdi zot konze oubyen zot ganny peye zot konze?

Mon dezyenm kestyon: - Lekel ki responsab pour rod en nouvo *carer* pou en dimoun aze ler enn ki ti deza pe travay i arete?

Mersi Mr Chair.

MR SPEAKER

Mersi. Dezyenm kestyon lo *carer* Onorab Paul Ernesta.

HON PAUL ERNESTA

Mersi Mr Speaker. Minis ek ou delegasyon bonzour. Mon kestyon i *comme* swivan: -

An vi difikilte ki bann paran e lezot manm fanmir ki *carer* avek zot zanfanki annan dezabilite, ouswa bezwen serten latansyon spesyal pe rankontre pour zot pran konze, eski Minis i kapab dir ek sa Lasanble: -

a) Ki prosedir ki annan an plas pou sa bann tel group pran zot konze?

b) Si son Minister i annan plan pou revwar sa prosedir pou fer li pli pratik pou sa group benefisye?

Mersi Mr Speaker.

MR SPEAKER

Mersi. Minis parey nou'n dir ou annan lenformasyon lo *carer* e sirtou santre lo prosedir pou konze. Ou repons silvouple.

MINISTER PATRICIA FRANCOURT

Bonzour Mr Speaker, *Leader of Government Business, Leader Lopoziyon*, tou bann Manm Onorab, e osi tou dimoun ki a lekout.

Mr Speaker, si ou ti ava permet mwan mon osi mon ti ava swete pas mon kondoleans avek tou bann lafanmir ki'n perdi en dimoun, en manm fanmir sa semenn. *Particularly* sirtou bann zenn.

E mon'n senpati, solidarite e lapriyer i avek zot. E mon Minister i reste toultan on *standby* angaze pou siport lafanmir. Mersi Mr Speaker.

Mr Speaker, pou komanse mon ti pou kontan premyerman donn en pti *background* lenformasyon lo sa Servis *Homecare*.

Parey zot deza okouran sa *Scheme* swen *care* kot lakour ti ganny etabli an 1987. Ki ti fer li posib pou bann endividi ki bezwen swen e lasistans. Reste kot zot lakour olye al dan bann lenstitisyon parey rezidans pou bann dimoun aze.

Sa *Scheme* ki'n an fors pou plizyer lannen. In permet ki swen i ganny donner anver bann ki pli vilnerab dan sosyete. Lazans Proteksyon Sosyal i administre sa *Scheme* e i responsab pou donn en *allowance* tou bann *home*

carers ki kalifye anba sa *Scheme*.

Sa *allowance* i an prensip en lasistans sosyal ki ganny peye avek sa *home carer* lo lapar sa resipyan. Rol *ASP* alors se pou asire ki premyerman en *means test* ganny fer an relasyon ek bann ki fer aplikasyon pou benefisyen anba sa *Scheme*.

Dezyenmman, anrezistre ban *home cares* ki sa resipyan li menm in idantifye.

Trwazyenmman, pey sa bann *home carers* sa *allowance*.

E katriyenmman, egzers en serten degre sipervizyon lo bann *home carers*.

Anmezir ki sa *Scheme* in evolye pandan bann lannen, konze anyel in ganny azoute dan sa *Scheme*. Bi e lobzektif prensipal pou sa ti pou asire ki lasante mantal e fizik bann *home carer* i ganny proteze.

Fer sir ki zot ganny letan pou resarz zot batri parey nou dir. E an retour kontinyen donn pli bon swen bann resipyan ki zot okipe.

Pandan ki sa pe arive *ASP* i pey kou pou sa *carer* al son konze anyel. Olye repoz sa responsabilite lo sa resipyan, la *ASP* i asire en *allowance* i ganny donner avek sa *carer*, ki pou ranplas sa enn ki pou al konze.

Ankor enn fwa, sa i ganny fer koman en garanti ki sa resipyan i kontinyen resevwar swen pandan ki son *carer* i dan konze.

Sa i en keksoz vreman enportan. Ziska Septanm 2021 *home carers* ti kapab akimil zot konze anyel. E si en *carer* pa ti'n pran konze, son lannen presedan oubyen i ti'n nepli *carer* avek en resipyan pou en rezon ou en lot, baze lo son prop diskresyon *ASP* ti kapab pey sa *carer* sa *allowance* ki relye avek son konze anyel ki pa ti'n ganny pran.

Mr Speaker, pou bann bon rezon ki zistifyab, sa Polisi ti ganny amande an Septanm 2021. E i ti fer ki in nepli posib pou bann *carer* akimil konze dan bann fason ki mon fek eksplike.

Ziska prezan tou konze anyel i bezwen ganny pran dan sa lannen ki i *due*. E *home carer* pa kapab akimil okenn konze ziska son lannen answit san lotorizasyon *ASP*.

ASP pe nepli fer okenn peyman konze ki'n akimile. E zot ganny ankouraze pou pran zot konze. Rezon pou sa sanzman dan Polisi Mr Speaker, se pou asire ki bann *carers* i pran konze. Anpese ki zot pa kapab desarz zot responsabilite akoz lafatig.

E garanti ki servis ki zot donnen pa ganny enpakte, par lefe ki zot pa pe repoze oubyen pran zot konze.

An term rezilta sa Polisi dan sa totalite Mr Speaker, levidans ki mon'n resevwar sorti kot *ASP*, i montre ki depi Septanm 2021 i annan en logmantasyon dan lakantite *carer* ki'n *apply* konze *annual*.

E osi dan kantite endividi ki'n vin fer *replacement carer*. Dapre bann sif, deswit apre sa *Policy* an Septanm 2021 ziska Desanm 2021 - 341 *carers* ti vin *apply* zot konze, e depi Zanvye 2022 ziska out 2022, nou'n resevwar 870 laplikasyon pou konze. Sa i an total 1211 laplikasyon konze.

ASP i osi satisfe ki dan sa total 1211 laplikasyon konze. Zis 832 ki'n ganny aktyelman demann pou en *replacement carer* parey nou dir.

Mr Speaker, nou rikord i endike ki dan larestan sa bann ka, se bann manm fanmir ki zot menm in volonter pou soulaz sa *carer*. Me pli enportan okip sa resipyan ki petet zot vye paran ou zot zanfan. Nou le felisit sa bann endividi. Akoz sa i promot bann bon valer lafanmir ki nou ankouraze.

Mr Speaker, par lefe ki pandan bann lannen *Scheme Homecare* pa'n devlop dan en

fason konpreansiv e striktire, Gouvernman in rekonnèt ki i annan nesesite pou regilariz sa *Scheme* atraver letablisman en nouvo Lazans *Homecare* ki pou pran responsabilite pou sa *Scheme*. E donn li en stati legal.

Gouvernman pe deza travay lo bann polisi neseser e *draft Bill* pou ganny prezante devan *Cabinet* byento. Sa nouvo Lazans pou tonm anba responsabilite Minister Lafanmir ki deza annan portfolyo bann ki ase aze e otreman kapab.

Aprezan mon pou reponn kestyon poze par Onorab Uranie. Onorab ti anvi konnen ki mon Minister i anvizaze fer pou ki bann *carer* pa perdi zot konze dan ka kot zot pa kapab pran konze., Mr Speaker, i devret aprezan kler baze lo lesplikasyon ki mon'n donner avan, ki *carer* i kapab akimil konze selman dan bann sirkonstans kot *ASP* in agree davans ant sa dimoun e *ASP*.

Par kont parey mon ti mansyonnen, bi par deryer sa Polisi, se pou asire ki bann resipyan i ganny sa pli bon swen posibil. *ASP* i santi ki dan okenn ka akimil oubyen re anvoy konze pou sa lot lannen, i devret vreman rar.

E ki *home carer* i devret pran konze pandan sa lannen

ki i *due*, pou ki zot ganny ase repo e zot kapab re fer pou kontinyen donn bann bon swen zot resipyan. Kot i konsern peyman pou konze ki'n akimile sa i annefe arete depi Septanm 2021 kan sa nouvo Polisi ti pran lefe.

Mr Speaker, Onorab Uranie in osi demande lekel ki responsab pou rod en ranplasman pou bann *home carer* kan enn i aret travay ek en resipyan.

Sa responsabilite i pou sa resipyan li menm. Me parfwa dan serten ka *ASP* i ede dan sa prosedir. Kan en resipyan in idantifye son ranplasan, i enform *ASP* pou ki bann pa neseser i ganny fer pou li anrezistre. Donn li en deskripsyon travay.

Ki endik li son rol koman en *carer*. Met li lo sistenm pou ki i ganny son *allowance* pou sa servis.

Pou reponn kestyon Onorab Ernesta ki'n demann en kestyon lo menm laliny konsernan difikilte bann paran oubyen manm fanmir, ki port swen bann ki annan bezwen spesyal.

Oubyen otreman kapab. Ki bann prosedir ki an plas pou zot. I kler ki i enportan ki sak *carer* ki pran swen avek bann ki annan bezwen spesyal ki zot osi

zot bezwen en *break* avek swen ki zot donnen. Pou zot osi anpese ki zot *burn out*.

Mr Speaker, parey mon'n deza mansyonnen. Prosedir anba sa *Scheme* in dir ki sa *carer* i devret pran konze. E ki i responsabilite pou rod en ranplasman i repoz lo sa *carer* li menm, oubyen sa resipyan. Dan ka en zanfan responsabilite i pou sa paran. Dan serten ka *ASP* i kapab ede si i annan lo son rikord en *carer* ki pe rod en travay.

Finalman Mr Speaker, sa lot kestyon Onorab Ernesta, se pou konnen si pou konnen si mon Minister i annan plan reviz prosedir ki relye avek konze *carer*.

Parey mon'n deza endike oparavan Mr Speaker. I deza annan travay ki pe ganny fer pou donnen sa *Scheme* en stati legal a traver son nouvo *Homecare Agency* ki pou annan responsabilite bann *carer*. Alor byensir nou pe konsider serten sanzman. Me a sa staz mon pe pou kapab donn plis lenformasyon lo la.

Me byensir Mr Speaker, Lasanble pou ganny plis detay anmezir ki nou progrese ek sa bann sanzman. Byento sa Prozedlwa pou ganny prezante devan Lasanble.

Lo sa not mon anvi enn fwa felisit tou bann *carers* ki pe travay dir pou pran swen avek zot resipyan. Nou konnen i pa en latas fasil. Me i demann bokou korporasyon, latansyon e pasyans pou kapab fer sa travay.

Nou ankouraze zot pou kontinyen sa bon travay. Pou bann resipyan i primordyal pou *ASP* asire, ki zot ganny bon swen e en servis de kalite ki promot respe ek dinyite ki zot merite. Mersi Mr Speaker.

MR SPEAKER

Mersi Minis. Nou a pran kestyon siplemanter bann demander. Onorab Uranie premye.

HON ROCKY URANIE

Mersi Mr Speaker. Mersi Minis pou ou larepons. Minis mon konnen sa i en - dan sityasyon ki nou ladan ozordi sa i en zafer *once size fits all* ki ou pe mwan.

Me mwan mon annan levidans ki i pa pe marse. Akoz mon annan *carer* ki dan bokou difikilte. Pe sey pran son konze, i pa kapab akoz in ganny demande pou rod en lot dimoun li menm. E i pe sey rode en lot dimoun pou ranplas li. I pa pe gannyen. Tou dimoun pe travay. I difisil pou li ganny en dimoun pou ranplas li.

E son resipyan i en dimoun aze ki la kot lakour ki pa marse. So, mon ti ava kontan ou donn mwan en garanti ki zot pou ed sa bann dimoun ki dan sa sityasyon.

Parey ou'n dir i annan 800 ekek ki'n fer laplikasyon pou al konze. Eski tou sa laplikasyon sa bann dimoun in deza ganny ranplasan?

Oubyen zot in ganny dir al rod zot ranplasan zot menm? E konbyen ladan ki ou asire pou ganny en ranplasan pou zot kapab pran zot konze?

Mersi Minis.

MR SPEAKER

Mersi Onorab. Minis.

MINISTER PATRICIA FRANCOURT

Mersi Mr Speaker. Onorab mon panse, mon larepons in vreman detaye sa ki mon'n donner. Akoz mon ti le *set the scene* ki manner *the homecare system* i marse.

Wi, ou dernyen kestyon ki ou pe demande eski sa bann dimoun in ganny ranplasan? Wi. E sa ki mon'n dir zot in ganny ranplasan e osi manm fanmir in *come forward* pou zot zwe zot rol.

Nou pa tire sa responsabilite osi lo manm fanmir. So mon'n dir i annan en

sif ki mon'n donner pou dir i annan manm fanmir ki'n *come forward*, in *step in* koman en *carer* pou zot zwe zot rol.

Be selman mon dir poudir i annan plizyer rezon akoz nou ankouraz en dimoun pou pran en *carer*. E mon'n osi fer resorti poudir dan bann ka eksepsyonnel.

Savedir sa dimoun i bezwen annan en konversasyon avek ASP dan en ka eksepsyonnel *then* ASP i kapab konsider.

Me solman mon'n dir poudir *most of the time* nou pe ankouraze pou sa dimoun pran en *carer*. E sa resipyan osi i annan dwa rod sa dimoun. Pa vedir zis sa *carer* ki al rod en dimoun. Sa resipyan osi i annan drwa rod son dimoun. Mersi.

MR SPEAKER

Mersi. Onorab Ernesta ou kestyon.

HON PAUL ERNESTA

Mersi Mr Speaker. Mr Speaker mon pou pran lo sa pwen kot Minis in dir prosedir ki in met tou bann keksoz an perspektiv pou nou kapab konpran tre byen.

Mon annan en konsern se ki realite i diferan. Realite i diferan par kont kot nou annan

dimoun ki'n ale pou fer laplikasyon, me pa neserman ganny swiv.

Par egzanp, i annan en prosedir kler ki zot dir zot kriter. En dimoun pou vin *carer* ozordi i bezwen 25an.

En dimoun ki enn son manm fanmir i fer *case* e li sa manm fanmir i ganny *celebral palsy* e prezan, malerezman plito sa manm fanmir i annan zis 4 mwan pou li ganny 25an, zot pa rekonnèt. Konmsi mon konsern se ki oli sa konpasyon swa sa fleksibilite pou zot kapab sey konpran pou kapab sey ed sa dimoun? Enn.

Aprè dezyenman, Minis in koz sa nouvo lorganizasyon ki zot pe al kree pou *carer*. Kan ki nou espekte vwar sa vini o pli vit posib? Ki petet ladan zot ava kapab pran kont tou sa bann konsern pou fer sir ki keksoz i ava arive.

Petet kan en dele letan pli kourt ki nou kapab war sa arive? Mersi Mr Speaker.

MR SPEAKER

Mersi Onorab. Minis.

MINISTER PATRICIA FRANCOURT

Mersi Mr Speaker. Mersi Onorab pou ou keston. Onorab sa laz 25 ki nou ti mete, i ti en gidans ki nou ti bezwen

mete. Akoz ou pou konnen ou, ti annan en kantite labi ki ti pe arive dan *homecare*.

E sirtou bann zenn dimoun annan de fwa ki nou ti war poudir zot menm zot, zot ti dan difikilte.

I annan bann zenn lo drog menm ti pe *apply* pou zot vin en *carer*. I annan ki lo lalkol i le vin en *carer*. Nou ti annan bann labi ant *carer* avek resipyan. So nou ti bezwen pran e desizyon ki enportan pou *safeguard*. E *again* i *safeguarding* tou lede kote. So nou ti met sa laz. E nou ti dir poudir sa i en *guideline* pou nou kapab servi e fer sir poudir nou bann dimoun letan i ganny en *carer*, i en *carer* ki responsab.

Me en *carer* osi ki annan en *sense of maturity*. So sa ti enportan pou nou fer sa.

Mon'n dir dan mon larepons *Homecare Agency* nou preski fini finaliz sa *Bill*. *Very soon* nou pou anmenn sa kot *Cabinet*. E dan son totalite i pou kouver tou sa bann defayans ki nou'n war dan *homecare system for many years*.

E mon konnen poudir *when it comes into place*, i pou fer en gran diferans. So i pou parey en - i en *Agency* li.

So i pou annan tou son *human resource*, son bann Polisi. Tou son keksoz ki i pou

en *proper Agency*, ki pou kapab *meet the needs of* nou bann resipyan.

Alor mon donn ou mon parol ki *this is coming very soon*. Mersi.

MR SPEAKER

Mersi Minis. Nou ava pran kestyon serten lezot Manm ki nou annan. Onorab Vidot.

HON AUDREY VIDOT

Mersi Mr Speaker. Bonzour Mr Speaker. Bonzour Minis ek ou delegasyon. Tou koleg Onorab. E en bonzour Spesyal pou zabitan Roche Caiman.

Minis premye kestyon ki mon annan. Ou'n dir ti anba labi, i annan pli ki 1an la depi la koman ou dan Gouvernman. Eski ou pe dir nou la ozordi dan ou Gouvernman napa labi dan Seksyon ASP? Sa i enn.

Dezyenmman Minis ou'n donn en gran lesplikasyon lo prosedir, *Scheme* e fason ki mannyer pou fasilite dimoun ki dan bezwen. Mon repete, ki dan bezwen ou en lasistans *carer*.

Eski Minis i kapab dir nou si i azour e krwar ki ozordi ki mannyer Lazans pe fonksyonnen avek bann sanzman. E mon konpran sanzman in al lo transformasyon. Eski tousala zot pe adres bann konsern ki

annan la parmi aplikan? Ki prosedir atraver lasistans pou en bezwen *carer* i tro long. I annan aplikan ki plis ki en mwan.

Parey Onorab Uranie mon osi mon annan levidans. E sa fardo atraver bann prosedir kot kantite fardo ekonomik zot pe mete lo bann fanmir, ki espesyalman vwar poudir i bezwen lasistans en *carer*.

Me zot e ganny demande pou kontribye. E zot annan lezot *burden* ki Lazans pa pe antre ladan.

Eski ou krwar poudir ou Minister ozordi la atraver Lazans Proteksyon Sosyal, zot in adres tou sa bann *issues*. E zot krwar poudir ler zot pou vin avek sa *Bill* sa bann keksoz pou'n fini ganny adrese?

Mersi Mr Speaker.

MR SPEAKER

Mersi Onorab. Minis.

MINISTER PATRICIA FRANCOURT

Mersi Mr Speaker. Mersi Onorab pou ou kestyon. Onorab pou nou *process* en aplikasyon pou en *carer* nou bezwen *rely* lo *Bartel Index* ki sorti kot Minister Lasante.

So i en travay konzwen. *So, we have to rely on what the Bartel Index* i dir nou. Pou nou

start nou process of the means testing and everything. So sa ou konnen. E nou bezwen espere ki sa i ganny dir pou met sa aplikasyon lo nou komite kot i ganny regarde e verifye.

Ou konn tre byen Onorab kantite labi, kantmenm nou pa pou dir tou, kantite labi ki'n arive dan *Homecare Agency* toulezour. Mwan mon war piblik *once a week sometimes twice a week*. Enn bann konplent ki mon ganny plis. E i malere pou dir, i annan labi i arive lo nou bann resipyan.

E sa in la pou en ta letan. Apepre 43an *if more*. Be prezan nou, nou pe sey met en lord pou fer sir ki labi i liminen. I napa. *It should not be*. En vye dimoun oubyen en zanfan i bezwen kapab *rely* lo en *carer* ki vin fer son louvraz, pou donn li *the best* swen parey mon dir avek respe ek dinyite.

Bann labi ennler ki nou koz lo la i fermal regarde. I annan labi fizik ki depi - nou'n sey met lord dan tousala. Mazinen nou pe koz avek 3, 800 *carer*. *Just under 4 thousand carers right? So letan ou'n pran sa ou'n met li an gro. E ou komans depouye. Ou vwar bann pti, zot menm zot la dan Lasanble zot in ekrir mwan, call mwan, pou dir ek mwan Minis*

ouver lizye tel landrwa, tel landrwa. Mon kontan sa.

Akoz ler zot fer sa i *particular case*, ki mon ganny lenformasyon mon anvoy kot *ASP*. E *ASP* i *investigate*. Mwan mon donn ou mon parol ki napa *investigation* ki *un-turn*. Nou bezwen *investigate* bann *cases* ki dimoun i dir. Labi i ariv fizik, labi i ariv verbal, emosyonnel. *Carer* ki vin kot lakour, ki sipoze vin kot son resipyan i pa la.

Nou annan rikord aköz nou *link up* ek tou bann leres *Agencies*. Ler i sipoze kot son *carer, in the past* ki nou'n war, i dan *Dubai* i ava pe fer son *shopping*.

Tousala nou vwar, *right?* E nou, nou vini nou'n met en lord. Parey ou war mon ti vin isi koman Minister ki ti annan *burial services* nou ti met en lord. Ozordi osi mon pe fer menm parey avek *Home Care Agency*.

It is a *huge group of people* ki nou bezwen kapab *manage* e annan en *oversight*. Nou annan nou 8 zofisye ki travay. E zot pe fer *their very best that they can*.

Alor sa *Agency* letan i pou vin an plas, i pou bezwen fonksyon avek tou son striktir konpreansiv. Pou fer sir ki sa servis i o kalite. E mwan mon pou dir ou poudir sa ki nou pe

travay lo la in pran en pe letan pou nou *get it right*. Nou ava zis vini nou dir met en Polisi devan.

Nou travay for pou fer sir ki sa *Policy* i byen. E i ou *meet the needs of the people who are most at risk* dan nou sosyete. Mersi.

MR SPEAKER

Mersi. Onorab Vidot mon'n ekout byen repons Minis. Mon krwar in adres byen ou kestyon. Permet mwan pas lo lezot kestyon bann Manm.

Onorab Henrie ou kestyon.

HON GERVAIS HENRIE

Mersi Mr Speaker. Bonzour tou dimoun. Mr Speaker, premye kestyon. Kestyon 121 i komans koumsa. I dir swivan konplent sorti kot bann *carer*. Swivan konplent sorti kot bann *carer*.

Donk mon anvi demann *panel*, ki striktir ozordi ki annan an plas ki si bann *carers* i annan en *issue* konsernan zot travay, kote zot anmenn sa problemn devan? E ki bann rekour zot annan? E an gro si i annan en statistik apepre ki kantite konplent zisteman zot in resevwar poudir kot bann *carers* in konplent sa zafer zot bezwen konze, napa dimoun pou ranplas zot bann keksoz koumsa?

Pou nou kapab ganny en portre sa sityasyon si vreman i en leokri parmi popilasyon *carers*. Mon pe dir sa aköz baze lo lakantite konze anyel ki mon war in ganny *apply*. Sa i mon premye kestyon.

Dezyenm kestyon Mr Speaker, sa ki mon anvi demann *panel*. Par lefe ki i annan apepre 3,800 *carers*, ki fer ki i annan en gran nonm dimoun ki ti kapab otreman dan en lot lanplwa. Ouswa son kou ki i asosye avek pou en pti pei soutenir.

Donk ki refleksyon ki pe annan ki pou anmenn bann lezot program adisyonnèl, apard par egzant fanmir ki kapab donn en soutyen? Me bann lezot group ki kapab rantre pou ede soulaz en pe sa sityasyon. Ki alor i fer ki program *carers* i kapab vin soutenab a lonterm? Mersi.

MR SPEAKER

Mersi Onorab. Minis. Wi *CEO ASP* pou pran repons. *Yes CEO*.

CEO BRENDA MORIN

Bonzour Mr Speaker. Onorab Mersi pou ou kestyon. *Regarding* konplent ki ou pe dir ki *carers* i anmenn. I plis *actually* konplent ki nou gannyen resipyan. E bokou konplent ki nou pe gannyen se

carer pa vini. Lo La Digue resaman nou'n ganny 2 ki'n ganny raporte ki zot *carer* in al Mahe. Mon krwar ti bann aktivite ki ti annan Mahe. *Carer* in ale in kit zot.

So nou ganny en bon pe akoz ou kapab mazine sa bann dimoun i *rely* lo sa bann *carer* pou tou zot byennet. E sirtou si ou annan en dimoun ki pa vwar kler. I napa personn pou kwi son manze. I pa kapab okip son lekor.

So definitivman nou ganny en kantite sa. So ti napa prosedir pou dokimant sa. Akoz tou nou sistenm i manyel. Espesyalman *with Homecare*.

Pou ki depi sa lannen ki'n ganny fer zanmen rikord in ganny kite. Zanmen okenn sistenm in met an plas pou fasilite sa prosedir. Ou kapab mazine *how important* sa i ete pou dan nou pei pou bann dimoun ki bezwen sa, sa servis. Se bann dimoun ki aze. E bann ki annan dezabilite.

So, zot ti ava en sistenm ki ti ava an plas vit rikord tou sa bann ka. Annan sa fasilite pou al kot zot imedyatman. So tousala ki nou pe dil avek pou mete. E met an plas pou nou rikord tou sa bann prosedir ki annan ka ki vreman fer lapenn. Ki nou bezwen rod lezot lazans pou ed nou.

E i annan kantite zot ki'n anvoy mwan bann portre. Donn mon bann sityasyon ki *urgency* nou'n bezwen al *tackle*.

E parey zot konnen ki i pe pase deor. So tousala nou pe met an plas pou nou kapab dil ek sa bann problem. E sirtou se pou nou resipyan ki enportan.

Sanmenm sa i dir. *Home Care* pou resipyan. Definitivman osi nou bezwen get nou bann *carer*. Fer sir zot pa ganny abize zot osi. Ki zot ganny zot pozman. Zot ganny tou zot benefis koman en imen osi.

So tou lede kote nou pe gete pou met sa an plas. E ki nou pe fer sa tim ki pe travay avek sa nouvo *Bill* ki pe vini, pou get Polisi pou *tackle* sa bann lalis problem, ki manyer sa Lazans, sa nouvo Lazans pou kapab met en prosedir an plas ki i vreman *tight*. E ki i redwir sa bann problem ki nou pe war ozordi. Mersi.

MR SPEAKER

Minis wi.

MINISTER PATRICIA FRANCOURT

Mersi Mr Speaker. Mersi Onorab. Mon ava reponn ou dezyenm bout ou kestyon *about sustainability of the program*.

Onorab premyerman nou'n ganny li vreman byen, pou plas sa Lazans kot i fodre. *Which is under the Ministry for Family Affairs ki responsab sa portfolio elderly but also disability. That was the big step pou nou. Alor i pa zis Agency. Doing a service of payments. I bezwen ganny regarde byen menm.*

The purpose of the Agency itself. E ler sa Agency, nou'n ganny gide en pti pe avek World Bank aköz zot in met sa dan zot rapor osi, ler sa Agency in ganny formen. Nou'n pran en kantite letan pou nou asize e regard li. Scrutinize how we want it.

You know nou'n pran leres model dan bann diferan pei pres avek nou, ki mannyer i marse. E sa Gouvernman i kler lo donn the best service pou nou bann dimoun ki'n aze e ki merite. E bann zanfan ki bezwen. Sa i for dan nou Polisi. E nou manda, e nou krwayans. Alor nou met en kantite emphasis lo la.

So dan sa Homecare Agency Bill ki nou pe ogarde, nou pe met emphasis lo premyerman en job description ki napa, ti napa. Ler nou'n vini nou'n met enn ansanm poudir this is what you are expected to

do. Aköz ti napa ni menm en job description.

Nou'n met emphasis lo training. Ad hoc nou'n komans fer bann training pou bann cares ki zot kontan. Aköz zanmen zot in ganny proper training. So ou pe zis dir zot al fer en louvraz. Me selman zot napa training. Zot napa leksperyans. Zot napa skills pou zot met an pratik.

Nou pe osi gard avek sa Agency, the right Human Resource structure. Aköz i bezwen en Agency avek tou son staff.

Nou pa pou kapab kontyen travay ad hoc. Nou pou bezwen fer sir ki tou son staff from si i en lot ekivalan to how Agencies avek son CEO, avek tou son Operations Manager and so on, we need to be able to get this right. So sa structure vreman konpreansiv i vreman enportan. Pou annan bann leres Lazans.

E mon konnen i annan bann leres lazans ki donn leres servis out there. So it is a partnership. E sa mon mazine lafanmir ki i byen plase pou zot kapab tap dan bann leres Agencies ki zot annan.

And of course, create bann policies ki nou napa. E sa i ava kouver tou bann keksoz parey annual leave, grievance procedures. Tou sa bann keksoz

there aren't any. Napa. Nou, nou'n zis vini nou'n kontinyen. Be i pran letan pou nou kapab met sa bann keksoz an plas.

E dernyerman ki mon le koz lo sa se sa bout *respite*. Akoz *the job of a carer* parey mon'n dir, i *so hard*. Sanmenm sa ki nou vwar poudir *Occupational Health* pe dir nou poudir i annan bann dimoun i soufer ledo, lebra.

Ou konnen zot *stress*. *Mental health for some of the cares are on the increase*. Be nou bezwen annan dan *proper respite structure* an plas, pou fer sir ki sa bann dimoun i ganny *looked after*.

Majority of them does a wonderful job. But we have a duty of care pou fer sir ki zot ganny *look after as well*.

Both the recipient and also the carer. Mersi.

MR SPEAKER

Mersi. Nou'n depas 1030. Mon pou termin sa sesyon kestyon la. Nou ava rebran 11er. Mersi.

(BREAK)

MR SPEAKER

Nou rebran kestyon pou Minis pour Zafer Lanplwa e pour Lanplwa e Zafer Sosyal. Delegasyon Minis in sanze e nou annan madanm Ms

Veronique Bresson *Executive Director* dan Biro Minis, Mr Steve Monnaie *Direkter Zeneral Labour Relation* e Mrs Letimie Dookley *Direkter Zeneral Lanplwa - Promosyon Lanplwa*.

Nou'n ariv lo kestyon 123 Onorab Phillip Arissol. *One moment* Onorab. *Point of order*. Kwa? Onorab Pillay.

HON SEBASTIEN PILLAY

Mersi Mr Speaker. Mr Speaker en *point of order about Order 36*, an relasyon avek pour *press* Minis pour aksyon. Mon oule demann ou permisyon pour fer en pledwari avek Minis lo bann kestyon ki'n souleve pour *carer*, mon konnen letan i en *premium* pour Lasanble, Lasanble i bezwen *move on* ek lezot kestyon.

Me lefe i reste ki'n annan plizyer konplent lo sa size e mon'n sey fer en pe resers, e mon'n konpran in menm annan bann *case* ki'n al devan *PSAB*. Avek ou permisyon, eski nou kapab ganny en *commitment* avek Minis ki pou fer en lenvestigasyon dan sa bann konplent, avek bi zis pou nou pa vin demann sa bann kestyon dan Lasanble, e i annan en lesanz ant de diferan lopinyon. Me pou nou sey relman rod en solisyon pour sa bann *carers* ek

sa bann dimoun ki pe eksprim sa konsern.

MR SPEAKER

Mersi Onorab. E Minis fer sa bref Minis mon envit ou pou donn tou konsiderasyon lapel *Leader* Lopozisyon. E mon a zis repete ki wi letan i nou konsern, nou annan 7 kestyon e nou pou annan apepre minit par kestyon.

So zot a konpran mon, mon ti ava kontan kapab fer letan elastik pran tou kestyon me zis mon napa sa fasilite.

So nou a pran kestyon e nou ava bezwen al dapre letan ki nou annan. Onorab Phillip Arissol ou kestyon silvouple.

HON PHILLIP ARISSOL

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou bann MNAs. Bonzour tou bann dimoun ki pe ekout nou.

Kestyon i lir koumsa, Eski Minis i kapab dir Lasanble, ki kantite ka aksidan fatal dan landrwa travay in ganny rikorde par son Minister, pandan sa dernyen 2 lannen?

E dan ki sektor ki ou Minister in apersevwar plis ka aksidan fatal? Mersi.

MR SPEAKER

Mersi Onorab. Minis larepons.

MINISTER PATRICIA FRANCOURT

Mersi Mr Speaker. Mersi Onorab pour ou kestyon.

Mr Speaker pour lannen 2020, 5 ka aksidan fatal in ganny raporte dan sa bann lendistri souvan: 1 kot en *dive centre* ki dan lendistri rekreasyonnel, 1 kot Por ki tonm dan lendistri transportasyon e stokaz, 1 dan lakonpanyen ki tir salte ki tonm dan lendistri zesyon salte, 1 dan lendistri konstriksyon, 1 dan en lakour prive. Dan sa 5 ka aksidan fatal ki'n ganny raporte 3 i Seselwa 2 i etranze.

Pour lannen 2021 selman en ka aksidan fatal in ganny raporte, dan sektor konstriksyon e viktim ti en etranze.

Depi le 1 Zanvyè ziska le 31 Out 2022 i annan 4 ka aksidan fatal – 1 dan lendistri konstriksyon, 1 ka kot en lakonpanyen ki netway semen parey nou dir bann *support services*, 1 ka dan lendistri lapas, 1 ka dan lendistri transportasyon ek stokaz.

Dan sa 4 ka aksidan fatal viktim ti en Seselwa e 3 etranze. Pour sa 2an edmi statistik i montre ki se plis ka aksidan fatal pe ariv dan lendistri

konstriksyon kot 3 ka in ganny rikorde, swivi par lendistri transportasyon ek stokaz. Dan tou ka aksidan fatal en lenvestigasyon in ganny antreprann pou konn lakoz aksidan.

Serten lobzervasyon ki Lenspekter Lanplwa i rikorde, i annan pou fer ek mezir proteksyon ki pa pe ganny pran tel ki;- lekipman protektiv ki pa pe ganny donnen par anplwayer, oubyen si i donnen pa pe ganny mete, ouswa byen servi par travayer.

Sit travay i pa pe zwenn kondisyon ki demande anba Lanplwa, pou fer ki lanvironnman i enn ki sen e sof. Par egzanp en sit konstriksyon kot napa *guardrail*, ouswa *scaffolding*, ki pa stab e byen striktire.

Mr Speaker Lalwa lo Lasante e Sekirite i fer provizyon pour pran mezir nesaser si pandan lenspeksyon routin lo bann sit konstriksyon, oubyen lenvestigasyon dan ka aksidan, bann pratik lo sit travay pa an akor ek Lalwa.

Sa bann mezir i tel ki nou kapab donn en *prohibition notice* si mon kapab eksplike. Sa kot lenspekter i donn direktiv pour en aktivite aret konpletman lo en sit travay, an vi ki i poz bann risk vreman

serye pou lasante e sekirite travayer.

Ler en *prohibition notice* i ganny an leve travay i kapab ganny rebran, apre ki tou defayans in ganny rektifye. Par egzanp lo en sit kot travayer pe travay par lao en oter - plis ki 2 met, e napa sentir sekirite, parey nou dir *safety belt*.

Departman Lanplwa osi i kapab donn en *improvement notice*. E si mon kapab eksplike, sa i kot lenspekter i donn direktiv pour en anplwayer rektifye defayans minel lo en sit travay. Dan ka en *improvement notice* travay lo en sit i kapab kontinyen, e i ganny tire apre ki anplwayer in rektifye defayans.

Par egzanp kot en sit konstriksyon ki napa *safety signs*. Nou osi kapab fer proseksyon, dan ka kot sa aksyon i konstitye en neglizans, ou kondwir mazer lo lapar en akize anba Lalwa Lasante e Sekirite dan Travay. Si en anplwayer i ganny trouve koupab sa i vin ek en *fine* 2500 a R10,000.

Mr Speaker Departman Lanplwa i kontinyen ek son sansibilizasyon dan landrwa travay an sa ki konsern bann pratik lo lasante e sekirite.

Sa i ganny fer dan program travay toulezour

atraver lenspekasyon, ki ganny fer lo sit travay. E kot apre en let i ganny soumet avek anplwayer, pou rektifye defayans pandan en dele letan kot i ganny vwar neseler.

Departman Lanplwa i osi organiz plizyer aktivite pandan *Safety Day* ek *Safety Week*, tou le lannen, tel ki program lo radyo pour sansibiliz popilasyon e *workshop* pour ranforsi kapasite bann *safety officers*.

Nou'n vwar ki sa i pa sifi. An rekonesan ki i pa devret annan okenn aksidan grav ou fatal dan landrwa travay, Minister in fini konmans diskite lo en plan, pou fer en plan sansibilizasyon entans pour sa 2an ki pe vini.

Nou'n fini travay lo sa plan ki aprezan nou pe evalye san son kou finansyer pou determin priyorite. Nou'n vwar ki i neseler ki nou konmans tou dabor ek sekte konstriksyon, akoz plis aksidan i ariv dan sa sekte. Nou pe bezwen re al eksplik zot lo tou leta lasante ek sekirite ki en sit konstriksyon i bezwen obzerve ziska ki tou aktivite lo sa sit i konplete.

Par egzans ki mannyer pou evalye *risk*, ki kalite lekipman protektiv ki aplikab pou sak sit, e ki mannyer pou fer *monitoring* lo en sit

konstriksyon. En lot aksyon se ki Departman Lanplwa in fer, in vwar i neseler pou reviz Lalwa lo Lasante e Sekirite pou met li azour avek devlopman global.

Serten defayans Lalwa ki pou ganny adrese, se pou ogmant penalti pour bann lofans ki ganny komet e posibilite pou entrodwir *spot fines*.

En lot mezir se pou fer li mandatwar pou tou lakonpanyen ki annan 50 travayer e plis, pou *recruit* en *safety officer*. Mr Speaker Departman Lanplwa i konsyan ki pa merit annan ni menm en ka aksidan grav, oubyen fatal dan landrwa travay.

Nou rekonnèt ki i annan landrwa travay, ki annan bann bon pratik. Me mon oule felisit zot pour zot zefor e demann zot ki zot kontinyen, pou ki zot reste bann bon legzanp pou lezot. Nou osi rekonnèt malerezman ki i annan pa pe pran byen zot responsabilite.

Mon pran sa lokasyon ozordi, pou lans en lapel avek zot pou revwar zot lapros. Akoz lavi en imen nou pa kapab met li *at risk*. Mon ankouraze, mon ankouraz tou bann anplwayer pou toultan evalye *risk* ki bann aktivite zot loperasyon i kapab koze, e pran aksyon neseler ler i fodre.

Finalman mon fer en lapel spesyal, pou tou travayer dan Sesel, zot osi zot devret vin pli responsab, pou asire ki zot lasante ek sekirite dan zot landrwa travay i vin premye e avan tou leres keksoz.

Evite pran bann risk e edik zot lekor pou ki zot vin pli konsyan lo nivo danze ki kapab koze - koz zot dimal grav. Mr Speaker Departman Lanplwa i reste angaze pou kontinyen ranforsi bann bon pratik lasante ek sekirite dan landrwa travay.

E nou kont lo korperasyon tou dimoun, pou ki nou landrwa travay atraver pei an antye e tou travayer i reste sen e an bonn sante. Mersi Mr Speaker.

MR SPEAKER

Mersi Minis. Siplemanter Onorab Arissol.

HON PHILLIP ARISSOL

Mersi Mr Speaker. Mersi Minis pou en larepons byen detaye. Fini kouver tou mon bann siplemanter.

Selman Minis mon ti ava kontan demann ou, eski i annan okenn lakonpanyen ziska la aprezan ki'n ganny sarze pour negligans an se ki konsern sekirite dan landrwa travay? Mersi.

MR SPEAKER

Mersi Onorab Arissol. Minis.

MINISTER PATRICIA FRANCOURT

Mersi Mr Speaker. Mersi Onorab. *Right now at the moment* nou annan en *case* ki dan *process* pour prosekisyon. Mersi.

MR SPEAKER

Mersi. Kestyon Onorab Bistoquet.

HON ROSIE BISTOQUET

Mersi Mr Speaker. Bonzour Minis avek ou delegasyon. Bonzour Onorab e mon senser kondoleans pou tou sa sityasyon ki'n arive sirtou pou bann lanmor ki'n arive *lately*. Sirtou ki ladan i annan enn nou koleg Ners, ki mon konnen son fanmir i sitan dan en sirkonstans difisil.

Minis mon kestyon i vin koumsa, mon konnen poudir tou landrwa travay ki i annan par lao 50 travayer, mon krwar i annan en regilasyon ki permet zot pou zot anploy en *Health and Safety Officers*.

Me selman i annan osi bann konpanyen malgre ki zot pe anploy sa group dimoun ki mon pe nonmen, zot in *go*

beyond sa, ki zot in anploy menm ners dan zot biznes pou ede avek *health and safety*.

Ki konversasyon ou Minister i pou annan ouswa i kapab annan avek bann lezot biznes, ki zot annan travayer pli ba ki. Meton zot annan 49 - 48 pli ba, ki zot kapab petet fer fason pou fer annan sa *health and safety* fason dan zot landrwa travay pou fer sir ki travayer i ganny sa lasistans? Mersi.

MR SPEAKER

Mersi Onorab. Minis wi DG Monnaie pou reponn.

DG STEVE MONNAIE

Mr Speaker, bonzour tou dimoun, bonzour Onorab. Lalwa *currently* parey i ete Onorab, i permet bann anplwayer ki annan anba 50 travayer, pou elekte en reprezantan pou reprezant *health and safety aspect* dan zot landrwa travay.

Dan Lalwa ki ler nou pe revwar, byensir i annan bann lakonpanyen ki pli *at risk*. Menm si ou pli ba ki 50, pou annan serten provizyon ki Lalwa pou obliz ou, annan en *Health and Safety Officer*.

Me solman sa i bann diskisyon ki pou ganny pran avek bann *stakeholders*. Mersi.

MR SPEAKER

Mersi. Onorab Roucou ou kestyon.

HON MICHEL ROUCOU

Mersi Mr Speaker. Bonzour tou Manm koleg Onorab. Bonzour Minis avek ou bann koleg.

Mr Speaker mon kestyon i al koumsa; Minis eski zot annan en younit ki fer vizit detanzaot, lo bann *site* oubyen dan bann landrwa travay, pou fer sir poudir bann Lalwa ki annan pou fer avek *safety* i ganny swiv?

E osi i annan plizyer landrwa travay, kot i annan bann *staff* kot zot pe dir zot pa gannyen en *risk allowance*. Mersi Mr Speaker.

MR SPEAKER

Mersi. DG ou pran repons.

DG STEVE MONNAIE

Mersi Mr Speaker. Mersi Onorab. Nou annan en seksyon dan Departman Lanplwa ki apel *Labour Monitoring and Compliance*. E nou osi annan reprezantan, nou annan zofisye lo Praslin ek lo La Digue.

E bann zofisye i ganny *allocate* diferan sekter pou zot fer vizit pandan lannen e zot fer

zot mye. Malgre bann diferan konstrent, zot fer zot mye pou kouver *as much site* ki posib.

E parey ou konnen sekter konstriksyon i byen gran. E dernyen lenformasyon ki nou'n vwar ek *Licensing* i annan apepre 1300 lakonpanyen ki annan *License*.

So nou pa arive dan en lannen kouver tou le 1300. Me *maximum* ki nou arive zofisye i kouver. Mersi.

MR SPEAKER

Mersi. Onorab Uranie ou kestyon.

HON ROCKY URANIE

Mersi Mr Speaker. Bonzour Minis ankor enn fwa avek ou nouvo delegasyon.

Minis eski zot obzektif anver bann konplent ki vini? E apre konbyen lenspeksyon zot in fer pandan sa dernyen lannen, e konbyen i reste pou zot fer pou zot fini konplet parey nou dir sa premye *cycle* lenspeksyon kot tou bann landrwa travay?

E apre eski zot annan en Polisi an plas oubyen zot anvi anmenn en Polisi an plas, pou fer ki bann lorganizasyon i pey en lasirans pour bann travayer apard zis donn zot en *risk allowance*? Mersi.

MR SPEAKER

Mersi. Minis oubyen ou *panel*. Yes Minister.

MINISTER PATRICIA FRANCOURT

Mon ava pran en bout. Mersi Mr Speaker. Mersi Onorab pou ou kestyon. Mon ava pran sa premye bout e *DG Monnaie* i a pran sa dezyenm bout lo *statistic*. Onorab mon Departman i enn ki resevwar konplent pou fer avek landrwa travay *regularly*.

E en keksoz ki mon apresye, se ki dimoun i pli *proactive* konmela. Si zot konnen poudir i annan bann risk *they will call, they will write*. Kantmenm zot pa le met zot non, annan de fwa zot fer sa *anonymously*.

E mon tim, sa Departman *Compliance* ki ou vwar *DG* in koz lo la. I *very proactive*, i pa bokou zot. I apepre 8 zot. Me solman konman en konsern i vin devan, konman en konplent, oubyen en konsern, premye keksoz ki nou fer, nou *rise up the concerns so that there is an inspection*.

E mwan mon ensiste ki sa lenspeksyon i fer, donn mon en *plenary report so that* mon annan en nide. Akoz pou ekrir son rapor an gran, i pran en pti pe plis letan.

Be at least I have a plenary review ki sa bann konsern ki'n *come up* e ki aksyon nou pou pran lo la. E sa i regilye, toulezour nou *dispatcher team* dan diferan landrwa, ki pe al fer lenspeksyon.

So bann ki'n vin dan nou latansyon, e bann osi ki petet *months before*, ti annan en lenspeksyon. Prezan ti annan rekomandasyon e la nou bezwen al fer sa *review*.

E tou bann ki annan rekomandasyon nou bezwen al fer sa *review*. E la si pa an plas, nou ava al lo nou lot *stage of action*. Me solman *definitely on a daily basis*, avek resours ki nou annan, *this is done*. E mon kontan dir osi poudir sa seksyon pe ganny bann dimoun pli kalifye, ou kapab dir pou antre ladan ki nou pe met *safety as the paramount important*.

Akoz la i ansanm. I *Labour* avek *Labour Issues and then Safety*. Me solman nou oule konsantre plis lo *Safety on its own*. Se sa ki ou vwar mon'n dir dan mon larepons nou pou bezwen konmans nou konpany, lo *sensitization* e nou pe pran bann lendistri ki pli *at risk*, par egzantp konstriksyon *is then* bann kondisyon *stevedores and so on*.

Me solman mon ankouraze, aköz mon vwar mon tim i bokou pli kalib prezan. Mon ava les DG Mr Speaker pran sa lot bout. Mersi.

MR SPEAKER

Wi DG ou ava adres sa kestyon.

DG STEVE MONNAIE

Mersi Mr Speaker Onorab i annan diferan vizit ki bann lenspekter i fer, par egzantp i annan vizit rutin, i annan vizit *follow-up*, i annan vizit kot zot fer *jointly* avek lezot *agency*. E menm vizit kot i annan konplent oubyen lenvestigasyon i ganny fer.

E si nou pou koz zis lannen 2020 bann lenspekter in fer 808 vizit. E 808 vizit i parey mon'n dir ou i dan tou sa bann vizit ki mon'n nonmen. 2021 i annan 740 vizit e 2022 ziska Zanvyè ziska Zilyet i annan 315 vizit ki'n ganny fer.

Zis pou kouver en pti bout lo *risk allowance* parey Onorab Roucou osi leve, dan Lalwa Lanplwa i napa en provizyon pou *risk allowance*. Lalwa Lanplwa i koz lo *responsibility allowance and duty allowance*.

Me par kont i pa anpes sa anplwayer ek sa travayer annan en diskisyon baze lo severite oubyen bann risk ki asosye ek

sa louvraz, pou annan en diskisyon ek en *risk allowance* i ganny kouver dan son kontra.

E i arive dan bann lenstans kot Minis oubyen bann zofisyè pe fer, serten vizit kot sa topik i leve. Bann travayer i met sa pwèn devan e la sa rekomandasyon i ganny fer avek sa anplwayer, pou li vwar posibilite pou azout en *risk allowance* baze lo kantite louvraz e risk ki sa louvraz i annan. Mersi.

MR SPEAKER

Mersi. Mon'n depas mon 15 minit. Me selman mon a permet Onorab Pillay sa posibilite pou son kestyon.

HON SEBASTIEN PILLAY

Mon apresye mon pa ava abiz sa posibilite. *Straight forward* Minis, dan en program resaman mon pa pe servi medya pou koz lo ou Minister, me dan en program resaman ti kler ki i annan plizyer defayans lo pwennvi lenvestigasyon ki ou Minister i kapab fer, e safwasi ti pe koz lo kondisyon ki bann travayer i reste, kot zot pe travay.

So eski ou kapab dir nou, ki ou Minister pe fer pou adres bann defayans ki zot annan zisteman pour ki sa bann problem ki nou pe vwar pe

kontinyelman repete, kot bann travayer i *end-up* devan swa *Independence House*, swa dan bann landrwa, i ganny adrese?

E eski ou Minister pe pran en lapros pou regard en pe pli pre dan bann konplent ki travayer Seselwa, i anmennen dan zot landrwa travay? Mersi Mr Speaker.

MR SPEAKER

Mersi Minis ou repons silvouple.

MINISTER PATRICIA FRANCOURT

Mersi Mr Speaker. Mersi Onorab pou ou kestyon. Onorab parey mon'n dir mwan dan sa Departman, koman konplent i vini. E mon ankouraz dimoun, mon dir en lapel ankor la, mon ankouraz dimoun.

Sak vizit ki mon fer, mon ankouraz *staff* ki annan de fwa devan nou zot pa oule dir serten keksoz. Mon vwar zot, ou ti kapab vwar mwan petet de semenn pase. Semenn pase mon ti pe viz it de lotel, mon vwar *staff* separe avek *Management*, so that they en sans koz avek mwan.

Nou menm donn zot sa nimerò telefonn zot kapab *email*, zot kapab anvoy zot bann konplent e zot bann konsern *anonymous*. Mon ganny

petisyon, mon ganny tousala ki vin kot mwan e i enportan ki letan sa bann keksoz, *we investigate*.

E mon konnen poudir i tou lede, i travayer Seselwa, i travayer etranze. E nou bann kondisyon pou travayer etranze *again* parey DG in dir, i annan bann vizit ki i fer souvan *on a daily basis*. Nou annan en tim ki sorti dan Departman Lanplwa. E zot deor.

So letan zot deor, zot pe al fer egzakteman sa bann kalite *investigations*. E an plis ki sa enn bann keksoz, ki nou pe al entrodwir se donn bann travayer en *induction*.

Sirtou bann etranze, be selman Seselwa osi - en *induction* ki zot konpran zot drwa, *what they should do* letan zot annan *grievances*. E nou, nou, nou ankouraze pour bann *grievances come forward*. E mon vwar poudir an mezir, i vini nou pa asize lo la. Nou fer sir poudir nou pe ale, nou pe *investigate*. E *we hold them accountable*.

E mon kontan poudir nou pe reviz depi nou bann Lalwa, nou pe travay *very hard on the Employment Act*. Nou pe fer en review, pou regard tou keksoz dan son totalite. Nou pe servi maksimonm *manpower*, ki nou annan pou fer sa.

Nou pe revwar nou younit parey mon'n dir, kot nou pe met plis lanfaz, i annan *Labour issues which is one*. And the nou osi, nou pe al met lanfaz lo *the Safety issues*. Parey mon'n dir dan mon larepons, en dimoun ki mor i tro bokou. En dimoun ki ganny blese dan louvraz i tro bokou. *It should not be*. E alor i annan en *accountability* ki bezwen vini avek bann *employers* - tou *employers* pou zot realize, *that this is serious and we are serious in taking it further*.

So mon donn ou, mon garanti ki napa nanryen ki vin kot nou ki *goes unnoticed*. E mon fer en lapel ankor si ou okenn Manm ki annan keksoz ki zot anvi anmenn dan mon latansyon, mon toultan dir dan Lasanble *please bring it to my attention*. Mersi.

MR SPEAKER

Mersi nou a pas lo prosen kestyon. Nimero 124. Kestyon Onorab Egbert Aglae

HON EGBERT AGLAE

Mersi Mr Speaker. Bonzour Minis avek ou delegasyon.

Eski Minis i kapab dir ek sa Lasanble, ki plan son Minister pou adres sa size bann zenn ki san en travay e ki serten pe dormi dan bann landrwa

degradab e menm dan semen, avek bi remet zot lo bon semen lavi?

E ki program ledikasyon e sansibilizasyon ou Minister pe fer pou anpes plis sa mank lanplwa e degradasyon dan fason viv bann tel zenn? Mersi.

MR SPEAKER

Mersi Onorab Minis.

MINISTER PATRICIA FRANCOURT

Mersi Mr Speaker. Mersi Onorab pou ou kestyon. Mr Speaker i toultan en konsern ler nou vwar, serten zenn ki pa pran loportinite lanplwa, ki a zot laporte e zot tonm dan lenfliyans negativ.

I enportan pou fer resorti ki bokou, i ganny fer pou ankadre bann zenn ki bezwen lasistans pou retrouv en lanplwa.

Mon'n vin devan Lasanble a plizyer repriz pou eksplik nou bann program ki *target* nou bann zenn. Mr Speaker pou fer rapel, ankor enn fwa, Minister i annan de program ki *target* spesyalman bann zenn.

Sa se *My First Job Scheme*, e *Skills Development Program*. *My First Job Scheme*, i *target* bann zenn ki'n fini zot letid, kot en sant profesyonnel. Pou lannen 2021, dan 623 zenn ki ti

anrezistre lo program, selman 528 ki ti pe aktivman rod en lanplwa, 447 ladan ti ganny plase dan en lanplwa. Sa lannen depi Zanvye ziska Zilyet 2022, 757 in anrezistre. E selman 554 ki ti aktiv e 503 in ganny plase dan en lanplwa.

Minister i kontinyelman travay ek bann sant profesyonnel, pou donn diferan kozri, pou ankouraz zenn pour partisip dan sa program, osi byen ki devlop bann pratik travay, oubyen parey nou dir bann *work ethics*.

Pandan sa premye lannen ki sa zenn in antre dan lemonn travay, zofisye i fer vizit regilye pou asire, ki zot pe byen entegre dan zot landrwa travay. Dezyenmman Mr Speaker *Skills Development Program* i pou bann zenn aze depi 15an, ki swa in *drop out of school* oubyen pa'n ganny sans antre dan en sant profesyonnel.

Zot ganny plase dan landrwa travay kot la zot ganny *on the job training*. Zot osi ganny loportinite pou pran par dan diferan ki Minister i ofer anba *Reskilling Program*, kot apre zot ganny en sertifika.

Pou note ki Departman Lanplwa, i osi travay avek lekol segonder pou osi, donn en formasyon lo loportinite lanplwa e *work ethics*, avek

etidyan S3 ek S5. Pou lannen 2021, 209 zenn ti anrezistre lo *Skills Development Program* e 186, ti ganny plase *on the job training*.

Depi Zanvye, ziska Zilyet 2022, 236 zenn in anrezistre e ladan, dan 191 in fini ganny plase. Nou pe kontinyelman travay ek bann ka, bann ki pa ankore ganny en plasman, pou asire ki zot osi zot ganny asiste.

Mr Speaker sa bann statistik ki mon'n fek donnen, i koz pour li menm. I demontre ki lamazorite zenn i vin devan pou anrezistre e pran loportinite travay, e zot pe fer byen dan zot travay ki zot ladan.

An plis ki sa, de program ki mon'n fek mansyonnen, nou osi annan servis ki nou ofer pou bann lezot zenn, ki i pa tonm dan sa de kategori. Minister i reste angaze pou ed okenn zenn ki santi ki zot bezwen led, pou ganny en lanplwa ouswa *training*.

Mon profite pou lans en lapel ek bann zenn ankore enn fwa, pou raprose e la zot ava ganny asiste. Pou bann zenn ki pou en rezon ou en lot in tonm dan bann adiksyon, Minister i osi travay an etrwat kolaborasyon avek *DSAPTR*. Ki nou konnen koman *ABDAR* osi bann anplwayer, pou ankadre

zot pou kapab antre dan lemond travay.

E parey zot ava konstate, sa pa en travay fasil, e i demann bokou pasyans. An sa ki konsern edik nou bann zenn, Minister pe anmenn son servis pli pre ek la kominote. Nou'n komans lo La Digue Vandredi le Septanm. E pou al Praslin Vandredi, le 9 Septanm sa Vandredi dan en *Sensitization Fair*. E apre nou retourn lo Mahé.

Pandan sa de zour, bokou lenformasyon pe ganny donnen e nou ankouraz zot pou vizit, nou. Ankore mon pou fer rapel avek tou Onorab, ki lalis bann *vacancy* i ganny anvoy-e kot zot distrik e kot zot tou le semenn, avek bi desantraliz lenformasyon. E anmenn sa pli pre avek dimoun dan kominote.

Alor tou dimoun sirtou bann *leaders* lo nivo kominote,

I devret kapab donn en koudmen pou konsey bann zenn pou pran bann loportinite a zot laporte.

A sa pwen mon oule redir ankore se ki i annan louvraz, pou tou dimoun ki pe rod en lanplwa. Si zot pe ganny difikilte aproz, zot a ganny *training* oubyen Minister i ava asiste zot, ganny en lanplwa.

Mr Speaker pou reponn sa lot konponan kekyon Onorab, i

annan konsern pour nou tou ler nou vwar en zenn tonm dan sityasyon difisil. Me sa i pa neserman lye avek mank lanplwa.

Nou konnen ki annan serten nou zenn ki tonm dan move, lenfliyans fer move desizyon pou pa pran lanplwa. E sa i anmenn konsekans negativ pour zot. Sa bann move lenfliyans oubyen move konsey, i kapab fer zot tonm dan lalkol, drog e lezot konportman ki pa akseptab pou zot paran.

Ler sa i arive nou vwar ki konfli i komans dan lakour, e la paran i perdi kontrol ouswa zot menm, zot, zot zanfan zot deside pou reste an deor kot zot paran. An deor lakour akoz zot pa pare pou kontribye oubyen respekte Lakour zot paran.

Mr Speaker, si i ganny met dan nou latansyon, ki i annan en zenn ki pe dormi lo semen parey Onorab pe dir, Servis Sosyal ek Lapolis i travay ansanm pou plas zot dan en labri tanporer ki *safe*.

Counselling e referans pou ganny lezot servis adisyonnèl avek lezot partener e sipor pou ganny en lanplwa i osi ganny met a zot laporte. De plis, kontak i ganny fer avek zot fanmir, pou fer bann sesyon avek bi pou repar zot relasyon,

pou *rehabilitate* zot, pou retourn kot zot fanmir.

Mon osi oule azoute ki annan serten sa bann dimoun ki dan bezwen, zot refize servis, e napa bokou ki nou kapab fer. Departman Zafer Sosyal i touzour pare pou akey zot ler zot deside aksepte servis ki nou donnen. E parey nou dir *we do go the extra mile*, sirtou kot zenn i konsernen.

Alor nou fer en lapel ek bann Onorab, pour zot osi refer sa bann dimoun ki pe pas dan bann sityasyon, bann difikilte kot Departman Sosyal, pou zot ganny led ki zot bezwen.

Mr Speaker pour terminen mon le dir ki sakenn, de nou dan sa lasal e bann ki pe ekoute, nou kapab fer enn pti bout, pou ed gid bann zenn dan nou distrik pou reste pozitiv e minimiz risk ki zot tonm dan sityasyon difisil e afekte zot lavenir.

Mon profit sa lokazyon pou felisit, nou bann zenn ki pe pran e reste dan lanplwa. E demonstre bann bon valer travay. Mon ankouraz zot pou reste *focus*, gard sa motivasyon e kontinyen reste sa bon model pour lezot. Mersi Mr Speaker.

MR SPEAKER

Mersi Minis. Siplemanter Onorab Aglae.

HON EGBERT AGLAE

Mersi Minis pou ou larepons. Minis dan ou larepons ou'n site poudir i annan sa de program prensipal, *My First Job Scheme* avek *Skills Development*. Minis pour bann ki pa neserman kapab tonm dan sa de kategori. Se la ki mon pe met plis lanfaz, lo sa e sa bann group menm ki tonbe.

Petet Minis ki ou pe mazine pou fer enn pti pe an plis, anvi ki malgre zot seye zot pa arive. Zot bezwen annan sa sipor par deryer zot. E la kot mon a demann Minis, petet pou annan, parey oparavan, lo en zour spesifik kot zot kapab annan bann zofisye Lanplwa ki vin dan sa bann distrik.

E la zot kapab petet donn sa sipor sa bann zenn, pour zot kapab ganny en direksyon, byensir. Eski zot kapab fer sa?

Dezyenm Minis, menm si ozordi i annan bann diferan lanplwa ki pe ganny pibliye an blan ek nwanr. Me souvandfwa ler ou pe fer sa bann zenn ale, me larepons ki zot in gannyen i pa en larepons ki pozitiv. Premyerman, akoz i annan en tandans ki bokou bann landrwa kot zot ale - mon pa pe koz dan Gouvernman la mwan, sirtou dan prive.

Zot pa pe tro anvi pran sa bann zenn Seselwa zot. Me zot pe plito rod, swa bann etranze pou fer sa bann pos. Eski petet dan sa laliny, avek en sans ledikasyon e sansibilizasyon anver sa sekter li menm li, pour zot kapab konsider - sirtou sa bann zenn pa neserman annan en kalifikasyon. Me selman zot kapab ganny *at least*, met zot lo en *casual*, gete ki mannyer zot performen. E si zot fer byen, la zot kapab ganny anploye dan sa.

Eski sa i kapab osi bann konsiderasyon enn pti pe pli profon? Mersi.

MR SPEAKER

Mersi Onorab. Minis wi.

MINISTER PATRICIA FRANCOURT

Mersi Mr Speaker. Onorab ou premye bout ki ou pe koz petet nou *go* enn pti pe plis dan bann landrwa. Wi parey mon'n dir nou fek fer *Sensitization Fair*, ki nou'n fer La Digue semenn pase. Nou pe al Praslin Vandredi.

Aprè nou pe retourn lo Mahé by *saying* mon pe retourn lo Mahé, nou pe sey ogarde pou nou kapab fer li bann *Sensitization regional, right?* Petet i pou tro bokou pou fer

sak distrik. Me nou a fer li *regional*.

E sa i lo nou azanda pou nou regarde e plan sa vreman byen. Ou konnen en kantite i ganny fer pour nou bann zenn, kapab kalib pou zot kapab antre dan *training*. Nou seye, nou seye en kantite i pran, i komanse.

Me selman zot napa sa rezilyans, so zot napa sa bagaz, e zot tonbe. Nou pli gran difikilte i vin letan ou vwar zot pe al dan sibstans, *right*? Parey ou kapab vwar lo televizyon, not *so long ago*, nou ti annan en group, bann zenn ki nou'n *target* koman en premye group, ki zot deza lo *methadone* lo zot program *methadone*.

Me selman zot pa pran leres, bann *hardcore drugs*. E nou ti fer en lesey avek zot, en program vreman konpreansiv avek zot pou regarde. Mon krwar ti annan 11 nou ti komans avek, pou regarde si zot pe pran zot latizann, *because they have an illness right*? Si zot pe pran zot latizann, e zis zot *methadone*. *What can we do, with them?* E nou ti vwar poudir tou le 11 ti *attend* sa laklas ki nou ti *run for six weeks* e zot ti ankouraze.

E *at the same time* nou'n fer sa *partnership* avek APDAR pour donn zot, zot *rehabilitation*

at the same time. So si en group parey, ki vreman difisil *in make it out of the 11, we have ten* ki nou'n plas dan en plasman, *that's a success story right*? Enn malerezman pa ti kapab, akoz i ti lo bann leres sibstans. *That's the difficulty*. So sa ti en model pou montre i marse, letan ou ganny *the right* group of dimoun avek *the right* dezir pou sanze sa *behavior*, ki zot annan oubyen sa difikilte ki zot ladan.

E la i montre si sa group la, nou travay avek bann lenstitisyon, ki'n pran zot, nou'n mon'n asiz ek bann *general managers*. Mon pou fer zot konpran, sa *inclusion agenda* ki nou pe koz lo la. E *they've understood*. E nou annan apepre kat *establishment* - si mon pa tronpe - ki'n *join* nou, nou le fer *MOU* avek zot ki'n *join* nou pe pran sa bann zanfan.

E i annan in menm dir nou, *we can look how we support them, with the methadone program in house*.

Konnen nou'n fini donn zot, zot latizann la *and they work*. So *this is a success story* e nou le posibleman *replicate this*. So konpran sa group ki ou pe koz lo la, *this is the most at risk group*. E sanmenm sa group ki bezwen ankadre.

Be parey mon dir i pa en louvraz ki zis nou pou kapab fer nou tousel. *We need every single person.* Letan mon regard *statistics* pou ou distrik, ou annan zis 9 dimoun ki'n vin anrezistre kot nou, par kont ou get Grand Anse ou get Anse Boileau o bor, mon ganny 28, *so what is happening there?* Konpran?

Si zot vin anrezistre *we can catch them but if they don't, then* i pli difisil ou konpran? So mwan okenn bann *cases* Onorab, parey anmenn devan pou nou regarde. Me selman mon'n pran kont sa lide ki ou'n dir, nou osi nou annan menm lide avek ou *to regionalized the Sensitization Fair.* Mersi.

Mon krwar i annan en bout Mr Speaker, Mrs Dookley i le zis fer en pti komanter. Mersi.

MR SPEAKER

Mrs Dookley i ava azoute. Wi Mrs Dookley.

DG LETIMIE DOOKLEY

Bonzour tou bann Manm Onorab. Bonzour Mr Speaker. Onorab letan ou pe koz lo bann zenn ki petet bezwen sa letan pour zot -anplwayer i bezwen donn zot letan pour regarde si vreman zot travay pou anploye.

Se pour sa ki nou annan sa program *Skills Development Program.* Se la kot sa anplwayer, i vwar sa zenn i lo *training* e apre son 6 mwan, oubyen menm lan, i kapab ganny anploye.

E en lot pwen petet ki mon ti ava kontan fer resorti, ler ou'n dir ki i annan bann *vacancies* ki apre letan sa dimoun i al sa *interview* pa neserman gannyen. Oubyen larepons ki i gannyen pa neserman enn ki byen.

Nou ganny pa mal, dimoun ki'n vin raport sa kot nou e ler nou, nou konnen nou pran aksyon. Akoz si en dimoun in met *vacancy* avek lentansyon pou li pran en travayer etranze, kan nou annan dimoun, lokal dan nou sistenm ki annan sa kalifikasyon, avek sa bann kriter ki li i pe demande, nou annan en komite, en *GOP Committee* ki mon osi mon form par lo la. E nou pa pou *grant - approve* sa *GOP.* Akoz nou konnen, i annan dimoun la ki kapab pran sa.

So la ankor mon pe lans en lapel ek bann zenn ki sa i ariv avek zot, vin kot nou, les nou konnen e nou, nou ava fer le neser. Me selman sa *Skills Development Program,* i la efektifman pou donn sa zenn

sa posibilite pou li prouv son lekor e ganny anploye. Mersi.

MR SPEAKER

Mersi *DG*. Bon mon'n depas 15minit lo sa kestyon. Alor mon pou termin li la. Mon pou remersye Minis e son delegasyon. E mon a swet zot bon depar e bonn kontinyasyon. Mersi.

(MINISTER FRANCOURT AND DELEGATION WAS EXCUSED FROM THE HOUSE)

MR SPEAKER

Mersi nou a pran en ti poz *sanitizing*. Avan nou kontinyen silvouple avek lot delegasyon.

(technical break)

MR SPEAKER

Bonzour e byenveni Minis Rose-Marie Hoareau ki Minis pou Gouvernman Lokal e Devlopman Kominoter. E dan son delegasyon byenveni Mr Kevin Perine son Sekreter Prensipal e Mr Daniel son *DG* dan *District and Community Facilities*.

Nou la pou pran bann kestyon bann Manm. Mon *remind* zot, mon annan 15 minit par kestyon, e mon pa kapab fer

otreman. Premye kestyon i pou Onorab Rocky Uranie.

HON ROCKY URANIE

Mersi Mr Speaker. Bonzour Minis avek ou delegasyon. Bonzour tou koleg Onorab ankore en fwa. Mr Speaker mon ti le zis koriz sa dat le 17 pour le 27 dan mon kestyon.

Mon krwar Minis in bezwen vwar sa.

Swivan vizit *Daycare Centre La Digue* ki ti ganny fer le 27 Zanvye sa lannen par mwan menm konman *MNA, DA* e lezot zofisye Gouvernman Lokal, ti annan plizyer travay ki ti sipoze ganny fer konman renovasyon lo sa *Daycare*.

Eski Minis responsab i kapab dir nou, ki travay ki'n ganny fer ziska konmela lo sa *Daycare La Digue* pour anpese ki sityasyon i agrav plis?

Eski Minis i kapab donn nou sif konbyen ki *rent Daycare* in ogmante e par konbyen? Mersi Mr Speaker.

MR SPEAKER

Mersi Minis ou repons.

MINISTER ROSE-MARIE HOAREAU

Mersi Mr Speaker. E mersi Onorab pou ou kestyon. Mr Speaker, Minister Gouvernman Lokal i annan 15 *Daycare*

Centers dan 15 distrik ki i pe lwe avek diferan operater lo Mahé, Praslin ek La Digue.

Serten sa bann *Daycare Center* i date depi 1992 e i tre aparant ki pou bokou lannen sa bann lenfrastruktir in ganny neglizé. Mon kapab dir ki i vremen regretab pour ki nou'n vin zwenn sa bann fasilite, dan en tel leta.

Minister Gouvernman Lokal ek Zafer Kominoter in fer son mye, depi 2021, pou fer bann renovasyon pli irzan lo otan *Daycare* ki posib.

Logmantasyon an relasyon avek pri lokasyon, ti ganny diskite e agree dan en miting ki ti ganny fer avek sak operater an Zanvye 2022. Pandan sa bann miting tou keksoz, ti ganny pran an konsiderasyon e a lafen tou lede kote Minister ek operater ti tonm dakor lo en nouvo tarif, e en nouvo *Lease Agreement*. Sa nouvo tarif e sa nouvo Lagreman ti komans, an Mars 2022.

Mr Speaker serten renovasyon in deza ganny fer, lo *Daycare* La Digue. E sa i enkli travay plonber dan lakwizin e reparasyon bann *toilets*. Pour larestan renovasyon lo *Daycare Center* La Digue, nou ekspekte komans travay boner an 2023.

Travay renovasyon mazer ki pou ganny fer, i enkli travay lo sistenm elektrisite, travay plonber dan twalet ek *showers*, travay lo plafon, sanz potò lavarang ki'n ganny avarye. Osi byen ki met *floor tiles* dan twalet ek *shower*.

Sa travay in estimen i pou kout Minister R250mil. Mr Speaker pour sa nou'n fini, fer provizyon dan Bidze 2023. Mersi Mr Speaker.

MR SPEAKER

Mersi ou siplemanter Onorab Uranie.

HON ROCKY URANIE

Mersi Minis. Minis mon'n ganny en konversasyon ek detruwa paran e osi operater sa *Daycare*, mon'n tann ou dir ki zot in travay lo *toilet* e i ankor annan travay pou fer.

Mon ti a swete ki ou fer sa travay en pe irzan, akòz *right now toilet* pa pe marse. Sirtou *toilet* zanfan, li menm pa pe marse. Sa dimoun i vwar li bezwen servi delo pour li anpli pour li vid ladan.

So mon ti a swete, ki zot fer sa en pe irzan pou ed sityasyon. E sirtou elektrisite parey akòz zanfan i bezwen vantilasyon, zot dir zot in travay, me i annan landrwa ki fan, *ceiling fan* pa pe marse. E

alors vi ki *Daycare* zot pa kapab servi *standing fan*, pangar zanfan a bour ledwa ladan. So mon ti a swete ki sa travay, i ganny fer en pe irzan pou ede soulev sityasyon. Mersi.

MR SPEAKER

Mersi Minis. Mon krwar ou'n ekout son lapel e eski ou ti anvii fer okenn remark lo la? Briyevman silvouple.

MINISTER ROSE-MARIE HOAREAU

Byensir. Wi Mr Speaker mersi. Mersi Onorab. Mr Adeline deza pran note, pou nou kapab fer sa bann louvraz si ou santi i irzan.

Me selman nou, nou la nou sa operater ti'n kapab apros nou pou dir nou. Me selman la prezan ou'n anmenn sa dan nou latansyon, definitivman nou a tret li koman irzan. Mersi.

MR SPEAKER

Mersi. Nou lo *Daycare* La Digue. Onorab Larue.

HON FLORY LARUE

Mersi Mr Speaker. Bonzour Minis ek ou delegasyon. Mersi tou Manm e tou dimoun dan lakour. Mon ti a kontan demann Minis si i kapab dir nou kan dernyen fwa, ki renovasyon ti ganny fer lo

Daycare La Digue e si zot annan plan pour fer renovasyon lo lezot *Daycare*? Mersi.

MR SPEAKER

Mersi Onorab. Minis ou le adres sa kestyon?

MINISTER ROSE-MARIE HOAREAU

Wi mersi Mr Speaker. Mersi Onorab. Wi nou annan en *schedule* ki nou'n fini met dan Bidze pou lannen prosenn. Akoz parey mon'n dir dan sa 15 *Daycare Centers*. I annan bokou ladan ki bezwen renovasyon.

E avek kontrent Bidze, nou pe fer firamezir. Me selman sa renovasyon i kontinyen an 2023. E larzan in ganny mete dan Bidze pour sa. Mersi.

MR SPEAKER

Wi. Mersi *PS* ou le azoute?

PS KEVIN PERINE

Mersi Mr Speaker. Onorab zis pou azoute ki kot Minis in kite, trwa *Daycare* spesifik kot nou pou komans renovasyon lo la i pou Mont Fleuri, Baie Lazare e Anse Royale dan prosennman.

Akoz nou santi sa bann i bezwen latansyon imedya. Apre byensir larestan, pou ganny touse a lavenir.

MR SPEAKER

Mersi. Bon nou a pas lo prosen kestyon ki osi pou Onorab Uranie. Kestyon 126 Onorab Uranie.

HON ROCKY URANIE

Mersi Mr Speaker. Ti annan alokasyon R2milyon dan Bidze pour fer renovasyon lo batiman Ladministrasyon Distrik, eski Minis i kapab dir avek nou Lasanble;

Konbyen kontrakter ti *bid* pou sa proze? Lekel sa kontrakter ki'n ganny sa proze? Konbyen sa kontrakter pe pran pou fer sa proze e kan ki travay i ekspekte fini?

Ki nouvo fasilite e servis i espekte annan dan batiman Ladministrasyon Distrik ler travay i ganny konplete? Mersi Mr Speaker.

MR SPEAKER

Mersi Onorab Minis repons.

MINISTER ROSE-MARIE HOAREAU

Mersi Mr Speaker e mersi Onorab. Mr Speaker kantmenm tou lenformasyon par rapor avek sant kominoter La Digue i dan domenn piblik depi Septanm lannen pase, pou benefis bann dimoun ki pe swiv sesyon Lasanble, mon pou

briyevman reponn premye parti sa kestyon.

Premyerman prosesis *tender* pou sa proze ti ganny fer tout a swivan tou prosedir, *Procurement*. Trwa kontrakter ti *tender*, pardon, e enn ti ganny kontra. Sa proze in kout R2.2milyon.

Mr Speaker mon annan gran plezir pou mwan enform sa Lasanble, ki travay lo sant kominote La Digue, ti konplete an Zen 2022. Sant kominoter i sitye, lo premye letaz batiman Lofis Ladministrasyon Distrik.

Mr Speaker anefe batiman antye, i demann renovasyon an rezilta neglizans pour bokou lannen. Par kont en giz kontrent bidzeter. Ler nou'n pran lofis nou ti bezwen prioritiz travay. E sant kominoter ti en priyorite akoz li i ti vreman dan en *move* leta.

Kominote La Digue i aprezan annan, en sant kominoter ki an bonn leta, kot la prezan bann Digwa i kapab vin ansanm dan en landrwa konvenab, e dan en bon latmosfer.

Mr Speaker Minister in fer provizyon dan Bidze 2023, pou fer renovasyon lo *ground floor*, ki abrit Lofis Administrasyon Distrik e lezot ankor, avek lezot biro akoz sa osi i dan *move* leta. Enn fwa renovasyon i konplete

bann servis ki deza la, pou kontinyen fonksyonnen. Tel ki *library, SLA, Housing, SRC, e social worker*. Mersi Mr Speaker.

MR SPEAKER

Mersi Minis Onorab Uranie ou annan siplemanter?

HON ROCKY URANIE

Mersi mon kontan larepons Minis. Minis in dir, ki in ganny neglize pour bokou lannen. Me selman, pa bliye zot in vin, zot pa'n vin la pou vin vakans zot. Zot in vin travay so pou 2an apre 2an zot bezwen...

(Interruption)

MR SPEAKER

Ale, *order!*

HON ROCKY URANIE

... zot bezwen fer en keksoz.

(Interruption)

MR SPEAKER

Ale, *order*.

HON ROCKY URANIE

Zot bezwen fer en keksoz. Mersi Mr Speaker.

MR SPEAKER

So mon pa'n tann, eski mon mal mon pa'n tann okenn kestyon?

Alor avek sa nou a kapab pas lo prosen kestyon. Mersi.

Onorab Regina Esparon, ou kestyon 127.

HON REGINA ESPARON

Mersi Mr Speaker. Bonzour Minis ek ou delegasyon.

Eski Minis pou Gouvernman Lokal i kapab dir Lasanble, ki plan son Minister pou rekomans bann programm animasyon anba *Animators Scheme* dan bann distrik e ki bann kategori aktivite ki pou tonm anba sa programm? Mersi.

MR SPEAKER

Mersi Onorab. Minis ou repons, *please*.

MINISTER ROSE-MARIE HOAREAU

Mersi Mr Speaker, e mersi Onorab pour ou kestyon. Depi ki bann restriksyon mezir Lasante Piblik in ganny retire, diferan programm animasyon in deza komanse anba *Animators Scheme*, dan bann distrik lo Mahé e Praslin ek La Digue.

Mr Speaker *Animators Scheme* i la pou anmenn dimoun tou la, ansanm dan distrik atraver bann aktivite byen ankadre par enn ou plizyer animator. En animator i en endividi, avek en lentere en

konesans e en talan spesifik, ki i anvi partaz avek lakominote.

Mr Speaker, en legzanp tipik se sa program *Table Tennis* ki deza komanse lo nivo rezyon. E sa pe anglob bann zanfan sorti dan distrik Cascade, Pointe La Rue, Anse Aux Pins e Au Cap.

Animater pou sa program i Mr Jimmy Vel, Mr Vel i en zwer *table tennis* profesyonnel ki'n pran son retrait. E i pe dedye son letan, pour partaz son *skill* e konesans avek bann zanfan, avek bi fer zot enterese dan sa sport.

Mr Speaker, nou pe kontinyelman, ankouraz lenplimantasyon sa bann tel program vize laspe kiltirel, sport lwazir, edikasyonnel, lar e artizana eksetera, dan bann distrik.

La Mr Speaker, mon oule pran sa loportinite, pour lans en lapel avek nenport endividi ou nenport groupman, ki enterese avek devlopman program lo nivo distrik, pou kontakte zot *DA* respektif dan zot distrik pou en diskisyon.

Nou ti a kontan tous tou, group laz dan en kominote. Zanfan ziska sa ki pli aze. E sa *Scheme* i fer provizyon pour sa. Nou bi se anmenn la kominote ansanm, atraver divers aktivite

byen ankadre. Mersi Mr Speaker.

MR SPEAKER

Mersi. Siplemanter Onorab Esparon.

HON REGINA ESPARON

Mersi Minis pou ou larepons, Minis mon ti ava kontan konnen, konbyen larzan an tou ki ganny mete anba sa bann program? E ki alokasyon ki sak distrik i gannye pour demare ek zot program? Mersi.

MR SPEAKER

Mersi Onorab Minis.

MINISTER ROSE-MARIE HOAREAU

Mersi Onorab. Mersi Mr Speaker. Mon a les *PS* pran sa larepons silvouple.

MR SPEAKER

PS.

PS KEVIN PERINE

Mersi Mr Speaker. Onorab a ler aktyel nou annan nou en Bidze R3milyon, ki ganny mete pou program dan Sesel an antye. E i napa en alokasyon spesifik, pou sak distrik.

Par kont sak fwa ki annan aktivite, zot pou bezwen anvoy zot *proposal*. E la nou verifie,

nou gete kote nou kapab asiste. So pour sak distrik nou annan en sonm spesifik. Me sa 3milyon ki anglob Sesel an antye pou anglob pou lazenes, pour trwazyenm-az. Parey Minis in dir ki tous tou dimoun, dan programm tou dimoun. Mersi.

MR SPEAKER

Mersi PS. Onorab Vidot.

HON AUDREY VIDOT

Mersi Mr Speaker. Minis mon apresye ki Gouvernman Lokal i ankor vwar poudir bann tel programm, ki ansyen administrasyon ti deza etabli, i ankor pe marse e i annan son lefe pozitiv ki i kapab anmennen, lo distrik.

Alors pou ranforsi lo la, mon pe regarde anba sa *Scheme*, pou fer li pli transparan ankor - e pou vwar poudir vreman, keksoz i ganny fer byen - i annan en prosedir kriter, ou'n dir wi bann dimoun pou apros Ladministrasyon Distrik. Pou anpese ki okenn distrik oubyen vwar poudir, swa DA pe fer lapliferans avek serten endividi dan distrik,

Eski i annan en kriter spesifik, oubyen lankadreman ki zot in met an plas pou asire poudir sa dimoun ki pou ganny sa responsabilite, i enn ki

vreman kapab *meet* kriter baze lo sa bann demann ki zot, zot in demande pou enplimante dan distrik? Mersi.

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Onorab, e mersi Mr Speaker. Zisteman ler mon ti vin kot Minister. Ler mon ti ogard en pe dan bann *files*, bann programm e bann aktivite ki ti pe ganny fer, lo nivo distrik. Pa tou ki ti pe anmenn keksoz de benefis mon kapab dir, pa tou ki ti pe anmenn en bon rezilta.

Alor se pour kwa, nou'n reviz tou sa bann formalite, e sa bann keksoz ki nou bezwen met an plas pour fer sir, ki ler en dimoun i vin devan parey Mr Vel - Mr Vel nou konnen i en dimoun ki ti zve *table tennis*, i pa pe vin anbet nou. E in met, in deza komans demar sa programm.

Be zisteman, ler sa dimoun i al kot DA, i fer son dyalog avek DA. DA li i fer son rapor i anvoy kot nou Minister. E ansanm avek DA e si i neser, sa dimoun ki pe ofer son servis, nou tou nou fer en diskisyon.

E atraver sa diskisyon, nou pou vwar *the validity of* ofer sa dimoun ki i pe ofer. So tou keksoz i an plas, pou nou fer sir ki nou bann program i annan kot *Local Government*. Mon dakor avek ou, i annan bokou program lepase ki nou pou kontinyen devlope.

Akoz i ti mars byen. Me selman i annan serten ki nou pa pe *carry on* avek, e nou pe ranplas li par bann keksoz ki en pe pli *tangible*. Kot nou vwar, son valer pour lakominote. So tousala i an plas. E *at the end of the day*, sa bann keksoz koumsa la i baze lo kominikasyon.

Ou koz ek en dimoun, ou ekout li sa ki annan pou fer, nou regarde kot nou, nou kapab zwenn sa dimoun *half way*, e Minister i la, pou *support* e fer sir ki program dan distrik i ki marse. *So on the right path*.

MR SPEAKER

Mersi PS ti a kontan azout keksoz.

PS KEVIN PERINE

Mersi Mr Speaker. Dan sa kominikasyon ki ganny fer Onorab avek DA - sa dimoun ki vin devan, i bann kriter ki nou osi annan ki'n etabli a ler aktyel, nou pou rezon, pou sa dimoun kapab matir *enough*,

akoz si ou pe al *deal* ek zanfan, ou bezwen annan serten matirite. E nou'n dir poudir bann zanfan, bann zenn 25an e plis, ki nou ankadre lo sa program.

Me par kont depandan lo sirkonstans, nou kapab annan en animater ki annan 18an, depandan ki pe al fer. Fodre ou annan 25an, fodre ou annan en *proper program proposal* ki'n vin devan. Fodre ou *aim*, ou lobzektif i byen defini. E fodre ou annan ou kopi ou CV atase avek.

Letan nou'n resevwar tousala, e fodre ou mete ki kalite mezir ou pe al mezire. Apre sa program ki ou pe ekspekte ganny rannman dan lakominote oubyen dan lasosyete.

Letan nou resevwar tousala atraver DA, *Management Team* i asize ansanm. E pou azoute parey Minis in dir, la nou zwenn osi avek sa animater koman enn pti *interview*, pou en dyalog, pou nou gete le bi son program e la si tou keksoz i an plas, i deklanse.

Me selman i osi mansyonnen osi ki annan de fwa ki animater, i arive ki lalis animater in arive, ki nou pa'n aksepte. Depandan ki i pa pe

meet sa bann kriter ki ou pe mansyonnen. Mersi.

MR SPEAKER

Mersi. Kestyon Onorab Zialor.

HON NADDY ZIALOR

Mersi Mr Speaker. Bonzour Minis, *PS* avek delegasyon. Mon krwar i enportan ki nou *revive* nou bann distrik, e mon krwar i enportan osi ki nou annan, fer sir ki tou distrik, i bouz lo menm *pace*.

Avek sa, mon ti a kontan konnen dan konteks bann animater, eski nou pe ankouraz zot, a la baz volontarya, oubyen dan sa Bidze ki ou'n mansyonnen, i pou annan osi en kontribisyon ki pou ale anver sa bann animater pour ki vremen nou pe donn zot sa lankourazman pou *keep the program running?* Mersi Mr Speaker.

MR SPEAKER

Mersi. Minis.

MINISTER ROSE-MARIE HOAREAU

Mersi Mr Speaker. Mersi Onorab, wi definitivman i annan en kontribisyon ki Minister i fer pou sa bann animater kapab - zot pe donn zot letan apre tou.

Alor nou - nou koman nou dir - nou annan, nou kapab, nou donn nou pey zot depandan lo sa ki zot pe fer e kantite letan zot pe fer. Nou donn, i pa en lapey *as such*, me selman i en kontribisyon ki Minister i fer an rekonesan ki zot pe fer en gran servis pour lakominote. Mersi.

MR SPEAKER

Mersi Minis. Kestyon Onorab Mondon.

MR SPEAKER

Mersi Minis. Kestyon Onorab Mondon.

HON TERENCE MONDON

Mersi Mr Speaker. Bonn apre midi Minis avek ou delegasyon. Mon kestyon i relye lo Bidze zisteman.

An vi lenportans annan benn program devlopman parey dan nou bann distrik, ki provizyon zot pe fer pou 2023, pou nou kapab entansifye - si oule - i annan plis bann program pour nou bann zenn ki tonm dan sa kategori laz? Mersi Mr Speaker.

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Mr Speaker. Mersi Onorab. E la se le pwen kot mon lans en lapel avek zot tou ki la dan sa lasal.

Dan zot bann distrik zot annan petet bann *retirees*, i kapab en *teacher* ki anvi vin donn leson bann zanfan ki bezwen sa led apre travay, kot distrik. Ou kapab annan en madanm ki fer *crochet*, ki fer bann zafer sapo koko avek fey koko bann zafer koumsa, i kapab en dimoun ki kapab fer papay tournen.

It's down to you everybody in this room pou travay avek zot DA, pou idantifye sa bann dimoun dan zot distrik, ki kapab vin devan pou ede pou met sa bann program an plas. E i pa bezwen zis bann *retirees*. I kapab en dimoun ki par egzanp dizon ou annan en mizisyen dan ou distrik ki ti a kontan vin donn detrwat erdtan leson bann zanfan ki petet enterese zwe gitar, la kot Minister li i rantre i kapab aste enn de gitar met dan sa distrik pou sa zanfan annan pou li vin *practice* lo la.

So i annan en kantite keksoz ki MNAs ek DAs i kapab idantifye dan zot bann distrik respektif, anmenn sa bann sizesyon devan e nou Minister nou ava siporte. Akoz *at the end of the day*, nou oule ki nou

distrik i vibran, nou oule ki dimoun i vin ansanm, nou oule kiltiv sa lespri lapartaz. So ed nou e nou, nou a kapab fer sa bann program bouz pli devan. Mersi.

MR SPEAKER

Mersi. PS i oule azoute.

PS KEVIN PERINE

Mersi Mr Speaker. Onorab pou osi azoute, a ler aktyel bann program ki nou pe antisipe, ki an diskisyon pou anmennen ki deza pe komans son proposal pe komans drafte, i annan en program *intergeneration* ki nou pe anvi anmenn dan kominote.

E nou annan en *proposal* ki nou'n resevwar dan aktyel pou fer *self-defence classes* pou bann madanm dan rezyon santral. *Ok*, e pou bann madanm zenn fiy e nou annan en program ki nou pe travay avek *emergency crew*, ki nou anvi lanse en pe dan tou distrik lo Mahe, ki pou anmenn bann zenn ansanm ziska trwazyenmaz ansanm pou nou aprann danse, e pou mezir li pou fini par en gran *show*.

So tousala i bann program ki nou pe travay lo la ki nou anvi anmennen. E pou osi azoute parey ki Minis in dir nou osi *welcome* bann lezot

nide akoz Gouvernman Lokal, DA avek *program officers* zot menm pa pou kapab fer program lo zot tousel. Nou pou bezwen byensir bann *MNA*, e bann dimoun dan kominote ki krwar ki i annan en talan ki anvi vin devan e *please do so*. *Thank you*.

MR SPEAKER

Mersi. Mon a pran dernyen keston lo sa size e mon ava donn sa Onorab Gabriel.

HON CONRAD GABRIEL

Mersi Mr Speaker. Mersi Minis ek ou delegasyon. Byen presye bann pti aktivite. Mersi mon byen kontan mon'n ganny sans *attend* mwan osi. So Minis le bi se pour idantifye bann talan pou fitir pei, bann ki annan potansyel pou al pli devan.

Mon ti anvi konnen petet *once* nou'n dekouver sa bann talan ki arive ek sa bann manrmay, eski i pou annan en program swivi kontinyel pou nou petet etabli en, ganny nou Meday *Olympic* parey nou ti pe sey koz lo la?

Aprè Minis 2 lannen konsektiv zot in fer li Anse Aux Pins, mon ti a montan ot *switch* li, sanz distrik en pe, kapab fer li Pointe Larue *next year*, se sa. Mersi.

MR SPEAKER

Mersi. Minis.

MINISTER ROSE-MARIE HOAREAU

Mersi Mr Speaker. Onorab ou kapab dir mwan ki'n arive Anse Aux Pin dan 2an, mon pa'n tro konpran ? Mersi.

HON CONRAD GABRIEL

Sa aktivite in roul 2an konsektiv Anse Aux Pins dan distrik. Mr Jimmy Vel *table tennis* konpetisyon pou manrmay la, pou dekouver bann talan in fer 2an konsektiv Anse Aux Pins, *so next time* Mr Chair mon *believe*, zis nou *rotate* li en pe lezot distrik i a ganny partisipasyon maksimonm. Mersi.

MR SPEAKER

Mersi. Minis.

MINISTER ROSE-MARIE HOAREAU

Mersi Mr Speaker. Onorab mersi pou leklersisman. Annefe Mr Vel in fek komans demare sa program sa lannen. Me selman mon pe koz pou keksoz ki pe pase anba sa ladministrasyon. Mr Vel in demar sa program sa lannen.

Me selman ou pwen i valab aköz i pe anmenn li pli

lwen. I pe get - la i pe *consolidate* sa enn la dan sa premye rezyon, apre la i pou bouze. Nou bi se pou anmenn sa parey *mobile table tennis* dan tou distrik dan tou rezyon, pa dan tou distrik, me dan tou rezyon.

Me pou le moman i annan zis en Mr Vel, si ti annan en lot dimoun ki ti kapab vin devan pou donn li sa sipor - i konpran byen *table tennis* - i konn zwe byen.

Akoz at the end of the day sa groupman *table tennis* la, i pou gard zanfan okipe, tir zot lo semen, donn zot e pasyon pou devlop en talon kelkonk. So i en kantite keksoz ki vin ansanm. E nou bi avek Mr Vel pou le moman, se anmenn li dan lezot rezyon. Me selman si ou konn en dimoun Anse Aux Pins ki kapab ed nou, nou ti ava apresye. Mersi bokou. Me selman konnen poudir nou pou kouver partou. Mersi.

MR SPEAKER

Mersi Minis. Nou a pas lo prosen kestyon lo *Order Paper*. E sa se pou Onorab Sylvanne Lemiel. Son kestyon limero 128.

HON SYLVANNE LEMIEL

Mersi Mr Speaker. Bonzour Minis avek ou delegasyon. Mon kestyon i al *comme* swivan;

Pandan deba lo en Mosyon ki mon ti anmennen devan Lasanble Merkrede le 27 Zilyet 2022, Lasanble ti ganny enformen dan lentervansyon en Manm Onorab, ki Minister Gouvernman Lokal i ganny en Bidze R3milyon. E la Minis mon panse i ti pe refer avek alokasyon pou pti proze, e i ti dir ki ladan R500mil i ganny dedye pou koup pye dibwa.

Eski Minis i kapab konfirman si sa lenformasyon i konkret e vre, e donn sa Lasanble lenformasyon detaye lo sa size? Mersi.

MR SPEAKER

Mersi Onorab. Minis ou repons.

MINISTER ROSE-MARIE HOAREAU

Mersi Mr Speaker. Mersi Onorab. Mr Speaker an Oktob 2020 letan nouvo ladministrasyon ti pran lofis, Bidze pou Dezas e *Emergency* ti R9milyon. Dan sa 9milyon en porsyon 500mil *internally* dan Minister ti ganny dedye pou koup pye dibwa, e sa ti enkli osi pye dibwa lo later prive.

Me an 2021 avek kontrent bidzeter, Bidze pou Dezas ek *Emergency* ti redwir pou vin

R3milyon. Pou pli byen zer sa R3milyon nou ti decide pou retir sa fon 500mil ki ti dedye zis pou sa an 2020, ki ti dedye spesifikman pou sa pou koup pye dibwa, e les sa 3milyon ouver pou kouver tou laspe *emergency* ki ti kapab leve. Tel ki linondasyon, deboulman ros, pye dibwa li menm, eksetera, eksetera.

Akoz i pa vedir ki si petet par mal sans ler nou gete nou'n koup en - dezas in anmenn en ta pye dibwa tonbe, ki ou finalman *you go back to* R500mil. Me selman sa R500mil la i ti egziste li, me selman nou avek sa rediksyon dan Bidze nou'n plito, akoz i ti en keksoz *internal* ki ti ganny fer.

Alor nou'n prefere les sa 3milyon ouver, dil ek sa bann *emergencies* fir an mezir i arive, e mon pa ti a voudre nou ki nou pe pran en Bidze 500mil parey avan ki zot ti fer, kit li la, apre ler dezas i arive nou dir "arr be ou konnen tou larzan in fini, me selman nou ankor annan 500mil dan - en pe larzan dan sa 500mil.

So pou fer li pli fasil nou ouver en Bidze, nou pa'n tir okenn larzan R500mil parey ti ganny fer avan. E pou lenformasyon an 2021 nou'n servi R396mil, an 2021 pou

koup pye dibwa *emergency*. Ok ? E la ankor mon lans en lapel avek zot tou bann *MNAs* pou travay avek zot bann *DAs*, akoz si zot konnen i annan en pye dibwa ki en danze pou lakaz en dimoun, ouswa pou en semen, si zot konnen i annan bann potansyel dezas, nou kapab petet dil avek avan i tonm lo lakaz en dimoun.

So come forward si zot konnen, akoz sa larzan i la, pou anpes *emergency* - pou anpes dezas e osi pou servi pou dezas. E mwan mon en dimoun ki mon kontan si fodre *as much as possible*, annou sey prevwar avan en gro maler i arive. E parey mon dir sa Bidze R3milyon i kouver tou keksoz. I kouver linondasyon, ros deboule lateras grennen, enkli bann pye dibwa. Mersi Mr Speaker.

MR SPEAKER

Mersi Minis. Siplemanter Onorab Lemiel?

HON SYLVANNE LEMIEL

Mersi Minis pou larepons ou kestyon. E mon ti a kontan petet dir Onorab atraver ou Mr Speaker, letan ki mon koleg Onorab ti fer sorti sa pwen dan son lentervansyon e sa se Onorab Norbert Loizeau, ki i ti fer nou konpran tre byen poudir

i annan sa sonm. Mersi Onorab pou sa lenformasyon, akoz nou, nou pa ti konnen lo sa kote isi. Mon a dir mersi Onorab pou fer nou konnen.

Me ladan Minis, mon ti pou vreman kontan konnen la kantite pye dibwa ki anba sa fon dezans depi sa bout 2020 ki ou dir ti sorti tan milyon anba sa 900 ekek milyon ki zot ti gannnen, ki kantite pye dibwa zot ki'n kapab koupe 2020 ziska 2021?

Oubyen sa lannen osi anba sa fon si ou'n gannnen, si ou annan sa larzan la parey ou'n dir in ouver, Bidze in desann in ouver, ki kantite pye dibwa depi Zanvye par egzans ziska la Zilyet or Out ki kantite nou'n gannnen?

Akoz Mr Speaker mon ti a kontan met devan Minis, Minis mon'n deza ganny en pti antretyen avek ou, ki mon ti met serten *issues* distrik devan e ladan ti annan *issues* pye dibwa danzere ki kapab afekte dimoun. Me selman i domaz ki Anse Royale pa'n war naryen in ganny fer.

So prezan ki la mon okouran atraver Lasanble ler ou'n vin reponn kestyon, ki ou pe dir nou poudir wi mon'n tann ou ou'n nonm lakour prive, si i en danze ki kapab ganny arive, i paret mwan ki zot

pe fer, petet ti a bon mon konnen osi dan bann distrik ki'n benefisyè depi sa 2020, '21 e en bout la '22?

Ki bann distrik ki'n benefisyè e ki kantite larzan in al atraver sa bann distrik, pou koup sa bann pye dibwa danzere ki nou'n ganny konsidere anba 'Dezans?' Mersi.

MR SPEAKER

Mersi. Minis ou a regarde, ou repons.

MINISTER ROSE-MARIE HOAREAU

Wi Mr Speaker. Mon pou reponn en pe apre mon pou kit en pe pou Mr Adeline avek *PS*.

Zis pou eklersi nou, nou ti vin dan ladministrasyon an - mwan annefe mon ti antre dan Minister an Novanm 2020, alor tou sa ki'n pase avan Novanm 2020, se la kot nou'n vwar dan *file* bann labi. Akoz nou bann labi ki par egzans en kontrakter i ganny en kontra - zis avan eleksyon en kontrakter i ganny en kontra R150mil pou koup pye dibwa dan en serten distrik, e napa *proposal*, napa *file*, napa *tender* napa naryen, R150mil i en gro sonm larzan.

So bokou sa bann keksoz ki'n arive avan Novanm 2020 ler mwan mon'n antre, mon'n sey konpran ki pe pase dan

Minister, e se la konmsi ki ou ganny leksperyans ou vwar levidans poudir ti annan bokou labi.

Ti annan dimoun - E mon bezwen fer resorti Onorab poudir depi ki nou, nou la dan Minister koman nouvo *Management unless* i en ka vreman spesifik baze lo sosyoekonomik sa dimoun, sa fanmir, nou pa koupe pye dibwa lo later prive an gran nonm parey ti ganny fer avan.

Se pour kwa prezan en lord in ganny mete, nou konnen ler en pye dibwa i en *threat*, i en *real threat*. Prezan la koman nou pe koze la i annan en *file* ki nou pe dil avek - mon pou donn ou legzanp kot i annan en propriyete, sa dimoun li i reste dan milye, toultour son propriyete i an en kantite dibwa - en kantite pye dibwa ki pe koz danze pou sa bann dimoun ki reste akote.

Sa bann dimoun in vin war mwan, mon'n fer mon *DG* al koz ek son met sa later pou mwan fer li konpran, sa later i ou later, sa danze i pou afekte en malere, alors silvouple pran ou responsabilite koup ou pye dibwa. Akoz sa dimoun i kapab fer li, ou konpran?

Alor, mon oule fer li kler poudir sa bann - ki mannyer mon kapab dir sa – sa bann labi

nepli - anfen nou pe fer sir ki nou elimin li ouswa plis ankor ki nou kapab. Bon, pou bann pri egzakt, mwan mon'n donn ou sa *chiffre* 2021, zis pou montre poudir wi ti annan R500mil. Wi ti annan dan Bidze avan, me nou osi nou ti'n kapab kontiny lo menn laliny.

Me selman R3milyon in vin pli pti gin ki 9milyon. Nou napa sa privez pou nou pran 500mil met de kote apre fer labi avek, ou konpran? So ou'n demann bann lenformasyon konkret lo *different years*, sa nou a kapab volonterman donn ou, me selman nou napa lenformasyon la nou a fer ou biro gannyen avek garanti. Mersi Mr Chair.

MR SPEAKER

Mersi Minis. Nou a pran en pe siplemanter? *PS* oule azoute vitman *please*.

PS KEVIN PERINE

Mersi Mr Speaker. Onorab etandonnen ki ou'n mansyonnen poudir ou distrik i annan seren ka ki pa'n ganny gete, si sa in vreman arive *therefore we do apologies* lo nou par. Petet osi i ti annan en mankman *DA* en serten letan dan ou distrik, ki pa'n anvoy lenformasyon sa *file*. Me apre Lasanble nou kapab ganny en

dyalog nou a kapab vwar sa bann ka. *Ok? Alright.* Mersi bokou.

MR SPEAKER

Mersi. Nou a pran kestyon Onorab Vidot.

HON AUDREY VIDOT

Mersi Mr Speaker. Minis letan ou pe dir ek nou poudir ou pe koz lo labi le pase, eski ou pe dir nou ozordi si nou lo sa kote, nou pa ti tande atraver mon koleg Onorab Loizeau poudir i annan sa larzan ki pe ganny koupe, nou osi nou pa ti pou konnen si i annan pilferers petet dan serten distrik. So labi i kontinyen? So si ou kapab eklersi sa pou nou.

E dezyenmman Minis, eski letan ou pe dir danzere, nou konpran wi dan konteks ros deboule, lateras, petet an term kot pozisyon serten pye dibwa, ki ou bezwen get konteks sa distrik. Mon donn en legzanp parey mon distrik Roche Caiman, *ok?*

Nou annan bokou konsern ki bann dimoun ki zot lakour i baliz avek *highway*, e menm si nou met serten konsern devan lezot Lazans, i annan bann pye sed ki lo later prive e i annan ki ou zanmen ou war *owner*, fodre ler nou mont

lo la ki i pou konnen poudir zot egziste.

E letan nou rod led pou koupe, personn a lafen dizour pa oule pran okenn fason pou soulaz distrik pou adres sa bann konsern. So eski zot pe osi get konteks serten distrik dan sa bann prosis, pou zot ede dan koup pye dibwa?

MR SPEAKER

Annou sey al en pe vit avek sa bann kestyon siplemanter silvouple, akoz nou letan pe al lo limit. Minis ou repons silvouple.

MINISTER ROSE-MARIE HOAREAU

Mersi Mr Speaker. Mr Speaker mon kapab dir avek Onorab Vidot poudir labi i redwir e i kapab menm ganny eliminen ler ou annan en sistenm an plas.

Akoz la parey sa legzanp sa Kontra R150mil pou koup pye dibwa dan en serten distrik, ti napa en formalite, ti napa ni en *file*, zis sa msye ti *turn-up* ek son *invoice* mon ti bezwen met li asiz eksplik li akoz sa i pa posib. So labi la, labi si ou annan sistenm, mon pa dir i pou 100poursan, me omwen la volonte i la, si i annan en sistenm ek en prosedir e bann DAs i konnen *they are being*

held accountable pou zot bann aksyon konmela.

E nou annan serten lord kot Minister konmela. E ziska prezan keksoz pe mars byen. Si par egzant sa ka spesifik ki ou pe dir dan ou distrik, mon ti a voudre ou vin kot nou, vin fer sa konversyon avek nou avek Mr Adeline avek DG Songor ki ansarz sa bann zafer e si nou kapab *facilitate* petet i pa tonm kot nou, petet i tonm kot en lot Lazans.

Me nou, nou ava e ou pou fer bann, ed ou ouswa sa bann dimoun ki pe ganny afekte pou *facilitate* zot pou war en solisyon.

Ankor i vin lo dyalog, i vin lo kominikasyon, e nou, nou a fer - mon pa dir nou pou kapab rezourd tou problem, me selman nou ava kapab ouver en dyalog e anmenn lezot Lazans *onboard* si nesaser, pou regarde ki nou kapab fer pou ariv lo en solisyon. Mersi Mr Speaker.

MR SPEAKER

Mersi Minis. Onorab Aglae siplemanter.

HON EGBERT AGLAE

Mersi Mr speaker. Minis mon ti a kontan demann ou pou eklersi nou Lasanble la, kwa ki ou pou konsider en pye dibwa koman *emergency* pou koupe?

E eski zot annan en prosedir mon kapab dir an term *guidelines* osi?

Pour ki nou kler e konpran ler ou pe aprouve pou koup bann pye dibwa, aköz dan lepase in annan bann sityasyon kot menm si bann pye dibwa pe menas lakaz, sa endividi ki ti pe rod sa sipor in ganny vir an ron e zanmen pye dibwa in ganny koupe. So sa i enn.

E dezyenman Minis, eski tou ou bann DA i konn sa lenformasyon ki ou'n donn ek Lasanble ozordi, aköz mwan ler mon'n refer, mon annan 2 DA depi ler mon'n zwenn la anba nouvo ladministrasyon, zot in fer mwan konnen poudir napa larzan pou koup pye dibwa e se sa ki mwan mon'n ganny dir ziska ozordi. Mersi.

MR SPEAKER

Mersi Onorab. Minis.

MINISTER ROSE-MARIE HOAREAU

Mersi Onorab. Mersi Mr Speaker. Onorab premye bout ou kestyon ti lo kan ki en pye dibwa i en *emergency, right? Is that* premye bout ou kestyon? Wi, ok.

En pye dibwa i en *emergency* ler par egzant i lo lakaz en dimoun. Sa nou'n met li dan kad *emergency*, dezas en

gro divan, gro lapli, lateras i grennen i anmenn ek li en pye dibwa, i tonm lo lakaz en dimoun, i tonm lo loto en dimoun, sa i vin en dezaz, sa pye dibwa i en *emergency*.

En pye dibwa i en *emergency* ler apre en gro koud bann dizon, parey mon'n dir en dimoun i vin kot mwan semenn pase dan mon klinik, dan mon klinik ki mon fer dan Zedi ler dimoun i demann pou war mwan, i pe akont mwan son sor. Mon'n fer *DG* i koz ek sa dimoun, akoz sa ti en dimoun prive ki bezwen pran son responsabilite pa les son pye dibwa tonm lo lakaz en lafanmir.

So, mon kapab osi donn ou en legzanp ki mon war dan *file* ler mon ti vin kot Minister. En pye dibwa ti a pe debout, *tender* in ganny fer, 3500, R4mil pou *involve* koup sa pye dibwa anmenn li lo *landfill* al zete. Malerezman letan *file* pe bouze, pye dibwa i tonb - i tonm, akoz i ti en danze lo en *court*, ti en *playing field* - en *court*, selman ti annan baraz ti annan feray – *fencing, that's the word*.

Pye dibwa i tonbe anba, prezan sa pye dibwa i tonbe in en *emergency*, ou konnen konbyen ti pou ganny peye si mon pa ti'n arete, R26mil.

Konpran mwan? Sa pye dibwa ti pe debout li son pli o *tender* mon krwar ti R4mil. Le moman sa pye dibwa i tonbe i vin en *emergency* i vin R26mil.

So, napa en *label* ki dir en pye dibwa i en *emergency*. Se nou ki bezwen servi nou *common sense* pou vwar. *I mean* mwan ler mon'n war sa *file* mon dir non, trwa kar louvraz in fini fer, pye dibwa in ariv ater ki mannyer *suddenly* i vin pli ser ki ler i ti *tender* i ti ankor pe debout?

Sa bann legzanp labi ki mon pe sey donner dan sa bann zafer pye dibwa. Se pour kwa prezan sa bann pye dibwa ki konsern nou kot *Local Government* i anba, *Emergencies*. I limit sa bann kalite labi ou konpran? I elimin sa bann kalite labi e ou annan devan nou bann *genuine cases*. So, *again*, zot annan *genuine cases* dan zot distrik, anmenn devan *socioe-conomic report* i enportan pou nou konnen koman nou pou dil ek sa sityasyon. Apre pa bliye i annan bann lezot Lazans osi ki dil ek koup pye dibwa, pa zis nou.

Ou dezyenm parti ou kestyon ti...? *Oh yes*, nou bann *DAs* i konnen sa bann lenformasyon e se *DAs facilitate*. Toultan mon dir

bann *DAs* e bann fasilitater. Zot annan en problem par egzantp dizon si ou anmenn en problem kot ou distrik zot devret pran tou lenformasyon, *interview* sa fanmir, al fer sa *site visit*, al gete si tou sa lenformasyon i konkret, *compile* en dosye, anvoy kot nou.

E vwala si nou santi i en dezas potansyel, ouswa i en keksoz ki pou vin en *emergency* pli tar, nou a dil avek nou. Me selman baze lo *socio-economic report*. Me si par egzantp i en keksoz ki nou kapab refer sa fanmir ek en lot Lazans lala kot *DA* son rol fasilitater i vini. I ava refer - Nou ava gid li pou li refer sa *file* kot en lot Lazans. Alor toultan si en *case i genuine* la, i annan son solisyon. I annan. Mersi Mr Speaker.

MR SPEAKER

Mersi. Bon i sanble mwan sa kestyon i annan en kantite gran lentere lo lapar bann Manm. Mon a demann zot fer zot kestyon vit e direk. Onorab Pillay. Nou dan *extra time* la.

HON SEBASTIEN PILLAY

Mersi Mr Speaker. Mon pe al *score goal* la. Minis ki mon ti a kontan demann ou, pou mwan le mon'n ekout ou mon en pti pe dezapwente avek ou larepons lo sa size labi. Mon krwar nou

lentansyon se pou pa met *on the defensive*, me pou fer ou bouz devan.

E nou pe sey fer ou konpran poudir i annan en defayans dan lafason ki nou pe tret sa sityasyon pye dibwa e ki i annan en persepsyon ki dan serten distrik, mon pou dir li kler dan serten distrik kot i annan *MNA LDS* pye dibwa i ganny koupe, e dan serten distrik kot napa *MNA LDS* pye dibwa pa ganny koupe.

(Interruption)

HON SEBASTIEN PILLAY

(Mon'n dir -persepsyon, *relax* zot lekor)

Prezan sa ki mon ti a kontan gannyen avek ou Minis, se donn nou en *clear path* - par egzantp en dimoun ki reste dan nenport ki distrik nou vwar poudir en pye dibwa dapre nou *common sense* i poz en *emergency*, i poz en danze ant nou raport sa problem avek ou lofis ek ou Minister ek sa pye dibwa ganny koupe, konbyen letan i kapab pran?

E dezyenmman mon dezyenm kestyon Mr Speaker ki vremen enportan:

Prenon konsiderasyon dan sirkonstans kot bann pye dibwa i koz en danze pou en

lakour, kot sa dimoun li menm pa pou zanmen kapab *afford* pou pey sa pye dibwa, eski ou kapab *advise* bann Lotorite Distrik pou pa pe servi en *one line* ki dir koupe ou menm.

Me *at least* annan en pe konpasyon e regard dan en fason *meanstest* sa *case*, pour ki sa dimoun i a kapab ganny en rekour, akoz si non ler pou tonbe definitivman en dimoun pou vin dir ou 26mil eksetera. Mersi Mr Speaker.

MR SPEAKER

Mersi. Minis ou repons *please*.

MINISTER ROSE-MARIE HOAREAU

Mersi Mr Speaker. Mersi Onorab. Mon a reponn sa kestyon an bref apre si mon bann koleg la lo mon de kote i oule pran li an plis detay zot ava pran li.

Premyerman mon pou dres sa persepsyon. Mon kontan ou dir en persepsyon, akoz bi kot Minister, kot *management* Minister Gouvernman Lokal ek zafer kominoter se ki, pou tir bann persepsyon. Alors annou travay lo *facts*, dir sa bann dimoun ki annan sa bann persepsyon pou anmenn zot pwen, zot bann *facts* devan kot zot distrik.

Si zot santi zot oule anmenn li kot direkteman kot Minister, nou laport i ouver me selman *when you have facts* elimin persepsyon. E parey mon'n dir *Local Government* i la pou gard bann distrik dan tou fason kot nou kapab dan en fason *safe* pou son bann zabitan.

Ou'n demann mon ler en dimoun i anmenn son *case* devan ki zon *timeline*? *Well*, son *timeline* napa en *timeline* spesifik, mon kapab dir egzakt. Parske petet si sa problemn i tonm zis kot nou, nou, nou kapab dil avek ase apre en *site visits*, *socio-economic reports* ankor. Nou kapab dil avek ase vit.

Si prezan nou bezwen anmenn lezot *agencies onboard* i kapab pran en pti gin plis letan. So i difisil pou donn ou en *timeframe* egzakt. Me selman le bi se *sort out* sa *issue as soon as possible*. Akoz parey ou dir si i en *case genuine* tou dimoun pou *visibly* vwar poudir i pou vin en problemn si nou pa dil ek li apre sa.

E koup ou menm, i pa en keksoz ki nou pou ankouraze, nou ankouraz dyalog. Nou pa ankouraze bann *one liners* "koup ou menm." Nou fer en dyalog. Nou koz ek sa dimoun parey sa enn ki mon'n dir nou

pe koz ek li la, *as we speak* pou dir li pran ou responsabilite.

So en keksoz ki nou fer sir konmela i ganny fer, ki bann dimoun ki merite i ganny lasistans, se ler nou koz ek zot nou get en pti pe zot sityasyon finansyel, apre nou gete kote nou, ouswa en lot Lazans i kapab antre.

Sa mwan toultan mon dir zot dan sa Lasanble- *I want – I am a solution finding person. I don't play the blame game. I find a solution as much as I can.*
Mersi Mr Speaker.

MR SPEAKER

Mersi Minis. Onorab Henrie.

HON GERVAIS HENRIE

Mersi Mr Speaker. Mon kestyon i annan pou fer avek larepons ki Minis in donnen taler, konsernan lenformasyon ki bann administrater distrik i gannyen avek *Headquarters* lo - savedir si i annan en alokasyon bidzeter pou zot Minister ki bann *budget line* bann distrik i kapab *tap into*.

Mon oule demann sa kestyon, akoz leta mon'n *MNA* ant 2016 a 2020, a plizyer reprim *Local Government* in entervenir e koup dibwa dan distrik. E sa in posib akoz *DA* sa letan ki ozordi i *DA* Roche Caiman, ti okouran sa

lenformasyon e mwan avek li nou'n nobou fer sa.

Donk mon anvi ki ou konfirmen poudir sa lenformasyon bann *DA* i dwatet konnen *what budget lines* zot kapab *tap into*, akoz lot kote in annan 3 Manm ki'n *DA*, Anse Royale, Port Glaud, Roche Caiman. E ozordi zot pa kapab fer nou krwar poudir zot pa okouran. I pa posib ! Mersi Mr Speaker.

(Off-Mic)

MR SPEAKER

Mersi. Bon nou a permet Minis reponn silvouple. E nou avanse avek sa kestyon. Minis.

MINISTER ROSE-MARIE HOAREAU

Mersi Onorab. Mr Speaker annefe mon krwar

(Off-Mic)

MR SPEAKER

Onorab Pillay aret enteronp mwan silvouple. Minis kontinyen silvouple. *Proceed.*

MINISTER ROSE-MARIE HOAREAU

Wi, Mr Speaker *again*, koup pye dibwa kot Minister *Local Government* i *form part* bann *emergency situations*. Bann

DAs i konnen sa, akoz bann DAs i okouran ki dan en ka *emergency* koman keksoz i arive dan distrik, *Management Team* kot Minister, i *kick-in* depandan lo groser sa dezaz ki'n koz a pye dibwa pou tonbe.

Minis, bann *Management Finans*, *PS*, *DG* ki responsab pou sa Departman, tousala i konnen poudir ler en maler in arive nou pou vwar sa larzan pou nou ede. E *again this is where* nou diferan avek avan, parey mon'n dir sa Bidze 3milyon i ouver. Savedir i la pou ede dan tou dezaz enkli pye dibwa ki form part *emergencies*.

E DAs i konnen. E la zot pou re tann ankor ler mon dir zot deza konnen poudir kot Minister nou pa pou zanmen *turn away* en sityasyon ki *genuine*. E sa mon krwar i eksplik tou keksoz, kot larzan i konsernen. Mersi Mr Speaker.

MR SPEAKER

Mersi Minis. Onorab Arissol. Sandy.

HON SANDY ARISSOL

Mersi Mr Speaker. Bonn apre midi Minis avek tou dimoun ki pe ekoute. Mr Speaker mon ti a kontan dir ek Minis koman *MNA LDS*, mon pa ganny okenn faver par *Local Government* mwan, e nou pa dir ek dimoun

kop pye dibwa zot menm Bel Ombre. Mon *DA* i okouran tou sa bann lenformasyon ki ou pe donner.

Me sa ki nou osi dir ek nou bann dimoun, nou dir ek zot pou zot pa les en pye dibwa vin groser en montanny apre pou zot tap laport partou. Nou ankouraz nou bann dimoun Bel Ombre pou dil ek sityasyon ler i ankor pti, pa les li vin gro.

Me sa ki nou pe fer Bel Ombre se sa *socio-economic report* ansanm ek mon *DA* parske nou annan plizyer *case* Bel Ombre. Kestyon ki mon ti a kontan demann Minis, eski *Cabinet*, *Local Government*, Minister Lanvironnman atraver *Forestry*, zot pe revwar bann Lalwa, parske mazorite bann pye dibwa ki nou pe dil avek *DA* distrik, se bann pye dibwa al lo later prive bann endividi, ki asiz Langleter, *Australie*, *Canada* e zot espekte zabitan Bel Ombre avek lezot dimoun netway zot propriyete, pou anpes li vin en danze pou mon bann zabitan Bel Ombre. Eski i annan en travay ki pe ganny fer lo sa nivo? Mersi bokou.

MR SPEAKER

Mersi. Minis ou repons *please*?

MINISTER ROSE-MARIE HOAREAU

Mersi Onorab. Mr Speaker mersi. Mon kapab reponn ziska en serten *amount*, en serten degre mon kapab dir.

Wi, nou souvandfwa nou annan sa bann sityasyon kot propriyete pa la zot *abroad*, me selman zot propriyete pe petet afekte en lot dimoun. I annan en diskisyon ki'n komans ganny fer ant bann diferan Lazans ki annan en Bidze, en bout Bidze kelkonk pou koup pye dibwa.

And mon napa gran soz pou raporte ozordi, me selman zi pou retir ou Onorab ki nou'n deza fer nou premye *meeting*, nou'n *bring onboard* tou bann larzan ki annan en pti bout Bidze koup pye dibwa, pou nou kapab get koman *going forward* nou kapab zer sa pli *efficiently* vizavi zisteman bann problemn parey ou'n fer resorti.

Alor nou'n fer en keksoz ki nou'n deza konsyan, e nou pou bezwen war en solisyon atraver sa dyalog. Me dyalog i fek komanse e petet ankor dan detrwa mwan nou kapab *come with a solution at Cabinet level*. Mersi. *Thank you*.

MR SPEAKER

Mersi. Mon a bezwen bouz lo dernyen kestyon lo papye. E sa se kestyon Onorab Aglae son kestyon 129.

HON EGBERT AGLAE

Mersi Mr Speaker. Kestyon *comme swivan*;

Swivan elevman bann restriksyon par Mister Lasante ,kot bann aktivite distrik in rebran, eski Minis i kapab dir ek sa Lasanble, ki bann nouvo tarif kot i konsern lwe bann fasilite distrik? Eski i annan sanzman dan bann pri ki atase avek bann servis osi tel ki lwe sez ouswa latab? Mersi.

MR SPEAKER

Mersi Onorab. Minis.

MINISTER ROSE-MARIE HOAREAU

Mr Speaker. Mersi Onorab. Bann sant kominoter dan distrik lo Mahe Praslin ek La Digue i ganny lwe ek bann endividi oubyen groupman pou *meetings* e napa okenn ogmantasyon dan pti lokasyon, lokasyon i reste R250 par erdtan *up to* 3erdtan.

Pou bann lezot fonksyon tel ki bann *private parties*, Maryaz, Premyer Konminyon, eksepte pri i varye ant R3mil a R4500, depandan lo kapasite sa *Community Center* e son leta ki i ladan. Resaman dan en *meeting* konsiltatif ki nou ti fer at *Management* kot Minister avek bann *DAs*, nou ti pran en

desizyon pou aret ler sez ek latab.

Akoz? Rezon i senp. Sez ti pe ganny lwe pou en pti R5 oubyen R10. Latab ti pe ganny lwe R10 ouswa R15, e sa nou ti vwar i pa ti *rentable*. Akoz bokou fwa sa bann sez ek sa bann latab i kase e nou pa kapab ranplas li pou sa pri ki nou'n lwe li. Alor Minister ti deside pou aret lwe sez avek latab e les sa biznes sez ek latab avek bann pri biznes dan kominote. Les zot debourye, les zot fer sa servis.

Me par kont, i neserer pou mwan dir ki dan plizyer sirkonstans depandan lo bi ek kalite levennman ki pe pran plas, nou asiste avek lasal pou naryen, nou pa fer dimoun peye akoz sa i ganny deside dapre rezondet sa fonksyon.

Par egzamp, nou pa pou al fer en group trwazyenm a pey en sant pou fer zot miting *annual* or zot *monthly meetings* or *whatever*. Nou pa pou fer en group volonter ki pe anmenn en benefis pou distrik peye pou fer sa ki zot pe vin fer dan en sant.

Nou pa pou fer bann group dezabilite ki petet pe fer en keksoz pou zot group dimoun. So dan tou keksoz i annan en leksepsyon, e sa bann eksepsyon ki nou i kapab annan lezot bann lezot rezon

byen valab ki nou kapab donn sa sant pou naryen, me selman pou sa bann avan ki mon dir sa i annan son pri. Mersi Mr Speaker.

MR SPEAKER

Mersi. Siplemanter Onorab Aglae.

HON EGBERT AGLAE

Mersi Minis. Vitman en siplemanter. Minis i annan distrik petet ki zot napa sa bann servis, kot parey si zot anvi lwe en sez ouswa en latab.

Akoz petet Minister DA son *guideline* kondisyon ki mon pe lwe ou mon sez mon latab, ouswa en lasal, okenn keksoz ki ou kase *you are liable* pou ou pey sa keksoz, ouswa rann sa keksoz. Akoz ou pa met sa petet i a osi kre en pe lord dan sa kalite servis li menm? Mersi.

MR SPEAKER

Mersi. Minis ou a adres sa?

MINISTER ROSE-MARIE HOAREAU

Mersi Mr Speaker. Mersi Onorab. Malerezman Onorab nou'n aprann nou leson e nou'n aprann li *in a hard way*. *You keep people accountable*, ou donn zot, zot responsabilite *and* ou pou pe pas ou letan pe tay

deryer en boug pou li rann ou en lataab.

E mwan mon kapab servi mon letan pli prodiktivman ki pe *chase up* lo peyman en lataab kase. Menm mon pou dir ler nou lwe lasal pou bann fonksyon parey Maryaz, eksetera Premyer Konminyon, nou'n vwar nou bezwen met en *additional deposit* R500. Akoz? Akoz dimoun i ale ki kit sant sal. Prezan nou, nou bezwen rod en dimoun pou fer vin netwaye. Si ou netwaye ou kit landrwa prop, ou *deposit* R500 i ganny rann ou, me laplipar ditan nou war nou pe servi sa R500 pou fer en lot dimoun vin fer en netwayaz.

Mon ti a voudre dimoun ti en pe pli responsab. Me *look, at the end of the day* i pa vedir nou ferm laport nou dir non. Fir an mezir ki dimoun i vin pou responsab, nou a gete si nou kapab peye reprodwir sa servis. Me pou lemoman nou'n vremen aprann *the hard way*. So pou le moman i koumsa. Mersi Mr Speaker.

MR SPEAKER

Mersi Minis. Mon remersye Minis avek son delegasyon pou zot partisipasyon dan reponn kestasyon. Mon swet zot bonn kontinyasyon e bonn sikse dan zot travay. Lasanble i a pran

poz la e nou a rebran 2er edmi. Mersi.

(BREAK)

MR SPEAKER

Bonn apre midi tou dimoun, bann Manm, *staff* e nou piblik. Bon nou pe komans avek en *Bill* ki devan nou. Madanm raporter, mon a demann ou apel Minis ek son delegasyon.

Antretan mon a zis fer enn pti remark pou bann Manm. Zot a remarke nou pe pran *First e Second Reading*, sa *Bill* menm zour. I en pratik ki nou ti pe sey evite. Me selman mon a zis eksplike ki, *Assembly Business Committee*, ti konsider sa e nou ti dir, vi ki bann Manm in ganny dekwa *notice* pour sa *Bill*.

E nou ti bezwen ranpli nou *Order Paper* pour sa sesyon la. Alor nou ti aksepte ki nou kapab fer *First ek Second Reading* lo menm zour. So, zot a konpran akoz nou'n ariv koumsa ,ki en pratik ki nou pe sey evite byensir. Mon espere ki bann Manm in ganny ase letan pou etidye, travay e diskite lo sa *Bill*.

Bon mon dir bonzour e byenveni Minis pour Ledikasyon Dr Justin Valentin. E dan son delegasyon Mrs Shirley Choppy, *CEO Institute of*

Early Childhood Development. E Ms Amelie Nourrice, *Legal Draftsperson* dan *AG's Office*. E byensir nou isi pou konsider, *Early Childhood Development Bill, 2022*. *Chief Whip* ou ki ansarz *Bill* ozordi, mon ava envit ou pou fer Mosyon pou *Second Reading*.

HON SANDY ARISSOL

Bonn apre midi Mr Speaker. Bonn apre midi Minis avek ou lekup. Tou dimoun ki a lekout. Mr Speaker anba *Standing Orders 97(1)* mon le *move* byensir avek ou permisyon, pou nou *suspend Order 69(1)* pou permet ki *Bill Early Childhood Development Bill, 2022* i ganny lir en Dezyenm Fwa, malgre ki sa peryod 7 zour pa ankor ekspire depi ki'n ganny lir pour Premye Fwa. Mersi.

MR SPEAKER

Onorab Henrie, wi segonnman?

HON GERVAIS HENRIE

Mersi Mr Speaker. Bonn apre midi tou dimoun. *Motion seconded*.

MR SPEAKER

Mersi nou a demann bann Manm pou vot lo sa Mosyon pou *waive 7 days notice*. Manm ki an faver lev lanmen silvouple? Mersi Manm ki

kont? Lo Mosyon pou *waive second days requirement for the Second Reading of The Early Childhood Development Bill, 2022* - 16 Manm in vot pour 0 kont e 7 abstansyon. Alor nou'n ganny *approval* Lasanble pou kontinyen avek *Second Reading*. E mon retourn ankor kot *Chief Whip*, Onorab Arissol.

HON SANDY ARISSOL

Mersi Mr Speaker. Mon le *move* anba *Order 69(2)* ki *Bill Early Childhood Development Bill, 2022*, i ganny lir en Dezyenm Fwa. Mersi.

MR SPEAKER

Mersi mon a ganny segonnman silvouple? Onorab Henrie.

HON GERVAIS HENRIE

Mersi Mr Speaker. *Motion seconded*.

MR SPEAKER

Mersi. Avek sa mon a kapab apel Minis, pou li fer son prezantasyon lo *Bill*.

MINISTER JUSTIN VALENTIN

Mersi Mr Speaker. Bonn apre midi Mr Speaker. Bonn apre midi tou Manm Onorab, e bonn apre midi tou bann dimoun ki pe ekout nou apre midi.

Mr Speaker travay lo sa *Bill* ti ganny, inisye lannen

pase, swivan laprouvasyon Konsey Minis e sinyatir Lagreman avek *UNESCO* par Minis Ledikasyon, pour transform e etabli *IECD*, koman en sant enternasyonal pou Pti Anfans.

Lobzektif sa *Bill* se pour adapte bann provizyon, ki dan Lalwa aktyel e moderniz li, anliny avek lobligasyon ki dan Lagreman *UNESCO* ki Sesel in sinyen. Pli preziman an relasyon avek *UNESCO* Kategori *2 Centres for ECCE*.

E pou permet *IECD* anba *auspice UNESCO* pou fonksyonn efektivman. An menm enstan promouvwar lenstiti, koman en reglater pou ogmant sibstansyelman, pour enkli *Daycare centers* ek asir kalite, bann lakres e son bann lezot rol, i reste pou promouvwar devlopman entegral bann zanfan.

E etabli en kad referans Nasyonal, pou swen lasante e ledikasyon Pti Anfans. Son fonksyon anba seksyon 3, kot i konsern lanrezisteman bann servis, e fer an sort ki *service providers* i enplimant bann standar nasyonal e *guidelines* ki regulariz swen zanfan, e lezot letablisman dan Larepublik.

Sa *Bill* pour osi, ede adres bann mankman e defi ; reponn demann e legzizans dan sa

sekte ; klarifye bann mal konprezon e konsern parmi bann partener kle.

E asir konsistans dan bann servis. Lenstiti pou reste koman sa antite legal e prensipal, avek bi pou anmenn amelyorasyon dan bann fasilite ki ofer servis swen zanfan.

Ofer en ledikasyon de kalite pour bann pti zanfan depi laz 0-5an. E plis progre e lavansman lo en lesel pli larz nasyonalman e enternasyonalman dan bann domenn Pti Anfans.

Finalman sa *Bill* pe osi propoz pou donn lenstiti, en baz legal pou fonksyonn koman en sant enternasyonal pou *ECCE* an konformite avek lobligasyon *UNESCO Category 2 Centres*.

E an plis ki sa lo nivo rezyonal e enternasyonal, ogmant vizibilite Larepublik Sesel e lenstiti avek son tim zesyon e *leadership*.

Mr Speaker Gouvernman in met swen e proteksyon zanfan koman en laspe enportan dan devlopman sosyete Sesel. Lalwa Pti Anfans pe zisteman ganny aziste pour fer sa dezir Gouvernman vin en realite.

Sa lamannman ki mon pe prezante, pe osi ede ki fer serten servis swen zanfan, i reste enn ki ekonomikman profitab e

aksesib dan bann kominote dan Sesel.

Sa *Bill* in ganny organize an 9 parti. Tit sa *Bill* i konsistan avek term zeneral, ki anglob tou bann laspe esansyel dan son sou sekter, anliny avek bann norm e pratik enternasyonal.

Sa i enkli ledikasyon, swen e lasante, proteksyon zanfan, *quality assurance*, langazman lafanmir e lakominote eksetera. Alor sa *Bill* i en kad legal tre konpreansiv e kontanporen ki pou adres devlopman dan Pti Anfans.

Mr Speaker an konklizyon sa Prozedlwa ki devan nou, i pli konplet e i azour avek nouvo manda parey mon'n dir, pou Lenstiti Devlopman Pti Anfans e koman en sant *UNESCO* Kategori 2.

Prozedlwa i donn *IECD* en pli gran rol koman regilater e lasirans kalite, dan *non-compulsory education*, ranforsi son bann lezot fonksyon avek plis kapasite ki lenstiti pour gannyen. Avek sa, i pli byen konsolid son pozisyon, lo nivo nasyonal, rezyonal e koman en sant enternasyonal anba direksyon Sesel e osi byen ki *UNESCO*.

Avek sa nouvo kad legal, *IECD* pou aprezan pli byen pase pou anmenn transformasyon e

plis progre lo en lot nivo dan sekter ledikasyon, swen e lasante zanfan, lafanmir, devlopman kominote eksetera.

I pou asir en bon komansman dan lavi bann zanfan, e fondasyon pli for e pli solid pour laprantisaz formel, e reisi dan zot letid pli tar. Kontribye ver realizasyon lobzektif *SDG4.2*. E an retour i ava anmenn en lenvestisman ekonomik ki pli soutenab pour nou pei e pour bann lezot Manm *UNESCO* e lorganizasyon enternasyonal, ki *IECD* pour travay an etrwat kolaborasyon dan sa domenn.

Avek sa lentrodiksyon Mr Speaker, mon annan en plezir pou demann Lasanble pou konsider sa Prozedlwa, e pour donn zot sipor pour benefis bann zanfan, bann dimoun ki ofer servis swen zanfan, bann paran, lakominote, e Sesel an zeneral. Mersi Mr Speaker.

MR SPEAKER

Mersi Minis. Nou ava ouver lasal pou deba bann Manm lo *Bill*. Onorab John Hoareau ou pou komanse.

HON JOHN HOAREAU

Mersi Mr Speaker. Bonn apre midi tou dimoun. Bonn apre midi tou Manm. Mr Speaker sa *Bill* ki devan nou, i enn ki pou

donn en *framework legal* pour *IECD*, lenstiti ki antreprann travay pour *Early Childhood Care and Education*, pour li etabli bann standar e bann kalite dan swen e ledikasyon pou bann Pti Anfans.

Mr Speaker sa *Bill* i osi reflekte, en partenarya ki'n devlope ant sa lenstiti e *UNESCO*. Parey nou bezwen konstate, Lenstiti Ledikasyon pour Pti Anfans e Devlopman, in enn ki'n vremen aktiv dan Sesel pou li anmenn kalite e anmenn standar dan swen pour bann pti zanfan.

E sa in ganny rekonnet apre ki zot ti etabli, premyerman zot *international framework*. Sa in ganny rekonnet par *UNESCO* dan Karantyenm Sesyon Konferans Zeneral, le 15 Novanm 2019, ki Sesel in ganny rekonnet koman en *Category 2 Centres*.

Vedir en *hub for best practices*. E ler nou pe koz en *hub for best practices* i vedir sa lenstitisyon i ganny eleve par progre ki zot in fer, in ganny eleve koman en sant. Si oule lekselans en sant, ki kapab ofer lezot sant dan larezyon, bann konsey, bann program ki pou permet zot osi ariv menm standar avek nou.

E nou fyer koman en pep, en pti pep preski 100mil

dimoun, ki nou'n kapab *achieve* sa ki bokou bann lezot gran pei pa ankor kapab *achieve* sa kalite swen ki nou pe donn nou bann pti zanfan.

Mr Speaker, ki sa i vedir? Sesel in fer progre remarkab parey mon'n dir, e i lo bon semen pou li zwenn bann *target SDG4*. Pli prensipalman parey Minis in koz lo la, *SDG4.2* ki koz lo akse ledikasyon iniversel. E ekitab e devlopman e swen pour bann Pti Anfans par lannen 2030.

E nou, nou'n preski ariv la avan 2030. E se sa travay dir ki sa lenstiti in fer, pou fer ki *UNESCO* in kapab rekonnet sa lenstiti e elev li a sa nivo. Parey mon pe dir, atraver sa rekognisyon *UNESCO*, pou ed Sesel avek plis resours ankor, plis kapasite dan devlopman profesyonnalizm, devlopman program, lasistans pou anmenn standar. E kalite swen, e osi devlop Polisi e Lalwa.

Savedir ki ler ou'n ganny eleve a sa nivo, ou ganny plis akse ankor avek *UNESCO* ki pou kapab elev ou ankor menm pli o. Sa *Bill* i pa fer zis provizyon pou kalite swen, e standar, me i osi fer pou sa lenstiti zer en *Trust Fund*. Ki pou ede avek bann *Grants*, pou donn bann dimoun ki annan

bann pti proze, ki annan pou fer ek swen Pti Anfans.

E dan lepase nou'n vwar ki zot in, fer osi kado bann lo zouzou, e fer bann organiz bann *workshop* baze lo sikomotrisite, e pour detekte osi bann problem laprantisaz a en laz ase zenn. I fer provizyon pou donn *training*, bann ki le pran sa kalite louvraz koman en karyer, dan swen Pti Anfans, e osi koman en biznes.

Ozordi Mr Speaker, plis ki 2000 paran, pe benefisye avek lasistans finansyel pour *child care*. Sa i en benefis, ki zot pey bann landrwa ki anrezistre, pour ki bann zanfan i kapab, bann paran i kapab ganny sa swen pour zot zanfan a en kou pli abordab.

Sa i permet bokou paran pou kontinyen kontribye dan devlopman pei, menm ki zot annan enn pti zanfan avek zot. *So parenthood*, i pa en rezon pou ou pa kontinyen travay, al fer ou zournen. E fer en kontribisyon pou pei. Lasistans finansyel i osi ganny donneren pou pey bann *assistant childminders*.

Alors sa, sa ki anrezistre avek *IECD* i benefisye bokou, avek bi pour zot donn en servis de kalite, en pli bon servis nou bann zanfan. Sa *Bill* pe osi fer provizyon pou *monitor* e evalye

bann landrwa ki donn swen zanfan, pou fer sir ki sa bann zanfan i dan sekirite. E pa pe ganny abize fizikalman, par bann menm dimoun ki sipoze, donn zot sa swen e proteksyon.

E zot ganny benefis ki Leta i met a zot dispozisyon. Zis pou donn en nide, lo bann statistik Mr Speaker avan mon terminen,

An 2017-2021 i ti annan bokou keksoz ki sa lenstiti in detekte e in anmenn son soutyen. Par egzamp zot ti detekte ti annan apepre 11 ka, kot ti annan bann pti zanfan par anba laz lan ki ti pe ganny veye. Sa i kont bann provizyon sa lenstiti. Alor i ler zot detekte bann keksoz koumsa, zot anmenn soutyen, zot anmenn remedye pour sa bann lenstitisyon. Zot fer sir ki sa bann keksoz pa kontinyen arive. *Over quota* ti 27 ka, so savedir nou *still* annan louvraz pour fer. Kot *quota* vedir *staffing, ratio* ant bann pti zanfan pa ti pe ganny respekte.

I annan ka osi kot bann pti landrwa, ki pe fer *childminding* pa *welcome* bann lenspekter. So i annan progre la pou fer. E pli gro problem se bann landrwa kot i annan *poor hygiene*. Alor Mr Speaker, sa *Bill* i enn ki pe al dan bon direksyon, i pe donn plis zouti

avek *IECD* koman en lenstitisyon, pour li kapab govern byen sa lapse *early childhood care and education*.

E par sa zot in develop an prensip apepre 12 standar, standar lo *staffing, administrasyon, training, physical planning and development, infrastructure and design, safety, public health, child health, nutrition, child rights and protection, early learning interaction e interaction relationship with parents*.

So sa i bann standar ki ganny devlope, pou fer sir ki nou bann pti zanfan ler zot ganny *entrusted* pou zot ganny en *care* dan en landrwa *childcare*, ki *provide childcare* oubyen *childminding*, i fer ki sa swen i en swen de kalite, i en swen ki pa zis zot al laba zis pou zwe.

Me zot ganny osi bann pti *basic education and training*, ki pou zot kapab prepar zot pou antre dan lakres pli tar e pli tar osi dan premye, dezyenm e trwazyenm e kontinyen zot letid.

Mr Speaker avek sa, mon siport sa *Bill*, akoz i annan en kantite merit. E mon osi salye en kantite zefor ki sa Gouvernman pe fer, pou fer sir ki ledikasyon Pti Anfans i ganny *taken care of*. E i osi nou

provide en framework legal, ki pou kapab vwar si i annan keksoz ki mal e kapab pran ka avek. Mersi Mr Speaker.

MR SPEAKER

Mersi Onorab. Mon envit Onorab Audrey Vidot pou pran laparol.

HON AUDREY VIDOT

Mersi Mr Speaker. Bonn apre midi Minis avek ou delegasyon. Mr Speaker apre ki *IECD* in ganny etabli an 2014 avek bi promot en lapros zeneral dan developman zanfan, e etabli en lankadremman legal, pou swen nou bann zanfan, spesyalman nou bann Pti Anfans, e zot developman personnel, parey nenport ki lenstitisyon, in annan bokou lakonplisman e ensi ki defi.

Alors i reste enportan ki i annan en serten revi, dan okenn lankadremman legal ki en tel lenstitisyon, pour li asir byensir sa sekirite, sa servis e swen ki nou bann zanfan i merite ozordi Sesel.

Osi byen ki bann pti biznes, tel parey *childminding* avek *Daycare*, ki permet zot kapab enplimant e ranforsi zot bann lankadremman travay pou donn sa bon swen e servis latansyon nou bann pti zanfan. Pou prepar zot pour ki ler zot al

dan lot kad nivo ledikasyon, zot in pare e byen prepare ek bon swen.

Atraver ou Mr Speaker mwan mon pou zwenn mon koleg Onorab Hoareau, kot in rekonnèt progre lo devlopman Pti Anfans Sesel. Sa depi ler in etabli, pe enport defi ki'n kapab egziste parey nenport ki lenstitisyon. Me bann keksoz pozitiv, e nou'n vwar bokou nou bann zanfan kot in benefisyè atraver bann striktir ki'n la, ki'n permet zot kapab devlop zot. E bokou nou bann zanfan, pe epanouir ozordi.

Me malgre bokou in ganny fer, in annan bokou kritik, kritik ki konstriktiv ki'n ede permet *IECD* ek bann lezot organ, ki zwenn avek *IECD* pou permet li kapab donn sa bon swen nou bann zanfan. Me in annan bann kritik osi ki pa'n neserman konstriktiv.

E sa in osi kree bokou ditor, dan serten prose, ki nou'n vwar e nou'n menm dan lepase, dan sizyenm Lasanble, kot nou'n tann bokou Manm Onorab dan Lopozisyon a sa letan, kot in kritik serten fason lankadremman oubyen, keksoz ki bann dimoun ki dan biznes osi zot in zwenn pou koz lo sa bann size.

E nou'n vwar i annan de ka kot i tris, kot i annan ki'n

vwar ki ou a krwar in ganny servi, aköz ozordi letan nou pe regarde, a lafen dizour, nou pe vwar ki sa menm Lopozisyon sa letan, ki ozordi i dan Gouvernman, pe *welcome* sa bann swadizan keksoz ki serten ti pe ganny kritike. Ki pa ti bon e ozordi i pli bon ki tou.

E mon swete ki atraver sa Lalwa ozordi, i annan en konsansis ki, parey Minis pe demann nou pou nou siporte, mon swete ki sa voyaz i annan en konsansis ant *Bills Committee*, tou Manm ki keksoz i pa ganny sanze, letan sa *Bill* i pase ozordi. E mon swete ki bann, ki'n ganny servi, zot realize poudir zot pa les zot ankor tonm dan bann tel latrap.

Me lesansyel se ki lorganizasyon i bezwen travay ansanm avek diferan bann *Daycare centers* enkli bann *childminding*, pou asire ki sa Lalwa, sa striktir ki an plas i permet zot kapab travay ansanm.

E ganny byen ankadre pou benefis pli enportan se devlopman, e sekirite nou bann zanfan, pour ki nou kapab ede kontribye a en tre zenn-az, avan ler zanfan i vin bann adolesan. Pou zot kapab byen ganny sa loportinite, pou zot ariv en zour sa ki zot anvi vini. Mersi Mr Speaker.

MR SPEAKER

Mersi Onorab. Mon ava prezan apel, onorab Waven William.

HON WAVEN WILLIAM

Mersi Mr Speaker. Bonn apre midi Minis avek ou lekip. Mr Speaker, mon vwar ki direksyon sa *Bill* pe ale. E letan nou pe koz standar dan ledikasyon, e nou tou isi anndan koman Manm Lasanble. Nou konsyan bann rezilta, ki nou bann zenn pe sorti avek ozordi dan lekol primer avek segonder. E sa nesosite pou o standar.

E alor mon santi poudir sa Prozedlwa la i tre enportan, si nou pe *aim* ver lekselans. E pour fer sir ki bann zanfan a lavenir, e bann ki la ozordi, ki letan zot antre dan primer, e segonder, zot in kapab ganny sa bon *framework* e baz pou zot kapab komans zot letid dan primer avek dan segonder ki finalman Mr Speaker, nou ava vwar dan lavenir bann rezilta ki byen e ase performan.

Mr Speaker dan lepase mon'n enn sa Manm Lasanble, e mon asire madanm Choppy pou dakor ki in vwar dan enn de bann *meeting*. E mon'n fer bann plizyer *aside meeting* avek bann diferan group *childminders*.

Pou mwan kapab sey konpran zot bann plent zot ti pe

met devan. E osi sey konpran ki *IECD* ti pe anvi fer. Me mon kapab dir madanm Choppy ki ozordi mon pli byen konpran, kwa ki *IECD* ti pe sey fer. Me mon'n osi konpran, sityasyon e realite bann endividi ki ti'n pran sa linisyativ pou zot kouver bann *childminding centers*.

E petet dan zot lespri anba sa tenm Leve Debourye, zot ti pe *focus* petet zis lo sa lapse en *income* ki mon gannyen. Me pa tro met lanfaz lo devlopman sa bann Pti Anfans. So mon santi poudir avek sa standar ki nou anvi, atraver sa *Bill*, i anmenn osi avek li en detrwa kestasyon ki mon ti a kontan ki Minis, ouswa Mrs Choppy zot kapab reponn, letan zot pe fer zot *summing-up*.

Par egzanp setyenm Lasanble pe al vot sa *Bill*. Mwan mon anvi zot dir avek Lasanble, akoz petet pa bokou nou ki annan sa lenformasyon, ki kantite *childminders* ozordi ki nou annan Sesel.

Dezyenmman ki zot *rating* ouswa standar, akoz ki arive se ki ou pou anmenn sanzman, e kestasyon ki monte i eski nou bann dimoun in prepare pou sa sanzman ? Akoz lenstiti petet li in pare, me eski bann resipyan zot in pare pour zot *follow* sa bann sanzman ki pe vin ?

E mon asire i bezwen annan lespas pou *training*. Me

lot kestyon se ki. Eski bann *stakeholders* mon pe koz bann *childminders*, zot in ganny angaze dan en proses pou nou ariv la kot nou été ? Ki demen bomaten, letan sa Lalwa i vin an viger, bann benefisyan zot vremen anliny e *align* avek nouvo Lalwa?

Mr Speaker mon lot konsern se ki, la ankor mon santi poudir konsiltasyon i pou enportan. Mon pa ti a kontan war petet trouve dan lavenir, ki avek sa Lalwa, napa serten fleksibilite pou kapab permet serten sa bann dimoun *upgrade* zot standar.

E ki sipor zot pou gannyen pour zot kapab *upgrade* zot standar. Akoz parey monn dir, lafason ki'n komanse, nivo dimoun ki'n al dan sa biznes in fer ki zot pa'n vremen konpran enn pti pe poudir nou bezwen lev standar nou bann Pti Anfans.

So sa enn de bann kestyon. E mon pa ti a kontan osi vwar, ki enn Lalwa pa donn ase lespas bann dimoun pou kapab *upgrade*. Dezyenmman ki nou pa vwar, zis serten groser. Par egzantp *Daycare*, bann *childminders* i ganny touye. Konmsi nou bezwen, annan en balans dan sa lapros, pou fer sir ki enn ;-

Primordyal standar i reste, ki dan lavenir nou kapab ganny bann rezilta enportan.

Mr Speaker avek sa de mo, mon kontan, mon kontan vwar ki nou pe al dan sa direksyon ekselans. E se sa nou pe rode. Minis ankor nou pou *remind* ou poudir, lo kote segonder sa Lekol Ekselans ki plizyer fwa in vin dan Lasanble. Nou ti a kontan osi sa i materyalize. Mon konnen zot pe diskite, pe sey fer zot mye. Akoz, si tousala i tonm anliny Mr Speaker, mon asire ki nou bann zenn ozordi dan lavenir, zot pou donn nou bon rezilta. Mersi.

MR SPEAKER

Mersi Onorab. Mon ava vremen, mon a pas laparol avek Onorab Lemiel.

HON SYLVANNE LEMIEL

Mersi Mr Speaker. Bonn apre midi Minis avek ou delegasyon. Tou mon bann koleg Manm Onorab e tou bann dimoun ki pe ekout nou ozordi. Mr Speaker, avek sa Lalwa *IECD* ki'n vin devan nou ozordi.

Mon kapab dir i fer mwan en plezir koman en dimoun ki'n travay pre avek *IECD* mon kapab dir. Mrs Choppy mon krwar i mazine ki letan mon ti pe resevwar program an Departman Gouvernman Lokal,

sa letan la koman zot Direkter Zeneral pou program, nou ti travay tre, tre pre.

Sirtou letan ti konsern kote standar. Ti pe set standar pou bann *childminders*, kot i ti'n kree bann komite. Nou ti'n annan bann group volonter ki ti'n vini, al assess standar, set bann standar, regarde si bann *childminders* i pe travay *according to* sa bann standar ki *IECD* sa letan ti pe sey met an plas.

Mon okouran osi, mon'n partisip dan bann seminar, bann *workshops*, ki'n ganny fer. E mon pa pe mazin non sa madanm kot *UNESCO* la ki'n toultan vini, ki'n travay tre, tre pre avek *IECD*. E ki li i enn ki ti fer resorti dan en *workshop*, or *symposium* ki ti fer, ki i ti dir ki *IECD* i en bon legzanp, lo nivo Lafrik pour Pti Anfans.

So i fer vwar ki ozordi *IECD* li menm, ozordi i bouz, i ti en Lazans. In bouz anba Minister Ledikasyon la, i fer ou vwar ki zistans kot in komanse. E kote ki in arive, e ko e i pe ale. Mon ti a kontan petet, la osi profite pou felisit Mrs Choppy. Akoz mon krwar anba son direksyon ki sa bann bon travay li menm li in ganny fer.

I parey nou'n ganny dir, nou konnen poudir, *IECD* ti ganny set up, 2014 an

desandan 2013, 2014. In vin an mars anba Lalwa, ki ozordi sa Lalwa mon konpran i pou ganny *repealed*. So avek bann bon travay, ki'n ganny fer, mon ti pou kontan konnen petet. Akoz nou konnen Mr Speaker, tou keksoz i komans a la baz zanfand. E parey mon'n dir nou'n komans ptipti e la mon vwar nou - nou - Petet nou kapab dir bann pli o nivo pei Sesel i pli pti li menm. Me i pli o nivo, lo kote Pti Anfans, dan Lafrik.

So mwan mon ti a kontan ki sa Lalwa, letan i pas. Mon konnen i pou donn nou enn pti pe plis rekognisyon, letan nou pou al anba sistenm petet ki *UNESCO* pe demann nou. Minis mon ti a kontan, dan ou *summing-up*, konmsi zis sey eklersi serten keksoz. Sirtou pou bann *childminders* ki deor pe ekout nou.

Daycare operators osi ki mon konpran osi i pou tonm anba sa nouvo Lalwa la. Petet zis enn pti pe leklersisman, petet ki pou arive avek sa bann *childminders*, petet pe mazin Lalwa pe al sanze. Ki pou arive ek nou. Eski, kot nou tonbe ?

So Minis ti a byen petet dan ou *summing-up*, donn nou enn pti pe lenformasyon ki pou arive ek bann *childminders* ler nouvo Lalwa i vin an fors? Apre osi travayer *IECD*, petet osi nou

ti a kontan konnen lo kote bann travayer *IECD*, Lalwa i sanze, kwa ki sanze pour zot.

Eski pou annan bann nouvo keksoz, bann nouvo pos. Nou konnen napa personn ki kekfwa pou perdi zot louvraz, wi. En Lalwa i sanze, me selman i anmenn en nouvo keksoz ek li. So si Minis petet, ou ti kapab donn nou enn pti pe detay an plis an sa ki konsern sa lenstitisyon li menm ki mannyer i pou ete. E Minis ou rol as Minister, avek sa nouvo lenstitisyon *IECD*. Sa nouvo lenstitisyon *ECD* ki mannyer i pou été? *The reporting*, ou konnen - konmsi sa fason, *CEO or whoever* ki pour la, eski i raport avek Minis?

Eski Minis ou annan en lotorite lo *CEO* avek son lenstitisyon? I *report* ek ou? Enn pti pe plis detay petet pou sa i vin koman ledikasyon pou nou bann dimoun, deor, pou zot ganny en pti pe - enn pti pe plis leklersisman, enn pti pe plis detay lo wi en nouvo Lalwa i vini, i bon. Mon krwar i bon akoz i en lot *step* pou nou bann Pti Anfans dan nou pei.

E mon krwar ki i pe al dan en bon direksyon, so mwan mon pa pou tarde lo dan mon pti kontribisyon ki mon annan pou donner ozordi. Zis selman mon ti a kontan Minis i al *to the*

extend of elabor enn pti pe plis, ek bann sanzman, ki pe al annan ler sa Lalwa i vin an fors. Petet kwa ki pou sanze, kwa pe vin pli meyer? Ki mannyer keksoz pou al été? Mersi Mr Speaker.

MR SPEAKER

Mersi Onorab. Mon aprezan pas laparol, Onorab Woodcock.

HON WAVEL WOODCOCK

Mersi Mr Speaker. Mr Speaker sa *Bill* ki devan nou, i enn ki vremen enportan. Sa *Bill* parey bann entervenans avan in dir se son bi prensipal, se pour ranforsi *IECD*. Pou fer li pli modern kot, sa *Bill* pe fer provizyon ki sa lenstiti ki son, ki *extend* enn pti pe lo *regulatory powers* ki *IECD* ti annan oparavan pour annan *oversight*. E *monitor Early Childhood Development, Care* e ledikasyon Sesel.

Sirtou sa bann servis ki ganny *provide* par bann *childminders*, bann *daycare* se zot sa *regulatory bodies*. Sa *body* ki donn *license* bann *childminders*, bann *Daycares*, pou zot kapab *care* pou nou bann zanfan, edik nou bann zanfan.

E sa i plizoumwenn pour bann kategori zanfan ant 0 avan ti 0-3an la i pou 0-5an ki

nou apel Pti Anfans. Mr Speaker i enportan, ki ler nou pe entervenir lo bann *Bill* ki nou mazin dan lentere nou bann zanfan. Nou pa kapab zis vini sak fwa nou koze nou vin fer bann politik *populist*, e bon marse lo en *Bill* sitan enportan koumsa.

I annan en Manm avan mwan, ki'n koze in dir, *ah!* ler nou ti dan Lopozisyon, nou ti kritike nou ti isi, nou ti laba. Mr Speaker i enportan, nenport ki Lasanble pou vini, i enportan ki nou diskite, ki nou demann kestyon, ki nou fer propozisyon kot fodre aranze nou aranze.

E par lefe ozordi Mr Speaker, i annan bokou nou ozordi nou lo plizyer bann, nou form par bann plizyer lorganizasyon enternasyonal. I annan plizyer bann *treaties*, bann Konvansyon ki nou'n sinyen, ki enkli Lagreman *UNESCO*, e i annan bann norm e standar enternasyonal, ki nou pei nou bezwen *abide to*, nou bezwen swiv pare lefe, ki nou Lasanble in ratifye plizyer sa Konvansyon.

E nou lobligasyon pou fer sir, ki nou swiv sa bann norm, ki nou etabli bann standar bann standar enternasyonal, bann standar ki pou benefisye nou zanfan e pou elev nou *ranking* o nivo enternasyonal.

So se pour sa rezon ki ozordi ki tou nou Manm lo sa kote latab, nou siport sa *Bill* k i devan nou Lasanble. Akoz nou konnen poudir, i en *Bill* ki pou ed e benefisye nou bann zanfan.

Aprè tou, laprantisaz i komans, a baz Pti Anfans. I komans a sa bann laz 0-5an. E nou'n vwar dan lepase degradasyon e sa dekalaz, ler zanfan in sorti o nivo lakres, e mont primer segonder, nou'n vwar en gran dekalaz. Nou'n vwar dan lepase kot nivo ledikasyon, nou bann zanfan in desann. Akoz in napa sa bon swivi, ler zanfan i sorti o nivo, Pti Anfans, lakres, primer e *as* zot kontinyen grandi, zot al lo baz segonder. Nou vwar i annan en dekalaz, nou vwar en degradasyon dan ledikasyon.

E sa bann Lalwa ozordi, e sa Lalwa ozordi ki nou pe diskite se annefe pour *deal* avek en pe sa sityasyon, pou *improve* lo laprantisaz pou fer sir, ki sa legren ki nou'n plante i pe byen ganny aroze, ki ava grandi i ava vin en bon plant aport fri, ki lepep Seselwa i ava rezouir e i ava benefisye.

Mon pa vwar nanryen okenn *issue* avek sa *Bill* ki devan, annefe sa ki enportan avek sa *Bill*, se parey mon'n dir i pe donn plis *regulatory powers*

sa lenstiti kot i kapab annan *oversight*.

Lo parey mon'n dir lo bann kalite *childminding* ki pe ofer Sesel. Swa bann *childminders*, swa kot bann *Daycare*, nou anvi ki nou bann zanfan, pe ganny okipe dan en fason ki byen. Nou anvi ki laprantisaz, pe ganny komanse kot sa bann *childminders*, kot sa bann *Daycares*. Akoz nou anvi ki standar ledikasyon Sesel i *ok*. Nou anvi ki nou bann zanfan i *safe*.

Akoz annou pa bliye ti annan en lenstans dan nou pei, kot ti annan bokou bann sityasyon ki ti pe arive. Bann ka ki'n arive kot bann *childminders* ki anefe in menm in vwar poudir lavi serten nou bann zanfan in ganny met an danze. I annan plizyer bann sirkonstans dan lepase ki'n arive, ki ozordi i nesesit ki annan bann Lalwa bann kad legal enportan, e serye pou fer sir, parey mon'n dir ki nou bann zanfan i *safe*.

Zot pe ganny tou sa bann sipor, ki zot bezwen. Zot pe ganny sa ledikasyon ki zot bezwen, pou ed zot devlope pou vin sa bann zanfan, e sa bann adilt ki demen i pou ed nou sosyete bouz pli devan.

Avek sa de mo Mr Speaker, mon napa okenn *issue*

avek sa *Bill*. Mon santi ki en *Bill* ki vreman bon. E mon pou donn tou mon sipor. Avek sa de mo mon dir ou mersi Mr Speaker.

MR SPEAKER

Mersi Onorab. E laparol i ava aprezan pou Onorab Bistoquet.

HON ROSIE BISTOQUET

Mersi Mr Speaker, bonn apre midi Minis avek ou delegasyon. Mrs Choppy bonn apre midi. Mon krwar mon pou bezwen fer en pti kontribisyon, enn pti kontribisyon lo sa *Bill*. Akoz mon santi sa *Bill* i tre enportan. I pa zis, mon poudir i enportan be selman i ekstrememan enportan. Akoz se sa *Bill* ki pou desid lafors travayer demen, e osi se sa *Bill*, ki pou desid lasante nou pep.

E an plis ki sa se sa *Bill* ki pou decide ki laz nou popilasyon pou mor. Petet zot a demann mwan akoz, mon pe dir sa. Se akoz letan nou koz Pti Anfans, i bann laz ki nou koz lo la konsernan bann zanfan, *IECE*, *ECCE* ant 0-7an. 0-7an pou nenport ki zanfan, nenport ki landrwa ki ou ete i tre enportan.

Akoz parey nou okouran ki, sa *Bill* ki pe anmennen *UNESCO* in rekonnet Sesel konmkwa ki i annan en kantite keksoz ki nou'n fer pour Sesel.

Be selman mon krwar nou bezwen mars pli devan. Akoz sa *Bill* i pe anmenn bann diferan konponan, laspe kot bann zanfan i bezwen. E *World Health Organization* parey mon fek dir, i deklar 0-7an en ler staz tre enportan pou devlopman en zanfan.

Akoz se la kot sa zanfan, i devlop tou son *skills*, plis son konpetans letan i ankor sa laz. E pli enportan devlopman son lanmwel. E devlopman en lanmwel, pou nou kapab pli tar poudir si sa zanfan i pou aprann, ouswa i pa pou aprann. So sanmenm sa ki mon pe dir sa *Bill* i ekstrememan enportan pour Sesel.

E bann konponan ki tre enportan letan *IECD* in met sa program ater, malgre zot annan sa *Bill* ti la. Me selman zot fer amannman mon krwar nou'n fer en pa an avan. Akoz bann zanfan, zot bezwen devlop zot sosyalman.

Zot bezwen annan sa melanz avek bann lezot zanfan, nou'n trouve bann zanfan pou al *childminding*, i annan ki fer *childminding*. I annan zot pou al kot *Daycare*, la mon vwar pe *extend* ankor pou ariv ziska lakres.

E osi bann zanfan osi i bezwen devlop zot emosyonnelman. Kot zot kapab

zwe avek zot pti kanmarad, partaz zot pti zouzou ek kanmarad. E annan sa konprenezon, avek kanmarad. E an menm tan, i annan sa laspe kognitiv parey taler mon ti pe dir, kognitiv kot i pou devlop li. I annan de fwa parey bann zanfan ki nou konnen i reste, dan lakour ouswa zot tousel. Zot pa koze, zot pa koz ek person, zot reste trankil dan zot trou ouswa zot napa person pou koz avek.

Ouswa bann ki annan zis en zanfan, e zot tant pour zot pa devlope, akoz zot pa partaz sa koze, zot pa pe koz ek kanmarad. E la kot sa laspe rekognitiv i vini, ki zot devlop zot *speech*. E an menm tan sa pou fer zot devlop zot *intellectually*.

E apre *of course* fizikman, bann zanfan mon krwar anba sa program, i annan fason pour zot kapab devlop zot *motor* sistenm. Ki zot kapab zwe, grenp pye dibwa, e sa osi i form parti zot devlopman. E mwan mon santi ki, sa *Bill* ki avek sa nouvo amannman, i pou anmenn en pli bon fondasyon - en pli bon fondasyon pour *lifelong learning*, avek byennet nou bann zanfan.

Akoz annan de fwa nou dir poudir *Early Childhood Carer Education is about*

aprann lekòl, aprann - pe montre ou ki manner ou pe aprann letan ou pe al dan lekòl, non. *It's more than that.* E an menm tan, bann devlopman parey nou konnen, i komans bann zanfan ki pe al kot *childminders*. Zot komans avek bann ptipti zanfan, zot ale bann *toddlers*, zot ale bann preparasyon pti zanfan ziska ler zot al lekòl.

E sa mon krwar i pou ede, dan sa devlopman nou bann zanfan. E an plis ki sa mon krwar osi ki *Early Childhood*, sirtou anba sa program. E i pou ed Sesel osi dan son bann endikater, sirtou bann edikater Ledikasyon. E endikater Lasante, kot nou pou vwar osi bann redikasyon lanmor ouswa maladi. Bann zanfan ant 0-7an. Mon poudir 7an akòz, letan zot in devlope.

Mon byen kontan ki zot in *extend* li ariv dan lakres. Akòz i en *follow-up*, zot kapab swiv sa zanfan. E an menm tan i promot, zot pe promot bann standar, bann standar ki tre esansyel dan devlopman bann zanfan. E sa bann standar i, ede osi pou protez bann zanfan. Ler ou annan en standar ou konnen ki manner standar. Ou annan en protokol, ou annan bann gidans ki manner

ou kapab protez ou bann zanfan.

E osi sa ki pe okip zot, ouswa sa ki la pe sirvey zot, ouswa sa ki pe donn zot sa ledikasyon *childminders*, *crèche teachers*, ouswa zot ganny *empowered*, zot ganny *trained*. Zot kapab zot osi annan, mont ansanm avek sa standar ki parey lezot mon kanmarad in dir, ki lo sa serten nivo kot mon krwar si nou bouz lo sa nivo, nou pou petet sot en kantite pei Lafrik, *why not?*

E mon osi mon byen kontan ki sa standar i pa zis de nou dan nou edikater. Me i pou ed Sesel avek son *sustainable development goals*, parey Minis in dir. Sirtou *goal, well* endikater 4.2. E mon byen apresye ki mon kapab fer en kontribisyon.

Mon krwar nou tou nou devret fer en kontribisyon akòz parey si mon pe dir nou tou demen nou pou vye, nou annan zanfan, *but at the same time*, nou pa konnen nou zanfan ki manner pou grandi, ki pou vini.

E mon krwar sa lenstitisyon, i *the best institution* kot i konsern devlopman bann zanfan. Selman Minis atraver Mr Speaker, mon pe demann de pti keston, petet letan zot fer zot

summing-up. Eski zot annan ase resours imen, pour sirtou bann imen ki resours imen kalifye la ki zot pe *extend* pou kapab fer sir ki, devlopman nou bann zanfan sirtou mon pe get anba sa *Bill*.

Zot pe ogmant enn pti pe kantite zanfan, ki pou al kot *childminders*. Apre la lakres osi, la prezan zot pe pran *Daycare sorry*. Apre la zot pe met lakres ansanm. Ki eski zot annan ase resours imen? Apre mon konnen avan sa ti annan *ECCE*, ouswa *IECD* ti annan korperasyon avek diferan Minister ouswa Lazans dan Sesel.

Sirtou bann Minister ki mon ti okouran, parey Minister Lasante. Eski la zot in enkli bann lezot Minister Sosyal, Lafanmir e lezot ankor? Pou fer sir ki zot osi sa bann, zot riske petet bann formater osi dan serten domenn.

Akoz zot spesyalite dan ki manner i été, ki zot osi zot ganny sa bon formasyon dan *Early Childhood Care and Education* ki ou lenstitisyon, sa lenstitisyon ansanm avek sa bann lezot Lazans, zot ava kapab annan sa korperasyon apre armonizasyon serten regilasyon ki sorti ouswa Polisi.

E an menm tan zot lo menm paz, *so it's more or less*

sa de kestyon ki mon ti anvi demande. E mwan mon totalman mon pou siport sa *Bill*. Mersi. Mersi Mr Speaker.

MR SPEAKER

Mersi Onorab. Mon aprezan, pas laparol Onorab Rocky Uranie.

HON ROCKY URANIE

Mersi Mr Speaker. Bonn apre midi Minis avek ou delegasyon, bonn apre tou koleg Onorab e byensir tou zabitan Zil Pros a lekout.

Mwan i pa ti pou fer mwan dibyen koman *ex ansennyans* si mon pa koz lo sa *Bill*. Mon'n swiv en pa devlopman zanfan, letan mon ti pe fer mon letid. Akoz pou ou vin en *teacher* i enportan, ki ou konpran ki manner zanfan i devlope. Ki manner zot devlopman i marse, pou ou kapab ansenny zot pli byen.

Mr Speaker dan lepase, bokou dimoun ti pran zot zanfan ler pe al travay, depoz li kot en dimoun, pou ed li vey son zanfan pour li kapab al travay. E la apre zot ti pase, apre travay pran zot zanfan. E ler ti ariv lafen dimwan zot donn enn pti larzan.

Ek letan nou'n vwar sa ogmante, byensir nou'n bezwen rod fason ki manner pou

ankadre zot, pou fer zot tonm dan en lankadremman en pe pli legal, ki zot kapab donn bann swen, pi enportan bann zanfan.

E la nou'n vwar *over the years*, nou Gouvernman in travay tre byen lo la. E nou'n nobou kree *IECD* e la mon poudir tir mon *chapeau* avek Mrs Choppy.

Ki'n fer en tre bon travay ziske la. E la nou'n vwar kot lankadremman normal pou *set* en standar, in ganny kree. Pou kapab ankadre nou bann *childminders*, gete ki zot pe fer, nou bann *Daycare* eksetera.

Pou fer ki zot pe donn nou bann zanfan, sa swen sekirite e ed zot devlop dan en fason ki normal, ki ase alaoter ki, ledikasyon i ganny *build-up* lo la pour ki zanfan i kapab vin bann bon sitwayen, aprann byen e donn bann bon rezilta.

E la byensir, sa *Bill* ki la i enportan. Ki i fer i zisteman nou konnen dan nenport ki sistenm, pli ou pe evolue, pli en pei pe devlope, ou bezwen aranze. E la mon kontan, ki nouvo Gouvernman i kontinyen - pe kontinyen avek sa ki nou'n kree, e alors pe vin avek sa *Bill*, pou fer nou, tonm pli byen avek norm e standar enternasyonal ki pe demande.

Byensir pou kit nou azour avek lemonn. E byensir sa pe

ganny fer atraver *UNESCO*. Mr Speaker, mon ti a kontan ki nou pa zis met dan nou latet ki bann *childminders*, i vey zanfan zis pour larzan. *Ok?* Mon'n vwar kot *training* in ganny ofer e bann *childminders* in *attend training*. Akoz zot pa pe fer gran larzan, mwan mon annan levidans ki zot pa pe fer gran larzan. Me zot pe plito ofer en servis lakominote. Ki nou bezwen donn bokou respe.

Akoz bokou paran i annan zanfan zot santi zot kwense parfwa, ler pou al travay zot pa ti konnen kot zot pou met zot zanfan. Me sistenm in ganny met an plas, zot santi zot pli konfidan pou met zot zanfan, en landrwa. E sa *Bill* li prezan i pou donn paran plis konfidans. Akoz i vwar poudir nou pe ganny bann regilasyon ki vin an plas ki vin pli modern, pli alaoter, avek standar ki bezwen pour donn sa swen, sa bann pti ledikasyon nou zanfan.

Zanfan sa laz zot pas bokou plis letan, kot *childminding* e *Daycares*. Apepre 8erdtan. I annan menm ki fer plis, depi dan 7er bomaten son paran anmenn li. So alors i laba kot *childminding*, ki vreman ler ou pe gete, travay i bezwen ganny fer byen pour sa zanfan vin en bon sitwayen. Akoz ler 4er, 4er edmi ki son

paran pe al sers li, *by the time* i dir ou, 7er edmi diswar sa zanfan pe dormi, 8er. So, i pa'n fer bokou letan ek son paran, me plis letan in fer kot *childminding*.

So alors kot *childminding* i bezwen annan sa program ki vreman pe fer zanfan kapab devlop parey nou dir *holistically*, pou li kapab ganny sa bon labaz, pour li kapab asimil tou lezot keksoz.

Akoz la son lanmwel parey ou dir i parey en *sponge*, so sa ki ou pe mete, i pe zis enbibe, resewar. So alor bezwen fer sir ki bann *childminders*, i met bann bon - zot ganny bann bon *training* pour ki zot pas bann bon keksoz, valer, eksetera avek sa bann zanfan.

So nou'n vwar ki sa in pou mwan, in deroul tre byen. E parey mon'n dir ankor, mersi pou nou Gouvernman e mersi Mrs Choppy pou sa. E mon byen kontan ankor ki sa Gouvernman la, pe kontinyen swiv dan nou lepa, pour fer sir ki sa i marse.

Me selman ankor parey detrwa mon koleg in dir, mon ti a kontan ki bann *childminders*, bann *Daycares operators*, zot osi zot ganny serten ledikasyon. Zot ganny met azour dan sa prosesis, pour ki zot konn byen k i pe al arive. Ki zot pa konfize

apre ler sa Lalwa i vin an plas. So alor Mr Speaker avek sa de pti mo, mon pou dir mon krwar mon pou donn mon sipor sa *Bill*. Mersi.

MR SPEAKER

Mersi Onorab. Mon a pas laparol Onorab Loze.

HON JOHAN LOZE

Mersi Mr Speaker. Mr Speaker pour sa *Bill* ki devan nou. Mon pou sit, mon resers direk *the raw research, as opposed to* pran li met li dan mon prop mon e pas li koman en laform en *speech*. Akoz parey mon koleg, Onorab Woodcock in dir, sa i en *Bill* tre enportan e byen koze pou bezwen fer byen konpran, pou nou tou konpran.

Mr Speaker, *years back - a number of years back* mon ti ganny privez pou asiz dan en miting kot, en kestyon ti ganny poze a - mon krwar i ti Vis-Prezidan, sa letan. *Then* Vis-Prezidan Faure. Kot i ti ganny demande, pou eksplik sa zafer *IECD*. E Prezidan Faure i en dimoun *passionate* lo sa size li.

Ti annan bann teknisyen, bann teknisyen in eksplik bann rezondet teknik, be *strangely enough* Prezidan Faure, ti vin avek Vis-Prezidan Faure ti vin avek en lot largiman toutafe diferan. I ti sorti i ti dir, ki nou

anvi avek sa ? Nou anvi elimin lapovrete! Sa ki nou anvi fer sa elimin lapovrete !

It was confusing at the time. It was confusing akòz nou pe koz lo Pti Anfans e li back then i pe dir ou i anvi elimin lapovrete atraver sa bann - Mon krwar pa ti ni ankor vin IECD, i ti dan bann fek komanse. E li i ti les nou konpran poudir, ou pa kapab adres lapovrete avek logmantasyon saler. Ou pa kapab lapovrete avek pri komisyon dan magazen senpleman.

Be ou bezwen annan ou en proze lonterm e *de longue haleine*, pou ou adres lapovrete. *Having said that*, dan mon lentrodiksyon prezan, mon anvi vin en pe lo sa bann resers ki mon'n, ki mon dir. Parmi bann mon'n *settle* lo enn ki i en pe pli senp e direk.

I lo *website Wilson Center document. Wilson Center.org* en Lartik entitle, *"Early Childhood Development, why it matters in the US and worldwide."* Son premye laliny ki mon le site, i pe koz lo bann pei ki *lack in comprehensive ECD services.*

"Millions of children do poorly in school and grow up to have low incomes and high fertility rates, putting strains on social services and perpetuating the cycle of poverty."

I pa fini la li, *however "Research shows that children who participate in high quality early childhood programs, are less likely to be involved in criminal behavior, are more educated, have a higher income, lower divorce rates, and use social services less"*.

Mon pou al lo ankor de pti bout, ki mon ti'n idantifye. Ah vwala! *"The Hart and Risley study, done in the 1990's, looked at how many words children know by the time they are three years of age. Findings showed that children from poorer families tend to have a vocabulary of 200-300 words; middle-class children have a vocabulary of 600 words, and children of affluent families have a vocabulary of 1200 words."*

E finalman *"The economic argument, or cost benefit analysis, for investing in different stages of the lifespan, shows that one gets \$18 back for every Dolar invested in the early years of childhood."*

Mon krwar sa i *tie-in* en pe avek bann largiman ki'n ganny anmennen par bann koleg avan, *including* Onorab Bistoquet. Ki *early childhood* ki son *ECE - Early Childhood Education*, or son *ECD - Early Childhood Development*, i plis ki

zis aprann lir ekrir, i plis ki zis aprann zwe, i plis ki zis al veye.

Be sa i *beg* en largiman. Par egzanp i annan sa mon krwar en serten sonm larzan - 750 mon pa konnen, ki nou Gouvernman nou, nou ti'n met anba kot ASP. E prezan sa in ganny gete koman en led sosyal pou bann paran pou pey *Early Childhood services* avek.

Me letan ou pe swiv largiman ki la. Lenvestisman dan sa domenn, i pa sosyal li. I pa led sosyal la. La i vin en *net investment* dan ou pep, dan ou popilasyon ki aport en retonbe *eightfold*. E nou'n nepli kapab, kontinyen get lenvestisman ki nou fer dan *early childhood* ansanm avek tou bann lezot keksoz ki kot ASP.

Nou bezwen *move away from that model. Now, making the argument* ki nou bezwen *move away from that model*, nou bezwen komans poz nou lekor en kekyon koman en pei, koman en sosyete. Eski nou pe depans ase, eski nou pe investir ase? Dan sa domenn la, sa sekter. Eski nou pe miz ase larzan nou komann sosyete dan *Early Childhood Development, and Early Childhood Education?*

Akoz mon konnen i annan en kantite largiman, ozordi i dimoun poudir ou. Ah mwan

mon pey *tax* pour li met son piti veye. Mwan mon pey *tax*, li papa pa le sonny son piti, Gouvernman prezan bezwen donn larzan pour li al *Daycare*.

Be resers pe montre ou, ki si nou investir, boner, i annan en *net benefit*, pou nou tou *including* ou ki pe pey *tax*. Parske i pe montre ou poudir, sa lenvestisman boner, i pou ede ki sa zanfana pa tonm dan la kriminalite. I pou prepar li depi boner, pou donn li en vizyon, en *positive outlook* dan lavi, ki i pa al tonm dan drog. I pa tonbe dan lavi.

Dimoun pou tonbe dan lavi, wi be selman sa i en *added safeguard* ki nou komans adres problemn avan i leve. E mon krwar la, ki nou pe koz lo Lalwa, i annan en pli gran legzersis konsyans pou nou fer. Ki direksyon nou pran koman en sosyete.

Akoz mon krwar ki olye *lesson*, nou bezwen seryezman *increase*. Lev profi, lev nivo sa zafer *EDC* la dan nou sosyete. Akoz problemn vre i grav avek nou, e problemn ki nou bezwen *reverse* a lonterm. E i annan en largiman osi ki dir ou ki zanfana, ki ganny byen antretenir a sa staz formativ la, zot devlop *higher emotional intelligence*, e zot menm zot, zot pli *emotionally stable*, ki bann

zanfan ki'n *malmener* dan son staz formativ. E sa ki nou pe vwar Sesel, se en kantite nou bann zenn ki tonbe zot pa emosyonnelman stab. E bokou i fer move desizyon, pa akoz zot pa entelizan neserman, me akoz zisteman, zot posed sa *low emotional intelligence quotient*.

Be si nou ti pou kapab bypass tousala, depi avan i komanse. *Provide* sa stabilite, pour tou paran Seselwa *regardless* ki sa mon krwar sa i ava menm ede, elimin sa sityasyon kot, bann koleg Onorab Bistoquet Lopital i dir ou - be tel paran in ganny zanafan, apre i disparet dan lanatir i pa zanmen anmenn vaksinen. Nou pa konnen kot i ete.

Akoz i pou dan en filyer la. Nou pou'n ed li, nou pou peye pou pey en *majeur* parti. I pou anmennen son zanafan li. I pou anmennen son zanafan kot son zanafan i a ganny *provided* avek en striktir. E nou bezwen onnet ek nou lekor, i annan en kantite paran ozordi pa kapab *provide* en striktir pour son zanafan.

Li menm li i pe pa kapab leve bomaten, i pa pe kapab lev boner, i pa pe kapab *provide* zanafan avek ou dormi tel ler, ou lev tel ler, ou manz tel ler. *We have a lot of children growing up* dan sa pei *ozordi lacking proper*

structure, ki nou koman paran nou kapab *provide*.

Be si nou ti kapab *provide* en landrwa, kot tou sa bann zanafan ti a kapab ale, ganny anmennen kot i ganny *at least* pandan sa 8erdan ki nou pe dir la, i ganny *provided* avek *une journée bien structureé* konmsi. I ganny li sa *structure*, ki li i bezwen koman en zanafan.

Tou zanafan i bezwen en serten nonm striktir, pou form li pou antre dan sa lemonn ki nou pe viv ladan. Be mon krwar koman en sosyete, nou bezwen komans seryezman panse ki sa zafer *ECE, ECD* i pa zis anmenn zanafan veye sa. I posibleman, tou fitir nou sosyete dan son antyerte ki pe *rest* lo sa *particular linchpin* la.

Koman yer nou sov en zenerasyon. E i fatig nou tou isi anndan sa. Nou isi anndan sa, nou fer konversasyon ek kanmarad. Nou koze deor, nou diskite, mon konnen. Zot tou zot paran la anndan, zot osi ki mannyer nou sov sa zenerasyon, ki mannyer nou sov tou bann ki pe leve.

Be posibleman, si nou ti kapab fer sa, ti ava ede. E la i anmenn mwan pou devlop en lot bout mon largiman, en problem ki'n toultan annan, se sa zafer *childminding* in toultan, en *minimum wage sort*

of zafer sa. In toultan nou pe pey pli ba posib. E vre dimoun pa *afford*. E prezan i vin en problemn pou bann *childminders*, e pou *IECD* osi ki li i sey met regilasyon pour striktir sa keksoz byen.

Akoz en *childminder* i realize sel fason pour li *être* rantab, pour *properly living* i bezwen fer, en *babysitting factory*. I bezwen annan lamas kantite pour li anmas sa bann pti gin, pti gin larzan. E paran li menm li, i napa pour li pey plis.

So it goes back to my initial argument, ki nou Leta nou bezwen pran nou en desizyon eski nou peye? Eski *as the state* Leta Seselwa nou peye pou sov nou fitir zenerasyon? Pou fer zot ganny byen okipe, pou *provide* zot avek tou sa ki zot bezwen dan zot lavi.

E sa i ava elimin sa presyon ki lo bann *childminders*. Akoz sa *childminder* osi la, i pe okip zanfan li, ou bezwen li dan en bon *state of mind*. Ou bezwen li *relax*, ou bezwen li byen dan sapo, pour li okip sa zanfan. I pa kapab li menm li strese, i pa kapab pa konnen ki mannyer pou pey son kouran.

Akoz si li i pa konnen ki mannyer i pou pey son kouran, i pa pou kapab ekout sa zanfan byen. So mon krwar ki annan

en *Bill* devan nou. Be i annan bokou plis ankor, ki nou pou bezwen fer. Mon siport sa *Bill*. Mon kontan ki ozordi bann *achievements* mon Gouvernman e mon pei kales kase pe ganny felisite partou. Nou pe sit *UNESCO*, ki'n felisit nou, nou pe sit nou model pour Lafrik. Ki wi *UNESCO* menm ki'n site, sa bann italyen ki ti vini, la ti dir leres Lafrik i devret pran nou koman model *IECD* ki nou annan Sesel. E mon kontan ki nou tou nou'n agree, lo la. Be nou pa'n toultan agree lo sa.

Onorab Woodcock nou pa ti toultan agree. Ti annan en letan olye ede pour edike, *we tore away at it*. Nou ti dir nenport kwa. E mon konpran mwan, e zot ti annan rezon tou. Akoz in ed zot, ozordi zot *State House*. In kontribye pour zot vin sa ki zot ete. Zot in pey zot tiket antre *State House*, lo bokou mansonz. E sa zafer *IECD*, zot in koz en bon pe mansonz lo la. E okenn Seselwa *in his or her right mind* ki pe ekout zot ozordi, e i *go back* to bann keksoz ki zot in dir *over the years*, pou realize ki kantite anbete zot in anbet sa pep pour zot, pey zot tiket pou antre *State House!*

Zot in koz lalang, avek sa pep, e zot prop parol ozordi, i dir laverite lo kwa ki zot, zot été !

Mersi Mr Speaker. Mersi Onorab Loze. Mon a prezan donn laparol Onorab Sandy Arissol.

HON SANDY ARISSOL

Mersi Mr Speaker. Bonn apre midi Minis avek ou lekip. Bonn apre midi tou Manm Lasanble Nasyonal, bonn apre midi tou dimoun ki pe ekout nou. Espesyalman bann dimoun ki dan sa domenn Pti Anfans.

Mr Speaker mon ti a kontan premyerman, felisit Minis Minister Ledikasyon ek Gouvernman pour sa bon linisyativ ki zot in komans avek pou larantre lekol.

Kot tou nou bann zanfan, bann Pti Anfans, bann pti zanfan zot pe ganny *breakfast* dan bomaten, e zot pe ganny dezennen. *Provided by* lasosyete pei, e atraver Gouvernman. Minis mon ti a kontan felisit ou, e felisit Gouvernman ek tou bann dimoun ki pe ede pou asire ki bann Pti Anfans i gannyen sa *breakfast* ek sa dezennen.

Alor pour sa felisitasyon ankor enn fwa.

(APPLAUSE)

HON SANDY ARISSOL

Letan parey Onorab Loze in *remind* nou, Mr Faure ti pe

mazin elimin lapovrete. I ti pe reve pou elimin lapovrete, nou Gouvernman li in pran en pa. In fer aksyon, pou asire ki parmi nou bann Pti Anfans sa lapovrete pa ava egziste, be i ava annan en soutyen, pou nou bann Pti Anfans deza la, an relasyon avek sa ki nou pe dir.

Mr Speaker mon ti a kontan dezyenmman, dir mersi tou bann dimoun ki ankadre bann zanfan. Ler nou tou ki la nou ti pe grandi ti annan, en dimoun dan nou distrik ki nou ti kontan - parske se laba kot nou manman ek nou papa ti gard nou letan zot ti al travay.

Ler mon ti ankor zanfan mon rapel, kot Roger Khan Saint Louis, ti annan en landrwa la deryer kot nou bann zanfan nou ti ale koman enn pti *Daycare*. Ti i annan Mis Rouillon La Rue Laloz an desandan. Mon rapel mon ti ankor zanfan.

I annan defen Mrs Dacambra, Lari Hangard ki ti vey nou bann zanfan. Letan nou paran ti pe fer en travay pou anmenn dipen dan lakour. Me sa letan parey nou konnen, kekfwa ti napa sa standar lo sa nivo, ki pei ti pe rode.

Kestyon ki ozordi mon bezwen demande, eski letan sa Prozedlwa in ganny asize, ekrir met ansanm, eski bann dimoun

ki ankadre bann zanfan, zot in osi annan en *say*, zot in tande in annan en konsiltasyon avek zot, zisteman lo sa ki nou pe diskite, ozordi?

Mon ti a kontan si Minis dan ou *summing-up*, dir nou parske i annan en kantite keksoz, ki annan dan sa Prozedlwa. Mon ti a kontan dir mersi Mr Speaker parske dan distrik Bel Ombre par egzanp, nou annan en kantite bann madanm - sirtou bann madanm ki rann en servis nou kominote, par asiste nou bann manman ek papa letan zot pe al debrouye pou zot en regar lo zot zanfan deryer kot lakour.

E atraver sa *Bill* ozordi, i montre ou poudir si sa *Bill* ozordi pe rod tou sa baz legal, pou asire ki sa bann dimoun zot ganny ankadre byen, dan en lankadremen legal, sa i montre poudir sa bann dimoun ti pe fer en travay ekselan.

E alor Gouvernman lasosyete nou bezwen rod fason ki mannyer nou protez zot, ki mannyer nou ankadre zot. E ki mannyer nou asire ki bann zanfan osi, ki dan zot posesyon i ganny ankadre byen an relasyon avek tou sa ki nou pe dir Mr Speaker. Selman an menm tan mon anvi letan nou pe get sa Prozedlwa, i annan detrwa kestyon mon ti a kontan

demann Minis. Par egzanp dan *Childminder and issuance of certificate of registration 6(1)*.

Minis i dir atraver ou Mr Speaker, “A *childminder, shall not render shall not render or operate a child care service in his or her home without having been registered in terms of this Act and issued a certificate of registration by the Institute*”.

Eski sa ki Lalwa pe dir ek nou Minis, pour ki tou bann dimoun ki pe ekoute. Si Sandy Arissol, ozordi i anvi vey parey *Bill* pe demann nou, 4-12 zanfan kot son lakour, i pou bezwen fer sir in anrezistre, i annan son sertifika ki paran i vini vwar poudir wi, mon an konformite avek sa ki *Bill* nou pe pase ozordi i la ?

Savedir si mon napa sa sertifika, mon ilegal dan sa ki mon pe fer. E si mwan mon pe *run* en biznes ilegal sa paran pa pou kapab vin kot mwan pour li kit son zanfan. Si mon pey li en larzan, parske anba Lalwa ki nou pe pase ozordi, sa i vedir ki sa dimoun i pou ilegal si i napa son sertifika. Konmkwa in anrezistre pou li fer vey bann Pti Anfans.

Parske dan Seksyon 17 ou dir anba ‘*Offences*,’ i annan bann *fin*es ki ou pou gannyen, si zanmen ou napa ou sertifika oubyen *registration*. Alor Minis,

mon ti a kontan letan ou fer ou *summing-up*, eksplik nou, pour ki tou bann dimoun ki dan Pti Anfans dan distrik Bel Ombre, i konnen, i konpran poudir, wi se sa ki pe dir.

Ou pou bezwen an akor ek tousala, ou pou bezwen anrezistre, ou pou bezwen annan ou sertifika, pou ou pa pe kas okenn Lalwa, e pour ki bann paran i konnen, kot zot pe met zot zanfan, an relasyon avek sa ki nou pe vote, ozordi.

Lot kekyon ki mon ti a kontan demann Minis Mr Speaker, i tonm dan Seksyon 35. Ki mon pe rod li enn pti kou, mon pe fer li desann zisteman Mr Speaker. Seksyon 35 i koz lo *Publication. Publication "The Institute shall publish in the national newspaper and on its online platforms-*

(a) by the end of March of each year, the list of all registered child care services;"

Eski Minis ou pe dir ek nou poudir dan Nasyon, ki nou apel Nasyon Sesel, tou-le-z-an, nou pou vwar lalis bann dimoun ki'n anrezistre? Savedir ki konpatib avek Lalwa, pou zot kapab vey nou bann Pti Anfans? Si Lalwa ozordi in ariv sa nivo modernite, be mon mazine sa osi Gouvernman i kapab servi dan lezot Lalwa.

Par egzanp ozordi, si nou annan biznes ki'n anrezistre koman en biznes, i demen soudennman i faid. I nepli kapab, i nepli ganny konsidere koman en biznes legal, mon mazine Gouvernman osi i kapab annan serten piblikasyon. Parske lala bann biznes, sa lannen nou'n anrezistre tan biznes, pou *license retail* par egzanp.

Sa lannen lala bann biznes, ki pa ki nou'n tir li koman tel parske zot pa pey zot *tax*. Zot in faid e pou piblik konnen e mon *happy* avek sa Seksyon Mr Speaker. Sa i montre ki zistans, nou'n arive an term bann Lalwa. E si Lalwa ki nou pe pase ozordi, zot in entrodwir sa, mon mazine Gouvernman atraver bann lezot Lalwa, nou bezwen kapab komans osi entrodwir sa Seksyon, dan lezot an relasyon avek piblikasyon bann keksoz ki byen dan nou pei. Zis parey sa Lalwa ki la pe fer provizyon, an relasyon avek 35.

Lot mon pwen Mr Speaker i an relasyon avek, *Enrollment in crèche* 37.

"All children turning three by the 31st of December shall be eligible for enrollment in crèche in the following year." Mwan mon annan en pti dout, mon annan en pti krentif Minis mon

ti a kontan demann ou enn pti leklersisman atraver ou Mr Speaker.

Ou konnen ler en zanfan i 3an, nou pe anvoy li lakres, 3an normalman bann zanfan ozordi, mazorite zot ankor pe met *pampers*, zot ankor pe servi zot bibron pou zot konsonm zot dile oubyen zot dyous.

E ozordi, dan lakres nou annan bann ansennyan kekfwa ki'n ganny *train*, Zisteman pour li *deal* ek bann zanfan, kapab montre li enn pti *chant*. Montre li mannyer pou komans ekri *a,b,c,d* oubyen pou fer bann lezot keksoz.

E letan zanfan i ankor annan 3an, a mon avi i annan osi sa bout, *toilettries* kot nou bezwen anmenn li dan twalet, pou fer son bezwen, pou okip son lekor. Eski bann ansennyan pe ganny ankadre? Parske la, lontan ler nou ti al lakres, nou ti al lakres laz 5an a 6an. E nou ti bokou pli gran.

Nou ti nobou kapab organiz nou lekor ler nou al dan twalet. Konn lav nou lanmen, konnen ki mannyer pou aranz nou lenz. Nou ti kapab osi swiv. Me letan nou pe get Lalwa ki devan nou ozordi, mon pe santi kekfwa si Minis Ledikasyon, kekfwa atraver serten konsiltasyon ki ou kapab fer, an

relasyon avek lakres, pou gete si i *ok*.

Parske i byen, parske bann paran pou anvi ki son zanfan definitivman i sorti dan en landrwa kot i pe pey enn pti larzan, pou li al dan lakres. Akoz i pa pe pey nanryen. Me laz 3an mon pe zis mazine si sa nivo kekfwa an relasyon avek nou bann ansennyan, avek nou *curriculum* ki nou annan dan lakres ozordi, si i pou balanse avek bann ansennyan ki pe fer sa travay deza.

Parske oparavan letan laz ti desann en pe ti annan en pe mirmirasyon. Parske parey mon pe dir ek ou Minis, i annan bann zanfan ki vini ki ankor enn pti pe pli - Pa tou zanfan ki devlop parey, pa tou zanfan ki al lo sa nivo devlopman sitan parey lezot zanfan. So mon kit sa la Minis pou ou donn nou enn pti leklersisman an relasyon avek lakres.

Me letan mon demann ou sa detrwa pwen Minis, mon kontan letan sa *Bill* pe vini ozordi nou pe koz lo standar. Standar mon krwar i ne keksoz ki nou bezwen dan pei. Tou keksoz ozordi nou bezwen standar.

E parey mon'n dir, mon'n felisit sa travay ki sa *Bill* in fer pour anmennen ozordi pou nou kapab- E sa *Bill* pe koz bokou lo

standar. Si nou pe get standar lo bann Pti Anfans, lakres e lo sa nivo, mon krwar i annan en kantite landrwa ozordi Minis atraver ou Mr Speaker pou *Cabinet*, pour Gouvernman revwar standar dan nou pei.

I manke en kantite landrwa dan standar, e si ozordi nou pe met lanfaz lo Pti Anfans, mon krwar i osi i annan landrwa pour nou aplik standar lo bann ki bokou pli gran, an relasyon avek travay ki nou fer, biznes ki nou *run*, bann aplikasyon ki nou fer, ki manner nou fonksyonnen koman en pei.

Mon krwar standar i en pwen kle dan sa Prozedlwa ki'n ganny anmennen ozordi. E pour sa mon ti a kontan mon osi profite pou felisit Mrs Choppy, avek ou lekip ki pe fer sa travay kot anba Minister Ledikasyon, pou asire nou bann ankadre ek nou bann zanfan, zot ariv lo sa standar ki lemonn pe rode.

Me par kont nou pou osi annan serten mirmirasyon, parske parey nou tou nou konnen. Bann nou bann madanm sirtou, ki fer sa travay ankadre nou bann zanfan, kefwa pa neserman ki zot tou zot annan sa nivo ledikasyon. Lo sa nivo akademik parey tou dimoun.

Parske souvandfwa letan en madanm i deside pran 4,5 zanfan parske li i santi i pa doue akademikman pou li al fer en lot travay. Alor i rann sa servis. E mon pe zis swete Minis atraver ou Mr Speaker. E osi Mrs Choppy ki ek letan nou'n pran baz sa Lalwa, nou'n pran an kont tou konsiderasyon sa bann dimoun ki pe *run* sa pti biznes, ki pe ganny enn pti profi, ki pe anmenn en keksoz dan Lakour li osi atraver sa servis, pour ki zot pa ganny kit deryer dan tou sa standar ki nou pe etabli, dan tou sa sekirite, ki nou pe donn nou bann Pti Anfans.

E avek sa detrwa mo Mr Speaker, mon ti a kontan aport mon sipor, parske dan distrik Bel Ombre parey mon'n dir. I annan en kantite bann madanm ki fer sa, e mon pou donn zot *full* sipor pou asire ki zot osi, zot mont lo en lot nivo.

E ki nou zanfan i ganny proteze anba sa Prozedlwa ki nou pe pase ozordi. Mersi bokou Mr Speaker.

MR SPEAKER

Mersi Onorab. Prezan mon a donn laparol Onorab Naddy Zialor.

HON NADDY ZIALOR

Mersi Mr Speaker, bonn apre midi Minis ek ou delegasyon. E bonn apre midi tou dimoun. Mr Speaker mon deliberasyon, i pa pou neserman long. Mon annan petet zis trwa pwen ki mon ti a kontan met a latansyon Minis apre midi.

Me sa ki enportan apre midi se ki nou rekonnet koman en Lasanble, koman en pei, ki en tel Prozedlwa ki devan nou i annan en neserite zisteman, pour ki nou bouz de lavan e pour ki vremen nou pe regard en nouvo zenerasyon, dan en nouvo perspektiv.

E apre midi sa ki osi esansyel mon santi, pandan ki zot ti pe mansyonn bann *childminders* vizavi partisipasyon sa *Bill*, mon santi ki osi enportan ki letan nou'n ini aprouv e *assent* sa *Bill*, bann paran osi zot konnen egzaktman ki annan dan konteni sa *Bill*. Pou ki demen letan, en paran pe anmenn son zanfan dan *childminder* servis, i konnen egzaktman ki i pe ekspekte, e ki bann regilasyon ki annan an plas.

Dan ou prezantasyon Minis ou'n koz bokou lo bann - lo en *holistic approach* pour asir devlopman sa pti zanfan, depi ler i ne petet, 4an ziska ler i ariv dan *formal setting schooling*. E dan nou Lasanble zisteman, zis

avan *recess*, in annan en Mosyon kot nou'n koz lo *inclusive education*.

E mon swete ki atraver sa *Bill* osi nou fer sir ki, *special needs* sa zanfan, depi ler i ne i ganny *cater* sirtou, sirtou letan i ganny *diagnose* avek serten bezwen spesyal. Mon rekonnet ki i annan pa mal bann *childminders* ki pe *cater* pou sa bann zanfan.

Parfwa zot ganny asiste avek en *carer*, me lefe i reste ki lanfaz lo *special need training* i osi petet merit ganny *escalate* a nivo bann *childminders*. Pour ki vremen nou anmenn sa, sa transformasyon ki nou ti pe, oubyen ki nou anvi antisipe.

Mr Speaker mon osi petet, Minis mon pa konnen si dan ou *Right of Reply*, ou kapab parske deor laba i ankor annan serten, serten ki nou dir bann *Daycares* ki pa neserman zot in anrezistre. Ki zot ankor pe donn servis, ki zot, zot plizoumwèn in konfortab, oubyen pe sey debourye, petet atraver sa *Bill* ki mekanizm nouvo.

Mon konnen i annan serten travay ki zot in fer oparavan, pour *call upon* sa bann dimoun pou vi anrezistre, ki'n ganny *training*, me selman ki mekaniz ki pou annan an plas, pour ki vremen zot osi, zot

come onboard e zot konpran egzakteman ki konpa, ki direksyon ki nou anvi, ale koman en pei.

Mon pou zwenn avek mon bann lezot koleg isi dan Lasanble, pou felisit Minister Ledikasyon. Felisit *IECD*, pou en travay ase konpreansiv ki nou'n fer, parske lakonplisman en lorganizasyon, i lakonplisman en pei. I lakonplisman en Nasyon. E mon swete ki mon de pti pwen, ki mon'n met devan ou Minis, i ganny pran an konsiderasyon. E reste asire ki mon pe aport osi mon sipor. Mersi.

MR SPEAKER

Mersi Onorab. Nou'n arive enn erdtan edmi depi ler nou pe asize. Me selman i reste mwan 3 Manm. E mon ti a kontan gard tou dimoun dan menm *wavelength*. So mon a prolonz sa enn pti gin e nou a kontinyen.

Mon annan Onorab Pillay.

HON SEBASTIEN PILLAY

Mersi Mr Speaker. Bonn apre midi ou koleg Onorab e bonn apre midi tou dimoun ki pe ekout nou. E bonn apre midi Minis. Mersi Minister. Bonn apre midi Minis dan Lasanble.

Ou konnen Mr Speaker, mon'n asize mon'n ekout deba

lo sa Prozedlwa, e apre plizyer refleksyon, mon'n fer en kantite sa refleksyon pandan *recess*. Ou konnen mon'n demann mon lekor konmsi kwa ki mon kapab fer diferan koman en Manm Lasanble Nasyon ki sipoze pe reprezant lentere pep Seselwa?

Konmsi kwa ki reelman mon kapab fer konmsi, ki mannyer mon kapab e vin dan Lasanble kantmenm en keksoz i annan son bon kote menm ou kapab rod bann keksoz ki, bann defayans ladan, ki kapab montre prevwar bann keksoz ki mal ladan.

E ki mannyer mon pa vin pokrit parey mon'n tann serten Manm Onorab koze, par egzanp atraver ou Mr Speaker Onorab Woodcock ki ti *boycott IECD* dan sizyenm Lasanble toulezour.

(Interruption)

MR SPEAKER

Wi, be selman.

HON SEBASTIEN PILLAY

Onorab Henrie ki pa ti oule vot lo Bidze *IECD*.

MR SPEAKER

Hold-on! Ou kapab fer serten komanter lo sa ki bann Manm in dir dan zot soz la, selman mon obzekte ki ou apel zot

ipokrit. Ou kapab fer komantr ki zot in dir e ki zot pe dir konmela, me analiz li byen, mon krwar sa i- Mersi.

HON SEBASTIEN PILLAY

Non, petet Mr Speaker, ou pa'n konpran mwan mon pa'n dir zot, zot ipokrit.

MR SPEAKER

Mersi. Mersi Onorab.

HON SEBASTIEN PILLAY

Mon pa'n dir zot sa mwan, sa ki mon'n dir - mon krwar nou bezwen sitye byen konteks aköz mwan mon ti la pandan sizyenm Lasanble e a plizyer repriz ki nou'n ganny Bidze *IECD* pou nou koz lo la, kote mazoriter *LDS* sa letan ti rod tou fason pou blok sa Bidze.

(Eski Onorab Larue i kapab les mon koze Mr Speaker ouswa i lev son lanmen)?

MR SPEAKER

Arete, wi. Onorab bon, Onorab Larue, Onorab Henrie annou ekout Onorab Pillay.

HON SEBASTIEN PILLAY

Mersi Mr Speaker. E mon realize poudir ozordi malerezman zot pe fer menm fot ki nou malgre nou ti'n anmenn en bon keksoz, ki mannyer nou anmenn li pli devan e ki

mannyer nou regarde ki defayans i annan ladan?

Mon dir sa Mr Speaker aköz lentansyon Seselwa pe rod en sanzman sete pou rod en nouvo fason fer. Pa pou repet - aköz ou bezwen admit ler keksoz i byen, wi in ariv son zistans. Me i annan keksoz ki ou bezwen fer pou anmenn li pli devan. E si ou pa fer sa *then* sa bann progre ki ou'n fer avek sa keksoz i pou regrese, ou pou perdi li.

E i malere pou war ki ozordi ou annan en Gouvernman ki pe repet pratikman menm keksoz ki ganny fer dan lepase e ekspekte diferan rezilta. Mon dir sa Mr Speaker e la mon konkret dan sa ki mon pe dir, aköz mon santi poudir Gouvernman parfwa i dir nou en keksoz e apre i ale i fer en lot keksoz.

Mon'n tann felisitasyon lo sa size goute, mon oule remersye bann ansennyan dan lekol ki pe debourye pou met sa bann goute ansanm pou bann zanfan, mon konnen zot pe fer en travay dir e zot devoue pou zot bann zanfan ki dan zot *care*.

Me mon oule *admonish* Minister Ledikasyon pou a premye lye i ti devret fer kler lekol ki pou ganny akse avek sa goute, e non, pa apre komans met lezot paramet otour li. Me i

byen ki sa sityasyon e bann ansennyen pe komans *cope* avek. Mon swete ki, mon pa la pou vin fer politik avek goute zanfan me mon swete ki tou anfen ki bezwen ganny en goute dan lekol i gannyen.

Rezon mon koz koumsa Mr Speaker se aköz mon oule koz diferaman avek la fason ki nou abitye koze. E aköz koz diferaman, set aköz merit sa Lalwa i annan bon merit e tou dimoun i byen ler nou dir i en bon Lalwa isi laba. Me selman nou pa pe regard serten keksoz ki dan sa Lalwa dan son lekritir, ki monte ou ki inevitableman nou pou annan en serten konfli ziridiksyon ant Minister Ledikasyon, *Board IECD* e son *CEO*.

E ki manner sa pou arive i ganny ilistre atraver bann *Clause* dan sa Lalwa ki montre lekol ki pran tel rol, e lekol ki pran asandans lo lezot rol. An premye lye Mr Speaker, si mon get sa Lalwa definisyon *Early Childhood Care* i dir ou, ou zanfan ki 0, a 8an, mon korek la?

Be si zanfan 0, a 8an i vedir ki bann lakres ki dan lekol Gouvernman i osi form parti sa lenstisyon ki bezwen ganny *regulate* par *IECD*. Si sa i leka *then* bann lakres ki dan lekol Gouvernman i osi bezwen

devret ganny en *license* pou *provide childcare*.

Akoz mon retournen Mr Speaker anba definisyon dan sa Lalwa i definir *Early Childhood* koman sa peryod 0 a 8an. Me lakres i *provide* depi 5an a 7an, a laz 7an zanfan i al dan P1. Ki vedir ki *IECD* li menm ki pou *regulate* bann lakres, bann lekol Gouvernman.

E kot prezan nou annan en konfli ki vini set aköz Minis anba seksyon 4, mon pa pe dir sa i sa Minis ki la, me Minis ki anba seksyon 4, anba seksyon 4 sa Lalwa nou dir ki Minis pou donn direksyon lo Polisi e *IECD* pou bezwen (sa lenstiti) *sorry* pou bezwen *comply*.

Me dan fonksyon sa lenstiti oparavan dan seksyon 3 nou dir e li ki bezwen *advice* Gouvernman lo Polisi Pti Anfans. Mon war en dekoneksyon, e se la kot mon war nou pe fer menm fot ki nou'n fer dan lepase.

Dan plas santraliz pouwar oubyen travay sa lenstisyon an deor *mainstream* filyer ledikasyon, nou re anmenn li ladan atraver en lakord ki ou anmare avek Minister Ledikasyon nou tenir li. I pa vedir ki Minis napa ziridiksyon dan lenstiti, i pa sa ki mon pe dir. Be sa ki mon pe dir se ki rol ki lenstiti pou zwe,

pou inevitableman antre an konfli avek Minister Ledikasyon - inevitableman.

E se la kot nou pou annan problemn ki pou ganny kree. Si ou ganny bann dimoun avek bon lentansyon e se pour sa rezon ki mon pe dir nou bezwen get li diferaman. Lalwa i pa kapab ganny ekrir pou dimoun ki annan bon lentansyon, i bezwen pou ganny ekrir pou nenport ki dimoun ki in pran en pozisyon pou kapab fer li.

Ozordi nou annan en Minis pou Ledikasyon ki annan lekspertiz dan ledikasyon, so i petet kapab konpran. Nou kapab demen osi ganny en Minis ki son lekspertiz dan ledikasyon i diferan, i kapab en dimoun ki'n *focus* plito lo nivo iniversiter.

E tou dimoun ki'n dan Ledikasyon nou konnen ki antre nou toultan i annan bann konfli akademik ki leve lo lafason ki keksoz i bezwen ganny fer, e sa bann konfli inevitableman dan plas anmenn en sistenm ledikasyon pli devan, i fer li regrese. Oubyen i fer li stagnate. E sa in arive dan nou sistenm ledikasyon malgre i annan dimoun ki pa pou oule mon dir sa, me i laverite.

E se pour sa rezonn Mr Speaker ki mwan mon vwar sa i

en problemn. Akoz anfen kont mon'n sey rode dan sa Lalwa, eski i pou annan en egzansyon pou bann lakres ki dan bann lekol Gouvernman an sa ki konsern travay ki sa lenstiti i sipoze fer? Si pou annan en egzansyon pou bann lakres ki dan lekol Gouvernman, mon pa vwar li fer sans.

Akoz sa lenstiti i sipoze vin sa Lotorite ki regard *Early Childhood Care and Education* lo en nivo nasyonal, lo en *platform* nasyonal. E si nou retourn dan Konstitisyon, Konstitisyon i dir nou, nou annan en sistenm ki sipoze *provide compulsory education* ki sipoze *free* dan bann lekol Leta.

Ou zanfan ki laz 6an i *still* bezwen al lekol, me i bezwen al lekol si ou anvi met li dan lekol prive, ou met li dan lekol prive. E ankor enn fwa *IECD* ki bezwen deside si sa lekol prive i devret ganny en *license*. Akoz sa lekol prive la i vin en *manager* sa *early childhood care* ki pou *provide*, me nou pa'n get sa. Nou pa'n get li.

Be letan nou pa'n get li i fer ki nou annan en mankman ki nou bezwen aziste nou fason panse lo la. E mwan mon santi poudir nou ti'n devret prevwar ki mannyer nou ekrir, nou'n etablir en kategorizasyon bann lenstitisyon ki pou *provide*

Early Childhood Care and Education.

Par egzantp enn bann keksoz ki mon konnen nou pou bezwen al ladan inevitableman se lanrezistremans en dimoun koman en *teacher* pou li kalifye pou *teach*. I pou inevitableman bezwen annan sa, e tou bann dimoun ki'n *teach* nou konnen poudir nou pas atraver nou *training* koman *teacher*, nou pas atraver en formasyon. E sa i permet nou pa devlop e debout devan en laklas pa zis pou delivre lo en pwennvi pedagozik, me i annan tou bann lezot eleman ki fer ki ou vin en dimoun ki kapab enkorpor, anmenn devlopman sa zanfandan en fason *holistic*.

E si nou regard par egzantp en *area* la, par egzantp laprantisaz matematik, i kler ki poudir sa i en landrwa ki nou bezwen os nivo lenformasyon pou bann dimoun ki pe travay avek zanfandan lo en nivo pli ba, lo en nivo pli zenn-az. E mon konnen prezan dan sa konteks se Minister Ledikasyon ki pou bezwen pran *lead* dan devlopman sa formasyon.

Me mon krentif i se ki inisyalmans se eski Minister Ledikasyon i pou *set* paramet pou Polisi ki pou ganny servi? Oubyen eski i pou *IECD* ki pou *set* paramet ki Polisi pou ganny

servi, oubyen eski i pou annan en konsilyasyon ant le de?

Mon krwar apriyori seksyon 4 ti devret dir 'an konsiltasyon avek lenstitisyon' i *set* bann Polisi bann direktiv Polisi e nou konnen bann direktiv Polisi definitivman i bezwen sorti *somewhere*. Akoz Minis i form parti - nenport ki Minis pou *form* parti en Gouvernman e ki pou annan bann direktiv Polisi ki en Gouvernman i donnen.

Polisi ou bezwen aksepté i sorti dan politik sa Gouvernman di zour. En lot eleman enportan ki mon'n regarde, e sa i konsern *inspection of non-compulsory education premises*. Kestyon ki mon pe demande se eski sa *inspection system* pou aplik - ozordi nou annan lekol prive ki pe komans *provide* sa nivo - sa kalite *care* pou zanfandan.

Eski sa lenstiti pou al ziska par egzantp as an *inspection* pou lekol Gouvernman, lekol prive, Lenstitisyon Prive ki pe *provide* sa kalite servis.

Par egzantp nou annan en *pre-school* pa lwen avek Lasanble Nasyon, so sa *preschool* byensir i pou bezwen ganny *inspected* par sa lenstiti. Me lakres, lekol Baie Lazare, lekol Glacis, lekol Anse Royale

pou osi ganny lenspeksyon par lenstiti. Dan konteks ki manner sa Lalwa in ganny *worded*.

Me si lenstiti ki bezwen donn *license* e sertifika, e Minis ki ansarz son lakres dan son lekol mon pe prevwar i riske annan en konfli ziridiksyon ant le de antite, si nou pa ganny li byen depandan li endividi.

Mon pwennvi se ki mwan mon ti a voudre war sa lenstiti pe *operate* dan en fason pli otononm, akoz mon krwar zistans ki nou'n arive avek *ECCE* Sesel nou ti a kapab annan en tel lenstiti, me ki ava tonm anba parasol Minister Ledikasyon.

Enn bann keksoz Mr Speaker ki mon osi war ankor enteresan dan sa Lalwa, e i annan en *Clause* ki koz lo *Board* sa lenstiti. E ler nou koman koz lo *Board* depi *Board* sa lenstiti son *Appeals Board*, son *Chief Executive Officer*, tou sa bann dimoun i ganny apwente par Prezidan Larepublik.

E ankor enn fwa la mon war en *departure* Gouvernman di zour *LDS* - en depar *from* en keksoz ki zot in toultan dir kot tou apwentman dan sa bann Lalwa i ganny fer par Prezidan. E annefe Onorab Ferrari in refize debat lo bann Lalwa ki

koz lo bann apwentman ganny fer par Prezidan dan Lasanble Nasyonal.

Me ozordi zot pe fer sa. Me sa ki konsern mwan se ki mon ti ava ekspekte ki sa bann apwentman i ganny fer par Prezidan an konsiltasyon avek sa dimoun ki mon krwar, i devret ganny konsilte lo la, e se Minis Ledikasyon. Be ler mon regard par egzanp seksyon 18 si mon pa tronpe, mon pa vwar mansyon konsiltasyon dan apwentman sa bann *Board*.

Savedir Prezidan pa bezwen konsilte ek son Minis pou Ledikasyon ler i apwent sa *Board*. E sa mon pa pe koz lo Prezidan aktyel ki la, me i Gouvernman aktyel ki la in fer sa Lalwa so petet mon pa konnen si sa i lentansyon. Me si ti mon Gouvernman osi ki ti pe fer sa Lalwa, mon krwar ozordi avek sa ki mon konnen, granmersi mon kapab koze e dir poudir i pa korek pou nou al dan sa direksyon.

Mwan mon pe dir zot i kler, mwan mon pe vin fer keksoz diferaman, si zot oule kontinyen fer menm keksoz ekspekte menm rezilta, diferan rezilta *that's up to you*. E la Mr Speaker mon osi note e mon pe demann mon lekor akoz sa *Clause* in ganny *worded* koumsa.

I dir koumsa poudir; ‘A *Chairperson Board*’ pou donn *CEO* pou etabli bann restriksyon ki *CEO* pou travay anba la ki pou ganny deside par ‘*Chairperson*’. Mon pa ganny en konpran akoz sa *clause* in ganny *worded* koumsa.

Akoz mwan ler mon pe get li, si sa *Board* ki pe pran desizyon e li i pe *vest* son bann pouvwar seksyon 23, i dir ou ‘*The Board may subject to such conditions and restrictions as The Chairperson may impose*’. Ki *manner Chairperson* i kapab enpoz restriksyon lo en *Board*?

Sa *Board* i bezwen koman en kolektiv deside lo bann restriksyon ki i pou mete, be pa sa dimoun ki *head* sa *Board* li ki pou deside ki restriksyon pou mete lo sa *Board*. Efektivman *then* alors sa lorganizasyon i annan 2 *CEO*. E dan sa konteks si i annan 2 *CEO* ankor enn fwa nou war ki pou annan en konfli ant personnalite sa 2 dimoun.

Parey mon'n dir merit Lalwa i direksyon, e lentansyon Lalwa ler mon'n ekout Minis, i kler ki i annan en lanmour pou sa keksoz. Sa nou pa kapab *deny*. Me eski la fason ki nou'n met keksoz pou anmenn nou dan sa direksyon? Mon pwennvi i pa neserman non, pa neserman. Me sa i mon

pwennvi e mon pe donn mon lopinyon lo la apre ki mon'n lir sa Lalwa.

Mr Speaker mon termin osi lo en pwen kot ler mon regard par egzanp 33, e sanmenm sa kot mon pe sey konpran bann lentansyon sa Lalwa pou mwan ganny li kler. 33 i retournen selman i dir ou poudir Minis an konsiltasyon ek lenstiti ki pou fer regilasyon.

So i annan en lentansyon sa Lalwa pour ki i annan serten konsiltasyon. Be dan serten *area* i pe mete sa lentansyon kler. E se sa, sa *disconnect* ki mon vwar, ki mon santi poudir i kapab kre serten konfli dan lenplimantasyon sa Lalwa evantyelman pli tar. Nou tou dan Lasanble plizyer fwa nou'n koz lo Lalwa en Lalwa ki'n pase oparavan ki'n kre problemm.

Petet si sa letan nou'n ti'n koz lo la i pa ti ava kre problemm, me ozordi mwan mon pe fer sa ki mon bezwen fer e nou, nou pe fer sa ki nou bezwen fer pou nou koz lo sa Lalwa dan sa fason pou montre bann landrwa kot nou santi i annan defayans.

An konklizyon Mr Speaker, mon krwar in annan bokou konsern parmi bann dimoun ki *provide* sa servis, e mon krwar nou tou nou koz zis lo *childminder*, be ler nou get sa

Lalwa i bokou pli konpreansiv kot i koz lo sa *childcare*. Sa striktir *childcare* li menm ki i pa zis pou fer *childminder*.

E souvandfwa dan nou konteks nou krwar poudir *childminder* zis nou ale bomaten nou met nou zanfan laba e *mind* nou zanfan, *and then* apre midi nou vini nou pran. E mon kontan ki nou pe komans bouz dan en, nou'n komans bouz dan en direksyon depi la i a fer mon krwar apepre 7an, nou pe bouz dan en direksyon kot sa *mind*ing ki pran plas i en *mind*ing ki *involve* devlop sa zanfan.

Fer li komans fer serten keksoz ki apre ler i antre dan *mainstream schooling* si ou kapab apel sa i ganny li en lavantaz. E mon krwar sa pou manifeste ofil letan akoz sa progre ki nou'n fer depi lannen 2015 ziska la i pou manifeste atraver rezilta ki le bann zanfan i ne an 2015, pou fer zot bann legzanmen e mon krwar sa i pe komans manifeste dan serten sirkonstans.

Me selman i pou annan en adaptasyon ki dimoun ki *provide* sa bann servis pou bezwen fer, e in en peryod adaptasyon depi ler nou ti komans *IECD*, i pou en peryod adaptasyon *going forward*.

Me sa ki nou a devret fer, i se ki nou pa devret bliye kalite striktir sipor nou bezwen kontinyelman met an plas, pou nou ed bann dimoun ki *provide* sa servis, i pa fasil. E i annan bokou dimoun i konplent i dir ou par egzanp la kantite zanfan ki i veye pa permet li pou li kapab fer ase larzan. Mon krwar sa pwen in ganny souleve.

I annan bokou dimoun i dir ou bann standar servis ki merit ete dan legzizans, i fer li perdi la kantite zanfan ki i kapab veye. Tousala i bann keksoz ki nou bezwen pran kont. Me lo en lot kote sa bann dimoun osi i bezwen konpran ki ler ou pran konparezon zanfan en dimoun, zanfan en dimoun i bezwen toultan an sekirite ziska ler i sorti kot ou.

So i annan en balans ki bezwen ganny etabli e nou bezwen etabli byen sa balans. E mwan osi mon bezwen dir poudir travay ki'n ganny fer dan sa domenn i pa'n fasil, akoz i annan bokou kritik *level* dan *IECD* dan lepase par bann *childminders*.

Me bokou *praise* ki nou bezwen al anver *IECD* koz travay in ganny fer e lentansite travay ki'n ganny fer. E mwan mon ti soke ler mon ti *find out* poudir en kantite la mazorite en

gran mazorite bann *single mothers* ki servi bann servis *childminding*. E sa i montre ou kote nou sosyete pe ale.

E mon termin lo sa not Mr Speaker ki, bomaten nou ti annan le 2 *Whips* e mon'n apresye ki le 2 *Whips* in fer sa pti prononsman ki zot in fer miz apar bann aksidan ki arive me nou annan en *serious question to deal with the mental health state of* nou pei e bann keksoz ki pe arive. E sa Lalwa i vre ki tou keksoz i komans la, and si nou *get this right then everything else* i devret tonm an plas.

So mon lentansyon apre midi avek sa deba miz apar bann politik ki mon'n fer lo komansman, e mon'n fer politik ti nesaser. I mon lentansyon pou fer sir ki nou annan en pli bon Lalwa ler nou sorti la.

E si mon ganny *commitment* avek bann dimoun ki la, ki annan bann landrwa ki zot pou vwar, zot pou gete ki manner pou aziste, i en keksoz ki pou al dan en bon lentansyon e pou en keksoz ki pou e nou pei. Mersi Mr Speaker.

MR SPEAKER

Mersi Onorab. Mon annan Onorab Porice pou son lentervansyon.

HON DOYACE PORICE

Mersi Mr Speaker. Bonn apre midi tou mon bann koleg *MNAs*. Mr Speaker e osi Minis i avek son lekip. Sa *Bill* i dan leker tou nou tou i la e osi tou Seselwa. E non, pa fer politik. Akoz i konsern nou ledikasyon nou zanfan, nou pti zanfan e osi i annan nou ki annan aryer pti zanfan.

Mon pou siport sa *Bill*, akoz mon santi ki nou bezwen bouz pli devan. E annan sa lasistans pou kit sa standar anver nou zanfan. Ozordi *childminders* pe al pli lwen kot zot pe ede avek transformasyon nou bann zanfan 0 a 5an. Lo zot nivo ledikasyon ziska ler zot ariv dan primer. Mon'n dir sa 2 mo, akoz mon santi ki mon osi mon'n kontribye bokou anver zanfan dan lakres, e tou dernyerman avan mon travay avek Lasanble mon'n en *childminder*.

Mrs Choppy i la, mon partisip dan tou zot bann *training* ki zot in fer e la mon santi ki zot pe al pli lwen ankor. E i en lankourazman pou sa bann *childminder*. Mon pou siport zot akoz plizyer fwa bann *childminder* in anmenn plizyer kontribisyon anver bann *miting*, anver bann *training* ki'n ganny fer dan lepase.

Mon pou felisit Mrs Choppy avek son lekip pou sa travay nob ki in fer pou ed sa bann *childminders* pou konpran pran plis sa travay. Mon pou osi felisit nou Minis ki la ozordi avek son lekip ki la ozordi ek son lekip pou sa bon travay ki zot pe anmennen pou nou bann zanfan.

Mon asire ki pou annan plis *training* pou siport zot plis ankor dan sa travay *childminding* e osi plis lezot keksoz. Atraver sa *Bill* pou osi ed nou bann zanfan, pou zot osi konpran sa travay ki pou siport zot dan zot letid lo nivo primer e *why not* ler zot in ariv dan segonder ?

Mr Speaker mon annan en pti kestyon pou mwan demann Minis pou li donn repons dan son lentervansyon. Eski pou annan en evalyasyon kot bann *childminders* pe vey sa bann zanfan, kot pou annan plis amelyorasyon, fasilite e lespas pou kapab arive ed sa bann zanfan atraver zot letid?

Akoz i pa zis pe vey zanfan, nou osi pe edik nou bann zanfan pou zot ariv pli devan anver zot ledikasyon. Avek sa 2 mo mon pou siport sa *Bill* aköz pou mwan i en *Bill* ki pe anmenn nou zanfan pli devan. Mersi.

MR SPEAKER

Mersi. Si pou napa okenn Manm ankor ki pou entervenir mon pou *close* deba avek Onorab Aglae. E nou a apre kontinyen demen. Onorab Aglae.

HON EGBERT AGLAE

Mersi Mr Speaker. Bonn apre midi Minis, Mrs Choppy e lot Mis. Mr Speaker sa *Bill IECD* ki devan nou la i en *Bill* ki enportan e mon'n enn ki osi ki'n swiv son nesans, e ki'n ganny *involve* en pe ladan parti ki i travay ki mon ti pe fer koman en *DA* - dayer atraver ou Mr Speaker menm si Onorab Henrie pa tro kontan ler ki mon'n *DA*.

Me selman Mr Speaker kreasyon *IECD* 2013, ti en louvertir pou adres serten size ki konsern nou *Early Childhood Development*. E menm dan son kreasyon ki nou ti ganny envite avek en prezantasyon, pou konnen kwa sa ki ti zot lentansyon, ki zot vizyon, ki zot misyon, ki ti ganny et devan nou, nou'n konpran.

E ozordi si nou pe ganny rekonnet mondyal atraver *UNESCO*, se gras a travay ki lekip *IECD* ki ti pe ganny dirize par Mrs Choppy mon krwar in fer en travay vreman fantastik ek son lekip.

E ozordi *childminder* li menm li in ganny son plas kot i merite, malgre lo komansman bann *childminders* ki nou ti bezwen al vizite, al koz ek zot, ale enterakte avek zot pou fer zot konpran ki Gouvernman a sa letan ki pe anvizaze fer atraver kreasyon program *IECD*.

E nou tou nou konnen parfwa ler nou dan en pti konfor, nou en pti pe rezenbe pou fer fas avek serten bann azisteman avek sanzman, ki fer ki pa bokou ki ti pe pran li dan en fason pozitiv, ouswa pe regard li dan en fason sibzektiv. Me ek letan, ek levolisyon ek sipor ki zot ti pe bezwen, zot in aprann pou konpran e apresye lavantaz ki sa servis ti pe donnen.

E enn bann faktor kle ladan sete pou met en pti pe lord avek sa servis, e osi ogmant standar ki sa servis ti pe delivre. E ti annan bann moman letan kot nou ti pe tann parfwa bann kritik ek sa servis e menm bann lensidan i ti pe rive e menm lanmor ki'n arive avek serten bann zanfan ki ti an posesyon *care*, sa bann dimoun.

E pou nou sa bann letan nou ti santi ki i vre ki i annan nesosite anmenn en pe standar. Akoz oparavan dan lespri en manman, se mon bezwen al

travay, pran mon zanfan, met kot en gardyen, i pe ganny veye.

E ou pa konnen ki pase deryer ou pa ti pe mazine pou be letan i laba i ti a bon aprann serten keksoz osi, ouswa pa zis aprann bann keksoz en pe negativ ouswa ki'n arive kot zanfan in aprann, parey serten parol ki zot pa ti pe dir ler zot in sorti laba zot ti pe dir.

So i ti bezwen annan en lankadremman avek sa servis, e se sa kot nou sitye ozordi kot sa fri li menm i pe aporte e i bezwen kontinyen. E letid mondyal in montre poudir bann zanfan ki pas atraver sa *Early Childhood Program* plis ki 80poursan zot, zot *end up* bann *graduates*.

Sa letid ki'n montre e ti an en letid ki ti ganny fer pou en peryod lontan, apepre 40an, in montre poudir bann *graduates* in bann ki'n reisir in pas a en Program *Early Childhood*.

E osi mon krwar i enportan pou site ki pandan sa parkour ki kreasyon *IECD*, e osi avek bann mankman ki sa bann *childminders* ti pe fer fas avek, baze lo bann demann lo servis sirtou sa ki *IECD* ti pe enpoze, pe met lo zot, in annan bann rezantman, byensir, akoz ti annan bann kou osi adisyonnen ki ti pe ganny mete lo latet sa enn ki pe donn sa

servis, pou li kapab petet amelyor son landrwa, fer lespas, lekel ki dan prezans pandan ki bann zanfan i la kot ou. Akoz i annan bokou ki zot pe fer sa dan en *household* e i annan lezot dimoun i viv dan sa *household*.

E se sa kot bann demann ti ganny met devan pour ki i annan osi bann sistenm *vetting*, pou zot kapab konnen avan mon don ou sa permisyon, nou bezwen konnen osi si ler nou pe met en zanfan dan sa landrwa i *safe*, bann endividi ki la i pa pou koz danze pi sa zanfan e afekte sa servis.

So, in bann keksoz ki in ganny diskite in ganny konsevwar, malgre mon'n dir pa tou ki ti pe aksepte sa. E mon felisit tou *childminders* ozordi ki ankor dan sa servis ki i ti annan dout depi komansman kreasyon e ozordi zot ankor pe rann sa servis dan en fason nob.

E la mon mazine Mrs Louise, Mrs Bristol, Mrs Eneca. Mon mazin osi Mrs Barra, Mrs Renaud ki pe donn en servis ki neser. Akoz dan mon distrik napa en *Daycare center* e si zot a la byensir bokou pou bezwen bouz pli lwen pou en pli eksteryer pou zot al donn sa servis.

E pou mwan Mr Speaker met en kad legal avek *IECD* i enn ki annan en nesosite, e kot i pou annan son retonbe ki anmenn sa servis lo en pli o standar.

Me en keksoz ki mwan mon war dan *Bill* ki mon krwar i enportan, se sa laspe ledikasyon. Ledikasyon, ledikasyon e ledikasyon, akoz dan resers li menm in montre poudir bokou sa bann Pti Anfans zot in kapab devlop bann diferan *skills* letan zot in antre dan sa bann *Early Childhood Program*.

Kot zot in devlop bann *basic* fondamantal ki swa akademik, ouswa ki swa zot bezwen dan zot lavi, swa dan zot ledikasyon li menm. E in osi montre poudir bokou zanfan in aprann koze, pa zis dir en mo me zot in kapab fer bann fraz, ki paran li menm petet napa letan pou asiz ek sa zanfan pou gide e zot in aprann dan sa *Early Childhood Program*.

So i montre ou poudir i annan son benefis. I annan son plas dan en sosyete ki nou pe viv ladan modern pou kapab galvaniz li dan en kad legal pou li kapab kontinyen fleri. En bout dan *Bill* petet mon pou demann *Minister* pou adrese se dan *part 3(5)* kot i annan en peryod 3an ki zot pe donn sa

registration pou sa bann *childminders* e apre 3an ou pou bezwen byensir al *renew*.

Be mwan mon pe get li dan en lot fason, akoz ler mon anrezistre *ok*, i parey ou pe anrezistre *ok* i parey ou pe anrezistre en biznes osi *ok*, apre tou-le-z-an ouswa tou le 2an ou an ou *license* ki ou bezwen al *renew*. Mon pe sizere akoz nou pa fer li dan en sistenm ki i vin parey en *license*.

Me selman ou'n anrezistre zis en fwa *unless* ou ganny *deregulate* e la kot ou ganny *deregistered*. La baze lo ou konportman ouswa ou'n *go against* bann norm ki pe ganny mete dan Lalwa, kot i konsern *childcare* servis, lenspeksyon, bann keksoz ki koumsa.

So *why not go* avek petet en *license* mon kapab dir dan plas ou pou bezwen al kot *process of registration* ankor. Ouswa petet zot a kapab eksplik mwan petet ki zot term ler zot pe dir li dan sa fason?

So avek sa 2 mo Mr Speaker mon krwar en servis parey i annan son plas, pou kapab anmenn lespas dan bann landrwa kot napa en *Daycare center*. E parey o komansman persepsyon ti krwar ki poudir *IECD* pe al lager ek *Daycare center* i pa ti korek,

so zot in kapab portre sa e mwan mon felisit zot avek lekip.

Kontinyen sa bon travay ki zot in komanse depi 2013. E osi mon pou zis dir poudir a en pwen kot bann paran ti dan difikilte Gouvernman ti vwar li neserer osi pou aport soutyen finansyel. Se sa kot ti annan *Daycare Scheme* kot ti ganny *extend* avek bann osi ki ti dan *childminders* ki ti an bann demann. So i annan en lantant la i annan bon keksoz ki'n arive nou pa kapab dir zis move keksoz ki'n arive pandan 43an en kantite bon keksoz in arive.

E mwan Mr Speaker pou terminen atraver ou i annan en madanm i dir mwan dir Onorab Arissol poudir "lontan anba *SPPF* anba Mr Rene, goute osi ti ganny donner akoz mwan osi mon rapel." Mersi.

MR SPEAKER

Mersi Onorab. Bon, mon pou termin deba avek sa entervansyon. Demen nou ava rebran travay avek repons Minis lo deba swivi par *Committee Stage*.

Mon krwar repons Minis i a donn nou en fason *refresh* sa tenm e rebran lo sa Lalwa. Mon remersye bann Manm, Minis ek bann zofisye pou zot partisipasyon Lasanble a *adjourn*.

(ADJOURNMENT)